

近代中國史料叢刊續編第三十一輯
沈雲龍主編

謗

書

錢祥保著
何震彝編

文海出版社
有限公司
印行

序

謗書何爲而作也以受謗故閱其書求治之書也求治惡乎謗然求治之急斯速謗之由錢子瑞生以此自咎余亦不能不爲錢子咎矣瑞生與余居同郡又同官豫中有年平時聞瑞生談民治力以興利除弊爲己任既而知武安余因公過其邑吏與民皆神明瑞生惴惴焉惟糾察是懼尋任唐縣意其設施一如在武安時余適由粵而奉而吉不意瑞生以吏議去官未幾國體變更余亦罷官歸旋又長蘇長皖不與瑞生見者凡十年自余辭湘任返里而瑞生與余皆皤然老矣然瑞生意氣不少衰每酒酣耳熱憤憤言疇昔事鬚髮怒張賓客滿座瑞生旁睨若無人手一書示余顏曰謗書受而讀之則皆求治之言興利除

言
言
言
一
弊之事奈何以謗名嗚呼此瑞生之所以速謗亦卽瑞生之所
以爲瑞生歟雖然晚近仕流足趨起口嘯嚙寶其官若性命民
生利害一切置不顧覲顏以希進唯阿以取容此其人或且膺
上考播榮譽未嘗求治而亦未嘗獲謗豈惟無謗抑或以令名
終焉又惡知其孰是孰非孰得而孰失哉君子甯忘其身之榮
辱而關心於民之痛癢是宜有道以處此矣然則瑞生母以此
自咎余亦不必爲瑞生咎耳讀旣竟爰序其略而歸之

民國九年歲次庚申十一月

韓國鈞止家撰

序

錢君瑞生從先君子游十餘年懋森兒時與共筆硯而君齒爲長以兄事焉光緒庚子後先後以縣令分發河南而懋森改官法曹不果往君則歷宰武安唐縣上蔡有政聲無何爲言官所劾罷去懋森驟聞之莫能明其故也河南州縣缺號稱優美鄉之人意君挾巨貲歸以爲君之官當由貪墨敗懋森雖心知其非而莫能爲君辨也君歸未逾年而國體改革懋森亦自京師還相見里門偶於杯酒間詢君去官之由君爲道所以甚悉雖然言出於君之口而無以實君之言懋森卽能信君鄉之人必不之信也甲寅秋懋森家居無聊不得已爲大梁之行每謁上官遇同僚中年資深者以懋森與君鄉貫同必詢君近狀且深

惜君之去行役所至凡爲君舊部民者輒殷殷問錢青天無恙
迨懋森宰項城於君舊治上蔡爲鄰邑其地犬牙相錯雞犬之
聲相聞父老多能言君之治行及所以去官者蓋河南吏役之
橫甲於他省而尤以南汝光所屬爲甚擇肥而噬人莫能堪柔
懦之官往往爲所挾持唐爲劇邑其俗健訟君之治唐一以愛
民爲主嚴懲蠹役革除各班老總名目而責成卯首裁汰捕班
及四鄉路捕立石縣庭永垂禁令唐民獲蘇而地方訟師土豪
依倚爲奸者反有所不便銜君甚深憚莫敢發及君移官上蔡
乃撫他故賄言官誣劾君以去非其罪也唐縣今爲泚源友人
黃岡汪鸞儔後君十年而宰斯邑嘗爲懋森言君所立石尙在
父老每過其下流連不置殆與甘棠之不忍翦伐同言及君必

稱曰好官好官鸞儔與君素不相識而所言若此豈有私於君哉丙辰冬君以湖北巡按段公薦復官河南未久卽歸懋森於今歲孟夏亦倦游歸里人世之變遷宦海之浮沈兩人者皆垂垂老矣君出其所謂謗書者見示並屬爲序懋森以故舊而爲寅僚人或謂厚於君不敢他有所言惟據所聞見者泚筆書之俾知直道存於天壤而唐蔡之民猶有三代之遺風也則君之是非可不辨而自明矣戊午七月同邑陳懋森再拜序

1111



序

國家當文勝之時豪傑之士局於資格末由自效不得不俛就繩墨以求合於有司一試再試幸而得尺寸之階宜若可進猶必納戶粟以就班註吏冊以輪選伺大吏顏色數年或十數年而後乃署一官宰一邑則又迎送之勞供億之煩簿書會計之囁雜萃於其身而且咨送詳報法程繭密稍一不慎處分隨之嗚乎士不幸而生斯世寧老死牖下已耳官胡爲者然而貪黷之夫罔民市利大效巨萬小效亦數萬當路要津以時餽獻皆曰好官彼其草刼人命何可勝道獨不聞訐發且膺懋賞登上考焉用是輦金而歸美宮室而豢妻妾比比皆是未嘗不令人駭且羨也由是言之膏以熏而自黜蘭當門而必鋤信矣曷足

怪歟吾友錢子瑞生豪傑人也少時與余在揚州書院同學業
又同時省試皆欲得一官自效者余前在江都學任曾調回本
籍查丈徒邑田地並未費官民一錢而邑有巨紳伎求不獲遂
賄言官參劾然徒邑賦田七十萬已造鱗册者十之七守在里
民不可得而奪也瑞生治唐邑一年百廢俱舉乃亦被劾於言
官且卽劾余之人也吾固知瑞生所以福唐民者必深且遠矣
夫求官自效旣效矣而去其官將示清白以遺子孫則此書正
未可沒也敢附已見與瑞生共證之壬子重九日丹徒李遵義

謹誌

序

昔胡文忠公有言吏治之不修兵禍之所由起也當文忠撫鄂之時軍事亦倥傯矣獨兢兢然思整飭吏治嚴禁陋習與羣吏更始並請部臣勿拘以文法以期行之數年漸可改觀然則吏治之良否關於治亂之機者甚大有賢者出與吾民更始而或爲文法所拘則又慮不得行其志疆臣且然而况於牧令乎錢君瑞生與余交垂三十年少時讀書矜意氣每相期以遠大其後官於豫不相見者十有餘年辛亥夏余以銜恤歸自京師及秋而有武漢之變道梗不得北行復與瑞生相晤於閩左蓋君已於前一歲罷官歸矣世變方亟故交多疏相與握手歎歎各道無恙君乃出是編示余受而讀之具悉其居官政績與其所以

去官之故余與君交最蚤知君亦最深無庸更爲贅美君之惠政唐邑之民能道之於其去也列狀上大府言之綦詳公道苟在人心是非必有能辨者更無俟余之置喙君亦不屑屑於一官之得失獨惜以瑞生之才毅然除數十年之積弊僅得藉手於一邑又以小人蜚語構陷排去之以爲快賢者之不得竟其志有如是耶嗟乎牧令者親民之官也官之所謂小事百姓之所謂大事也牧令不恤民事而假手于吏胥上下因緣以爲奸利而民之疾苦無所告至於弱者怨咨強者詛咒囂然不靖之氣遂以釀天下之大亂今日者兵禍亟矣揆其原因雖與蚩蚩之衆揭竿斬木者不同要之禍變之來固非一日梟桀者藉口于政治之不良因民心之積怨而資之以爲亂則固無可諱也

余慨夫兵禍之未有已而不得不服文忠之知言也辛亥九月
頌周鄭雅南

卷

書

卷一 序

一

一
期
及
置
歲
版

三三三



叙

居官固大不易事而牧令綦難僕廿五釋褐以資序當得一令
棄不就詎無意歟一邑之中萬類不齊狙詐姦僞飛灑詭奇居
堂皇者神明偶失訶察之力則弊失立見此牧令所以可爲而
不可爲也錢君瑞生二十年前故友也好讀書矜意氣不能無
迂拘氣頗輕易之非牧令才其後各以事牽南北奔馳不相見
宦於豫十年頗以幹局備今歲銜恤歸握手相值各道無恙則
已於歲前以微罪去嗚呼以瑞生之才雖卑吏不克終其官可
悲也已愈以知牧令之難爲也敬告世之牧令當以柔滑圓美
不事事爲能勿蹈瑞生之覆轍也可因條次其條教治式著於
篇俾世之人知瑞生之枉而爲牧令戒也編最成是爲序辛亥

言

書



八月江陰何震彝

謗書目錄

江陰何震彝穆忞編次

卷一

受理詞訟隨到隨審示

嚴訂署規示

三八放告當堂收呈條規告示

釐剔書差積弊改訂章程革除老總各項名目稟

附章程

裁革捕役並四鄉路捕認真籌辦巡警稟

禁止紳民製送德政碑匾牌傘示

奉查縣境關河要塞節略

動用學田秋季稞租移修學宮稟

增訂民間典賣房地章程剔除庫戶各書稅契過割積弊

以清訟源稟 附告示章程

修改高等小學堂講堂增築操場清釐學款力除積弊稟

改良師範傳習所預算經費酌予變通年限稟 附另單

高等小學堂會計員秦華觀侵吞學款潛逃擬將該員房

地封存備抵稟

查復秦華觀上控蠹書舞弊貪委勒包稟

查明秦金峯卽秦華觀劣迹昭著請照章扣除選舉研究

所考名稟

高等小學堂增設豫科暨城鄉各小學堂現已成立多處

遵式填表立案稟

增定勸學所現行章程遴選正紳接充總董請加札委

稟 附章程

查明增生姚光奎早經病故委係他人頂名上控並無革
生牛廷瑞謀充校長稟

1100
1100



謗書卷一

江陰何震彝穆志編輯

受理詞訟隨到隨審示

爲牌示事照得本縣來宰是邦已將兩月凡民間詞訟均係隨到隨審隨審隨結從無留滯不問人之貧富貴賤但問理之曲直是非虛心研鞫秉公判斷賄賂既所不行請託亦所不受此則本縣差可自信亦士紳商民所共諒者也乃頃有邑紳來函爲人關說詞訟接閱之下愧恚實深皆緣本縣德教涼薄誠信未孚致有此異然人果確有冤枉何不自行出頭具呈控訴本縣日坐大堂受理民詞訊明情由隨時親筆批發既不令原告守候復嚴禁差役勒索當爲爾等共見共聞更何事趑趄不進迺復倩人函陳節略爲之囑託誠不解是何居心本應將投函

者名姓揭示申戒姑念此邦惡習相沿已久遽行宣布則作函
者名譽顏面在在攸關殊非愛人以德之道用特寬其既往以
儆將來除來牘存卷備查外合行牌示爲此示諭閭境士紳商
民人等一體知悉爾等當知本縣遇事判斷一秉至公在告狀
者先問其事之真僞是非不必希冀他人情而在代人函託關
說者亦從此有詞卸責使彼等良心愧悔廢然自反或亦息訟
之一端也其各凜遵切切特示

嚴訂署規示

爲明訂署規以一遵守事本縣蒞任茲土甫經下車除一切利
弊當俟漸次推行外所有署規事理先行列款申飭爲此示仰
閭署人等一體知悉務照後開各項條款凜慎遵行毋得踰越

切切特示

計開

一地方紳衿因公謁見柬號房務卽持帖回明毋得耽延本縣簽押房設在二堂之側卽於二堂接見

一本署幕友均係本縣訪請品行端方之人從不與地方紳衿交接往來如有紳衿來署拜望該房卽婉言阻止

一號房設立號簿一本署內無論何人出入該房詢明何事詳細登註號簿當晚呈閱如不據實登註一經查出定提該房重究

一本署家丁僅供奔走本縣從不假以事權亦不准與本地紳董人等交接

一如有假冒署內諸色人等在外招搖撞騙無論何人均准扭案喊稟以憑提究

一閑雜人等不准擅行進署該房如不詢明來歷不加阻止擅自引進者除將本人訊辦外定提該房及把門人役責革究懲

一宅門二更卽行落鎖鑰匙交上無論何人不准私自啓閉出入其有水火命盜要案呈報者准在大堂鳴鑼隨卽啓門受理

一書差人等非奉呼喚不准擅入宅門如違重究

三八放告當堂收呈條規告示

爲示諭事照得州縣爲親民之官惟日與吾民相親則民間之疾苦地方之利弊始能瞭然於心不致有所隔閡本縣來宰此

邦博採輿論體察情形應首以清理積案爲先務而尤以革除舊日買快買遲及捲詞帖送諸積弊爲要圖除考取代書給戳遵守並嚴飭恪遵狀式各條認真辦理外爲此示仰闔邑士民人等一體知悉務照後開各項條規凜遵奉行毋違切切特示

計開

一本縣三八放告當堂收呈如有錢債細故不候告期攔輿喊控者除不准外隨時究懲

一呈詞係倩人代作須將作呈人姓名註明呈內不得混填來稿如係自作及代書代擬亦卽註明自稿及代書代擬字樣如不據實填寫併提代書重懲

一舉貢生監及老幼婦女人等來案遞呈均須另用抱告一同

到堂如無抱告概不准理如係婦女並提夫男重懲

一聽人教唆捏砌重情羅列多人希圖拖累以洩私忿者除訊明坐誣外併嚴究教唆之人照例重辦

一舊案從前歷控批詞均須全錄案經前任傳訊並照錄堂諭如有以舊作新隱匿前案不錄批詞者一經查出卽行重究仍責成代書於寫詞時先行逐件檢查

一遞呈之人於放告前一日先赴承發房掛號告期當堂呈遞此項號簿俟本縣升堂時由該承呈案聽候按號收詞不准先送署內如該房書等藉端勒索分文准卽於遞呈時當堂喊控訊究

一命盜案件及錢債新舊各案承發房卽分別新案舊案各立

一簿明白登記收呈時當堂呈閱

一原被告同時來案互控應另立一簿登記收呈時當堂呈閱以便即時訊斷如中證及說合人同來者准卽於呈狀叙明聽候酌傳質訊

一詞訟管押人犯逐日書寫名牌懸掛頭門如牌上無名卽係差役私押准該親族人等卽時喊控以便提究重辦

釐剔書差積弊改訂章程革除老總各項名目稟

附章程

敬稟者竊維爲政之道保民爲先保民之方除弊爲急

卑職荷

蒙 憲恩委署唐邑抵任視事已經三月親見各書之疲玩委

茶差役之暴惡兇殘實爲他處所未有敢就查訪所及敬爲

憲臺詳細陳之查

卑

縣各房經書沾染嗜好吸食鴉片者十居

八九氣體尪羸奄奄餘息公牘則積前壓後書寫則似草非眞
積習相沿牢不可破其尤堪詫異者各房書吏歷經卑前縣恩
賞兼充代書雖件作亦有代書戳記何時作俑年遠難稽由是
內外串通聯爲一氣富者百般勒索貧者任意留難創買快買
慢之名分內辦外辦之事或勾通訟棍架名上控或遇有要事
漏洩張揚甚或藏匿舊案抽換卷宗呈詞則以舊作新姓名則
以甲代乙是非半爲顛倒眞僞罔不混淆種種弊端不勝枚舉
然此猶爲無形之蛇螫尙不若差役之暴著虎狼也卑縣差役
計皂快壯捕四項而皂快壯各分頭二兩班合之捕役共分七
班每班總役第一名呼之曰老總分路承催錢糧租課雜稅牙
帖詞訟賬務婚姻田土家務爭繼各案均各按雙月單月歸其

承辦惟捕班又名爲兵快班有城關四路巡捕四鄉巡捕之分凡緝捕盜賊查禁娼賭宰殺窩匪皆其責任遇劫掠搶截重案則某路歸某班協捕娼賭拐騙亦由各該班協捕居多如頭二快所管者則正東路東北路正北路頭二壯所管者正南路東南路頭二皂所管者正西路西南路西北路某路所出之案則由某老總主持官准傳訊由老總撥役傳之官准查理由老總撥役查理之舉頭役散役諸人雖有卯名在官而實當老總差使老總以爲某案可稟到也則稟到老總曰否則否老總以爲某案可稟復也則稟復老總曰緩則緩老總事繁而不能兼顧則又各自選用管帳一名凡命案姦情刁拐鬪毆打架十惡不赦之案由渠承稟辦理其支應差使長解短解人犯押解錢糧

及一切迎送各事胥由該管帳專司撥役任之此項管帳之差非老總平日所信任者不能遽膺此任其終日在署伺候奔走者另有老總所派之散役各數名謂之走堂官以爲某案逾限已久應比傳也則有走堂者受其責官以爲某事辦理未善應懲創也則有走堂者任其過以一縣地方之大社稷人民之重乃任此無賴數輩分路管理內結丁書爲心腹外用散役爲爪牙無論何項事端老總有權而官轉無權如果老總實能辦事足爲通班之領袖猶可說也乃所謂老總者形同鬼魅日與鴉片相周旋貪比兇狼專以敲詐爲生計及究其升充老總所由來旣不因年老資深亦不因勤勞卓著而卑前任所以賞充者誠不敢以傳聞無據之詞妄爲稟陳所以承緝要犯則累月經

年而十無一獲傳集詞證則東推西諉而案終不齊其在卯各役則更有值年不值年之分而究其誰係值年誰不值年並無檔册之可稽全憑該總役一言以爲准故訛索鄉民之案層見迭出及爲人控告到官詢之老總則曰其人現不值年早經下班出外貿易而實皆該總役之狼狽之虎俵每出一票同往者率十餘人烟酒飯食種種需索票費名目尤多或甘言誘騙百計招搖或非法詐訛視同魚肉非使被訟之家傾家蕩產終不足以快其心其有被盜供扳或挾仇指控者則繫逮拷掠私押班房更是無所不至誰非赤子誰無父母坐視此惡毒豺狼把持盤據爲害閭閻可爲痛心其尤惡者卑縣並無伴婆遇有女犯及相驗女屍則臨時選人派充差役執票下鄉擇肥而

噉迫慾察既盈仍以無人肯充空稟節復如詞訟中有待質婦
女則由該總役看管於其家其中隱情益復不堪聞問凡此昭
著之兇惡近已查訪皆真祇有遺漏未知委無以告者過
忝爲民牧責在保民目覩情形難安寢食近雖嚴飭各房先將
案卷逐件查明挨次編號分別歸檔一面考試代書不准書吏
兼充並不准代書擅進署內使其內外隔絕諸弊冀可漸稀呈
詞則當堂收閱立即批判其有情節支離者卽向該原告盤詰
如係誣告隨時嚴懲務使架訟捏訴者不得逞其私圖批准傳
訊之件立即繕簽印發每案派差一人量地方之遠近酌傳到
之限期嚴飭該差不准多人隨往如有依限傳集至十案者卽
予記功一次積功三次則以次提升卯名遲誤者嚴比正身重

則斥革逐日由各該班總役頭役按照卯簿名次輪流值日以五日爲一班期不准再分雙月單月凡值班者親身在署伺候仍酌派散役以供奔走遇有重大事件統責成於卯首凡管帳向所承辦之事如支應各項差使長解短解人犯協緝命盜案犯及招解各犯一切護送錢糧餉鞘迎送往來過境雜差悉歸該卯首當之永遠革除老總管帳名目各該差非著有勞績者不得無故提升向之值年不值年諸說概行禁革凡在卯者悉歸卯首約束不准有誤傳喚至承催錢糧仍照舊章飭令各該班各管各路其餘詞訟案件悉聽本官酌予差派不得仍前把持伴婆現已選有史卻氏承充按月照章發給工食常川在縣當差住於候審公所西院不再臨時傳充以杜擾累匝月以來

經卑職遇事嚴懲察看該書役人等稍知儆懼惟是積弊太深

革除匪易若不嚴刑峻法懲創一二恐不足以挽頹風如果該

書役等從此革面洗心奉公守法卑職當懷之以恩亦不敢殘

刑以逞如其日久玩生復萌故態擬卽援照

升撫憲陳嚴懲衙蠹通飭立斃杖下其有情節重大婪贓得實

者則恭引光緒二十一年五月初一日嚴懲蠹役

上諭辦理比照山東昌邑縣蠹役劉占沅成案稟請就地正法

爲懲一儆百之計除擬訂各章分飭各該書役遵守並將地方

應興應革事宜次第查明認真辦理外所有卑縣書差積弊過

甚現擬設法整頓緣由理合將現訂章程開具清摺稟懇

電核批示祇遵

謹將整頓卑縣書差積弊擬訂詳細章程二十六條呈請

鑒核

一各房應將案卷自光緒元年起順依年月挨次編號各歸各檔不准稍有遺漏

一戶房經書及各櫃書經徵錢糧應將日收銀錢逐日登簿提繳儲庫由庫書將提簿送核過硃截存串根另由比書照日收紅簿挨戶銷比如有挪移贍用等弊立即重究

一招房向有頭班二班之分應分單日爲頭班值日雙日爲二班值日則分日辦公庶免積前壓後之弊其錄寫供招均應照供直書如敢故爲增減字句查出重究

一代書另行考取誠實之人充當不准各房書吏清書兼充

一呈詞當堂批判批准後傳票卽日簽稿并送核閱印發批准
查理之件本日送稿第二日送簽當堂標發均不得逾三日
之限違則查究所有歷前任買快買慢名目永遠革除

一詞訟案件批准後由各房經承列簿登記俟月底將已結若
干起未結若干起已傳未到若干起分別開單呈覽以憑查
核比催

一各房繕寫文件字畫均須端楷不准潦草錯落

一各書不准引人進署偷閱案卷更不得將案卷攜歸私寓如
有前項情弊查出究革

一各書沾染烟癖者甚多業經查驗並將姓名榜示立定期
責令戒斷如限滿不能戒除者卽行斥革仍將承辦缺務簽

點他書接辦

一各房經書清書凡當差勤慎半年無過者酌量給予獎勵
一各班差役每班定爲總役五名頭役十名外酌留散役數名
以供奔走其餘老弱無能烟癮甚重者悉予裁汰

一各班向有管帳名目應卽永遠革除凡管帳向所承辦之事
如支應各項差使長解短解人犯協緝命盜案及招解各犯
護送錢糧餉鞘迎送往來過境雜差悉歸殍首辦理永不准
私用管賬藉端訛索鄉民

一各班總役均有承催錢糧雜稅之責仍照舊例頭二快管正
東路東北路正北路頭二壯管正南路東南路頭二皂管正
西路西北路西南路惟各役應催花戶鄉莊均於每年正月

開印前當堂掣籤一年一更換以免種種流弊

一各路應催地丁雜稅名目甚多若全責成卯首一人其勢實難兼顧除烟酒稅斗捐應專責成卯首承催外餘如車馬牙帖課租祭品等事卽由第二名第三名第四名第五名各役分任其責協同卯首催辦以免曠誤另立款目清冊存署備查永遠革除老總名目

一各班總役頭役均按照外簿名次輪流值日五日爲一班不准再分單月雙月如初一至初五爲皂快壯頭班值日者初六至初十卽爲二班皂快壯值日餘均以此類推凡有命盜案件及鬪毆扭稟喊控者均歸值日差承辦仍照舊分路辦理不得稍有爭執惟命盜案件應以坐日爲准不以到日爲

憑以免規避推諉如初五日所出之案初七日始來縣呈報
此案仍應歸初五日值日差承票初七日值日差不得爭行
一詞訟雜案傳提人證無論戶婚田土錢債帳項家務爭繼各
事均聽本官酌差不准仍前把持分路承票

一命盜重案雖由值日差承票辦理仍應派卯首協緝凡招解
人犯時亦應由卯首協同辦理以昭慎重而免疏虞

一捕班各役及四鄉路捕遵章全行裁汰擇其年力精壯者分
撥各班補充頭役其疲癯殘疾沈迷烟窟者悉予斥革遣去
聽其別尋生業免害良民

一每案派差一人限期傳到不准多人隨往如敢再蹈從前惡
習一案而下鄉十餘人肆意詐擾無論有無告發之人一經

查出卽遵照

升撫憲陳通飭將該原差立斃杖下餘亦從重究懲

一總役有經手正雜賦稅銀錢重任均應取具殷實鋪保並由各該班總役連環互保以防脫空虧挪潛逃避匿諸弊

一各役承奉差票如有依限傳齊至十案者卽予記功一次積功三次記名提升遇有空缺先儘記名勞績最多者升補以昭公允其有玩誤公事者輕則降卯重則責革

一差查事件量路途遠近依限回縣稟復其有逾限不復者卽開單送比嚴比正身不准再如從前由走堂差役代比以示儆戒

一在卯各役悉歸外首約束入外時應由外首具保承充如有

向人訛索被控者訊實後除將本人革究外仍將該外首保人並究

一在班各役非著有勞績記名提升者不得憑空提升總役外首當差無誤亦不得輕予更換如外首實有事故缺出應卽以第二名挨次提升不准再沿從前越次標賞簽點老總陋習以期正本清源

一凡值班各役均應親身在署伺候仍酌派散役數名以供奔走不准再有走堂名目

一各班散役悉附在外簿之後遇有頭役空缺卽於散役中擇其積功較多者升補各項差遣永不准僱用白役

以上各條委因卑縣書差積弊過甚民間不堪其擾不得

不急爲改章以紓民困如有未盡事宜容再隨時體察情
形詳細稟陳合併聲明

裁革捕役並四鄉路捕認真籌辦巡警稟

敬稟者竊查_卑縣差役之惡其最著名者如宋道奎熊國福均
經先後提府訊辦其次者亦經_{卑職}隨時隨事從嚴究懲近已
稍知斂跡然訪聞捕役一班其兇惡有較他役爲尤甚者其平
日在署當差遇有竊盜之案十不獲一而藉端訛詐良民則時
有所聞迨官爲審明昭雪而被累之家早已不堪聞問言之可
爲寒心四鄉則由該役等分設路捕推原設立路捕之意原以
鄉間鼠竊狗偷藉資巡緝立法未爲不善乃日久弊生保民者
轉而擾民平時包賭窩娼恣行鄉里往往其地本不敢聚賭也

有路捕則招之使賭其地本不能容盜賊也有路捕則轉招盜賊以爲收受規費地步且聞殷實良民時有因不遂所欲反令竊賊誣扳者卑職前於七月間因公下鄉訪明源潭鎮路捕田光發有私刑拷掠嚇詐錢文情事當於是晚出其不意改裝易服親至該路捕廝所起獲私刑鐵串木根並將路捕拿獲訊辦擬俟招告審實再行另稟從重辦理並將四鄉路捕先行出示曉諭永遠禁革不准再有路捕名目惟查該路捕本非由官選充悉係鄉間無賴之徒拜捕役爲師私充該鄉路捕官無列名簿册可稽防範尤爲不易若革除路捕而仍留捕役則本根未淨將來不免故態復萌現奉巡警新章飭屬酌裁壯捕各役增設巡警擬卽遵章先將捕役悉行裁革擇其年力精壯辦事謹

願者數人附入快班選充罪犯習藝所看役卽以裁存捕役工
食留支該看役薪工一面由卑職於四鄉認真籌辦巡警以衛
閭閻而靖地方所有裁併捕役並永遠革除四鄉路捕情形理
合附稟

查核示遵

禁止紳民製送德政碑匾牌傘示

爲牌示事照得地方紳民製送現任官德政碑萬民傘及脫靴
諸事久干例禁載在乾隆四十九年通行條例凡我官紳自宜
兢兢懷刑互相遵守乃昨據城關及源潭鎮各紳商來縣餽送
牌傘及匾額各件接見之下莫名愧悚本擬當面辭却無如陋
俗相沿習非成是不以送者爲非分轉以却者爲矯情祇得膺

澳依阿遷就苟受初心自問實有未安蓋州縣爲親民之官無
倦先勞皆屬應盡之職務方虞尤悔之未寡有何功德之可言
况本縣來宰是邦閱時未久興養興教志逮未能謹責雖弗及
身衾影已多負疚乃受此無名報稱未免益增汗顏值此新政
待舉籌款維艱何必以有用銀錢作此無益舉動如果功德在
民確有善政可紀他年食報公論自在人心如或糺政多端長
民無德瓜期受代舉凡牌傘碑匾之屬適皆授人指摘之端諸
紳見理素明似宜愛之以德慎勿以非義浼我徒遺臭於萬年
也敢述私悰用申公約嗣後各鄉集鎮紳首如有仍沿舊習擬
製牌傘各物見遺者務卽代達鄙意希將應費之款牌匾各價
計該若干全數送入師範學堂交管理員查收專作修造講堂

之用仍希將出錢各戶花名開明清單呈縣俾於講堂彙總勒石以彰美舉本縣將於此覘各鄉紳民感情焉設有不敷卽由本縣捐廉以足成之庶以地方之錢仍歸地方公用藉副本縣育才興學之苦心則一舉而兩善備是尤一瓣心香所爲謹爇者也如再積習未除無端花費則是以俗吏視我惟有卻諸門外對衆火焚免污歸裝俾完素履幸共諒之切切特示

奉查縣境關河要塞節略

唐縣唐虞三代屬豫州按禹貢荆河惟豫州唐縣在河南荆北故屬豫州周曰謝城按方輿紀要謝城在湖陽北又荊州記棘陽東北百里有謝城今唐縣城南四十里南古城卽古謝城故址春秋時曰蓼國曰唐國均屬楚春秋大事表蓼國在唐縣南

八十里查古蓼國在今唐縣南八十里蓼山之陽春秋定公五年左傳子蒲子朝滅唐杜預注唐曰其地在義陽安昌縣東南上唐鄉又前漢書地理志注曰上唐鄉故唐國在春陵屬南陽郡今之唐縣城雖非唐國故址而地實不遠後漢三國晉宋隋均曰比陽班書地理志開皇五年改顯州爲郡領比陽今唐縣城東二十里東古城卽比陽城遺跡唐曰顯州新唐書地理志比陽本淮安郡武德四年曰顯州宋金元均曰唐州宋史地理志唐州淮安郡建隆元年爲團練金史唐州領四縣正裕元年廢湖陽爲鎮元史唐州復置湖陽縣至元三年廢湖陽泌陽桐柏三縣並入唐州明曰唐縣明史地理志洪武三年以故比陽縣地置唐州

國朝因之屬南陽府現據城內古塼宋鐘元碑考之自唐至今
曰顯州曰唐州曰唐縣名雖屢更今唐縣卽其地也

唐縣境內有扼要關塞二處一在縣東北一百四十里曰石門
關土人呼之曰石口由山澗行走路甚險要其山自裕州北分
水嶺七峯山層巒疊障自西而東而南與桐柏縣之大復山相
連由縣之正北方環達東南方凡自舞陽葉縣西南來者必經
此山是爲唐縣東北扼要處然不僅爲唐縣扼要亦省城西南
四百餘里之大關口也一在縣東南八十里張博士店兩山相
夾寬窄一二里不等中有丑河河流自南而北路由丑河兩岸
往來其最險處長二十餘里張博士店南北十餘里蜿蜒綿亘
多山多澗有砦有砦洵天然伏兵屯糧之地凡自湖北省棗陽

隨州等處東南一帶來唐縣者均不能越此而過蓋其地四面皆山由桐柏縣大復山連峯接岫西南至本境內之石柱山四方山又西至馬武山大王山紫玉牛光平山獅子山花山蓼山白玉山及諸小山約計百有二三十里是爲鄂豫兩省往來孔道亦卽唐縣東南扼要處也他皆偏僻小路無關行軍姑從其略云

唐縣非驛站通衢祇有額設鋪遞陸路上站北至南陽縣之賒旗鎮九十里西至南陽縣一百一十里下站東至泌陽縣城一百一十里南至湖北省棗陽縣城一百四十里

水道唐河上站通源潭鎮二十五里通賒旗鎮九十里下站通郭灘六十里通蒼苔九十里

唐河河流凡十二道源出自外縣者凡八曰泚河曰泌河曰石
河曰砥河曰三峽河曰丑河曰桐河曰唐河源出自境內者凡
四曰土橋河曰綿延河曰清水河曰蓼陽河唐河係幹河十一
道皆支河除桐河泌河三峽河夏月水盛時尙能通行舟楫餘
皆水僅沒踝惟唐河則常年通行舟楫也其源有二一出裕州
城北二十五里七峯山下曰潘河一出裕州西北六十里酈山
南曰趙河潘河南流八十里趙河東南流百二三十里均至南
裕交界之賒旗鎮至此始通舟楫東二水會同南流十五里至
埠口鎮東北始入唐縣境內又南二十七里至戈家新集又南
二十五里至源潭鎮西源潭之上游曰趙河按源潭係唐縣境
內水陸聚會之大鎮也又南二里過泚河泌河始名唐河又西

南二十三里至縣城西關過桐河按西關亦水陸聚會處也以上均唐河上游經行處其下游則西南十三里過三峽河又西南二十里至上屯鎮西過清水河又西南三十里至郭灘鎮又西南二十九里過蓼陽河又南五里至蒼苔鎮北出唐境又西南七十里至湖北襄陽縣屬之雙溝鎮南會涓水又西南四十里至就坑鎮入於漢

唐縣東距汝甯府確山縣屬駐馬店火車站二百九十里額設營汛三處一在縣城內一在源潭鎮一在湖陽鎮城內額設城守把總一員光緒三十二年奉文裁撤將源潭鎮額設經制外委一員於光緒三十三年奉文移駐城內改爲墩堡設汛弁一名存餘兵四名

湖陽鎮墩堡汛弁一名餘兵四名

豫南營兩哨駐紮縣屬湖陽鎮係南鎮撥駐現奉文調駐內鄉縣境不臨大道並無墩防關隘理合登明

動用學田秋季稞租移修學宮稟

敬稟者竊查_卑縣教諭陳簡蒙

撫憲批飭勒休其教諭一缺應否以訓導轉補之處批由

藩憲查例具詳學田稞租准撥歸勸學所應用_{卑職}遵卽調查

正學共田六百七十七畝五分每年約收租錢五百千之譜按

麥秋二季分繳本年春季稞租已由教諭陳簡悉數收用秋季

稞租當可收錢二百數十千查_卑縣教諭一缺是否以訓導轉

補抑係另行選補現尙未奉飭知勸學所總董沈兆慶等業經

斥革亦未選充有人所有學田秋季稞租虛懸無用查卑縣學宮年久失修所有

大成殿前檐丹墀月臺敬壹亭東西兩廡先賢祠櫺星門戟門各處牆壁屋宇間有傾頽上漏旁穿亟應修理

孔子升爲大祀自當輪奐常新若一任損壞不治非特守土者之恥抑亦無以肅觀瞻而崇

聖教卑縣地瘠民貧數年來舉行新政凡地方可籌之款靡不涓滴歸公搜羅殆盡實無大宗可籌的款卑職到任未久民信

未孚籌捐更非易易擬請卽將此項學田秋租二百餘千作爲修理學宮之用已於七月十二日擇吉動工諭飭紳董候選縣

丞段成勳收支照料一切卑職仍不時親臨監視督飭樽節核

實動用斷不敢稍事虛糜統俟工竣後將所用各款另行詳細造册報明不敷之處卽由_{卑職}捐廉籌補查_卑縣正學學田六百數十餘畝從前每年所收稞錢不足三百千細察其由蓋皆稞戶領田另行招佃佃種稞租大半爲稞戶乾沒中飽現經_{卑職}整頓清釐不令稞戶經手卽責成佃戶徑自領田納稞由租頭白凌雲按戶承催仍按麥秋二季呈繳稞戶悉數革除所收款項較前幾多一倍將來如蒙

藩憲議定將此缺裁撤或以訓導轉補擬以此項地畝一半爲勸學所經費一半作爲_卑縣調查局之用如仍委員署理卽爲該署員津貼之需調查局另行籌款開辦合併聲明所有擬將_卑縣學田秋季稞租移修學宮緣由理合稟請

鑒核批示祇遵

增訂民間典賣房地章程釐剔庫戶各書稅契過割積弊
以清訟源稟

敬稟者竊查

卑

縣訟獄之繁甲於他屬

卑職

自六月到任以來

留心考察固由民情刁悍書差訟棍勾串爲奸而一切法度凌

夷民間無所遵守實爲肇訟之本前經嚴懲訟棍釐剔書差積

弊業將辦理情形先後稟明在案迄今數月經

卑職

執法以繩

人稍守分向之每告期狀紙百數十起者近祇四五十起而此

四五十起呈狀中則以典賣田房者居其大半緣

卑

縣置買房

地之戶率皆吝惜小費匿不稅契業主廉得其情卽藉端要挾

百計串訛或一地兩賣後買者爭先稅契彼此狡賴不清或估

段成交不註明地畝弓尺但約計其畝數後卽控爭畧址其尤甚者兌價立契後既不將上有老契查交現業存執而原業子孫轉執老契以糾纏又不將分單批註明晰而近房子弟輒執分單以爭論迨涉訟到官呈驗契據真僞難分竟致莫可究詰至典當房地則尤唐邑俗例當地無一定年限契內註明錢到取贖而地畝大率以八當十其實地僅八畝契內則寫明十畝及至回贖時業主平正者則原典原贖各無異言其有無賴之徒或本人已故而子孫刁狡者則藉口地畝短少與契不符任意纏訟且贖業毫無憑據執照往往隔手取贖或房族冒認向贖嗣爲本業主查悉爭訟不休亦有執錢到取贖字據趁麥秋成熟之時爭收禾稼備價強贖者更有因禾稼將熟以地轉當

他人承當之戶見有禾稼可收遂允多增地價者由是兩造互爭強割禾稼逞兇糾毆枝節橫生而強割田禾時各持鎌刀在手尤易釀成命案凡此種種糾葛要皆爲書差訟棍所樂得之罅隙而卽實爲鄉農業戶興訟獄之禍胎若不明定章程力圖補救匪特詞訟之繁無由清理而民命之死尤多無辜卑職忝爲民牧責在保民目擊心傷難安寢食現特體察地方情形擬訂民間典賣房地章程十二條諭飭城鄉各集鎮首事地保人等以後置買產業均令首先查明此產是否祖遺自置以印契分單爲憑悉用官弓憑中三面丈量註明四至畛段及房屋間數其溝渠水道出路樹木均各分別書明立時投稅過割以杜後患至典當房地亦飭明定回贖限期由現業寫立回贖文約

給與出當之戶存執無論遠近房族凡無回贖文約者不得兌
價放贖以杜隔手冒贖之弊並將庫書壓摺稅契及戶書勒訛
過割錢文諸弊逐一釐剔嚴訂條規俾各有所遵循除出示曉
諭並分別諭飭遵照外如有未盡事宜再由 卑職 隨時釐訂限
期痛除積習以清訟源藉以仰副

憲台軫念民生息事甯人之至意所有擬訂各項章程條規及
示諭各稿理合開具清摺稟呈

鑒核俯賜批示祇遵實爲公便再此案如蒙批准擬由 卑職 捐
廉勒石署前俾免日久廢墜合併聲明

附章程

一文契投稅應定期限以免延擱也凡置買房地之戶務於立

契一月內來縣投稅過期卽以匿稅論傳案訊追至庫書於花戶投稅後立卽報印仍以十日爲一報期如十一月初十日以前投稅之契該房應於十一日報印至遲不得逾十日之限一俟將契尾填註印發立交業戶携回以投稅之日至交契之日統以一個月爲限以示限制

一報稅繳錢應給庫收以杜冒領也凡花戶赴房投稅由房書按照約內所書價值算明應交稅款捐輸等項錢若干由庫房先給庫收一紙註明某月某日收到某人白契一張價銀若干稅款捐輸等項錢文若干此項錢文應於庫收註明花戶投稅時卽應交足不准稍有帶欠庫收交由花戶收執取契時卽執此爲憑俾有查考且杜冒領諸弊

一報稅庫收應刊三聯以資稽考也投稅之戶雖取有庫收而署內毫無覺察仍恐中有弊竇應仿照錢糧串票辦法刊刷三聯收照一庫收隨時由庫書填清交由花戶收執取契時卽持此爲憑如報稅過一月之期尙未給發印約者卽是庫書捺攔而未報印許業戶粘呈庫收來案稟明立提該書究辦二比對由庫房每日送交署內以資稽考三存查由房自行備照

一更名過割應定限制以免訛索也凡花戶過一新糧名無論房地多寡凡應完糧銀一兩以下者給戶書紙筆費錢五百文一兩以上每多銀一兩加錢二百文以此遞推其更換一老糧名或因分家各將老糧名分完數新名者每一名給紙

筆費錢二百文此外不准多收分毫仍責成該戶書將過割花戶名下註明地在何處距城若干里以憑查核如有再行勒索情弊許予花戶指控立時提究決不寬貸

以上章程四條係就唐邑地方情形酌定於剔除積弊之中仍寓體恤辦公之意務各遵守辦理毋稍違犯自取咎戾切切此諭

附告示

爲出示曉諭事照得民間置買房地例應隨時投稅更立新名過割錢糧不容稍有遲緩乃本縣到任以來詳加體察凡立契投稅者率由庫書捺攔藉口於稅錢尙未交清挪前壓後以致遲逾數月甚或經年而不將印契交給稅戶者稅戶以投稅取

契之難遂亦相率隱匿若不從嚴整頓不惟於稅銀大有關礙亦復不成事體至各鄉錢糧延不過割則悉由戶書肆行勒索過一新糧有需索至數兩十數兩者更一糧名亦有勒索多錢者故各鄉花戶咸視過割爲畏途多不照章過割以致百餘年之老糧名相傳遺留種種糾葛成訟而戶書上下其手之弊遂於此中生之閭閻不堪其累雖前經訂章清釐當賣房地各條出示曉諭而本根未淨恐仍徒託空言應再將稅契過割章程妥爲明訂俾資遵守除諭飭各書遵照外合行出示曉諭爲此示仰閭邑花戶人等知悉自示之後爾等遇有置買田房應卽隨時投稅過割務各查照新訂章程辦理毋得復受欺朦及匿契不稅自貽伊戚是爲至要該房書等亦當奉公守法痛改前

非倘敢仍前侵挪勒索者許予花戶指名喊控定卽提案革究
決不寬貸其各懷遵毋違切切特示

計開

一民間置買房地凡係絕賣者應查明業主此產是否祖遺抑
係自置均以印契爲憑如無印契者卽以分單歷年完糧串
票爲憑其無憑據者不得貪圖賤價受賣致貽後累

一置買房地如係淨戶應將上首原業契據批銷與原立之契

一併交由現業存執如劈賣者應將原業印契內批註明斷
某年價賣某人若干如無印契者卽批註分單以免日後爭
執

一絕賣房地宅基無論地若干畝房若干間均應由買戶賣戶

憑同中人鄉約三面丈量註明弓尺四至畛段及房屋間數
不得稍有遺漏其溝渠水道出路樹木尤應分別註明毋任
含混

一田地房基有曾經典當在外現由業主用價贖回轉賣者應
先將當契憑同鄉約批銷再立賣契此項批銷之當契應統
交現業收存以憑查考

一置買房地立契後卽應赴庫投稅仍由原業寫立過糧文約
一紙交由現業親赴戶房更名過割如現業延不過割仍沿
舊名完糧查出罰究並許原業指名呈控以防隱匿

一房地立契成交應卽填用官契紙卷中隨時兌價其交地騰
房限期至多不得逾一個月遲則押讓不准再循舊例先寫

草約後淨大約致生種種糾葛其契價銀兩則以唐平爲準

錢用九九制錢不得以低銀私錢任意折扣致肇訟瑞

如原業用

有佃戶借頭錢文卽在正價內扣除過佃耕種免後爭論

一鄉約丈量地畝房屋悉遵工部營造尺在縣請領官弓給發應用不准擅用私弓致生弊端其丈費每地一畝給錢三十文每房一間給錢二十文賣戶出其三買戶出其七不准多取分文如鄉約藉端需索准卽稟究

一典當房地以十年爲限如逾十年原業無力回贖者應換立賣契投稅不准再四附價藉隱稅銀其當後未滿三年限期原業備價回贖者應遵趙前縣定章由原業照認當稅銀兩不容絲毫短少

一典當房地由原業書立典契交當戶收執仍由當戶另立回贖文約交原業收執均於成交兌價時將兩約疊成書寫騎縫字樣以便回贖時核對無論遠近房族子孫凡無回贖文約者均不准附價取贖以免妄起爭端

一唐邑俗例有銀到取贖之說以致搶割禾苗鬪毆釀命訟案紛紛今應一律禁止無論當買宅基地畝麥以十月至清明爲限秫谷以五月至小暑爲限豆稻紅薯雜糧以五月至立秋爲限凡在限內兌價立契者應由買戶收割若至限外兌價所得禾稼盡歸賣戶與佃分收永著爲令不准爭執

一典當田地亦應逐段丈量契內註明弓尺四至不准再沿舊例估段成交以八當十種種陋習凡有地一畝出當一畝如

再虛報畝數寫立契內查出將地充公

一典當房地每年應完忙銀不准貼給原業錢文致該原業將錢花用虧欠正賦應於立契時議明在某保某名下分完銀若干寫立字據由當戶自封投櫃完納截取櫃條存查一面由櫃書在櫃冊內將花戶某名下註明已由某代完若干俟原業完糧時如數劃除以免虧欠

以上十二條專爲挽回積弊藉清訟源將來如有應需改良之處再行妥議增訂合先聲明

修改高等小學堂講堂增築操場清釐學款力除積弊稟
敬稟者竊照_卑縣高等小學堂係就葆粹書院改設開辦已將四載祇以原定章程未盡妥善管理員紳不得其人因之肄業

各生非特功課未能認真且多不就範圍講堂既未合格操場
 亦付闕如外表固無可觀內容尤形腐敗加以堂地稞租半歸
 中飽經理收支弊端百出如此而欲培養人才擴張學界是誠
 憂憂乎其難矣本年夏間卑職奉委權理縣篆到任後廉悉情
 形卽以整頓該學堂為當務之急隨會同堂內各員於暑假滿
 後先將到堂各生大加淘汰凡年齡過長及習氣不純者均予
 照章開除又廣額十名一併招考選補足數定期開學認真授
 課並擬將管理教授收支庶務諸事妥定章程整頓改良一面
 清查堂地革除包租名目以清積弊業將辦理情形及學堂存
 款地畝收租各數先行開摺稟陳憲鑒查該學堂內原設講
 堂係書院廳房所改年久失修牆壁欹斜情形頗為危險而窗

櫺空敞傳聲不易細較光線亦有不合講台則距學生座位後層過遠黑板演草目力難及是非全行拆卸重新修改不適於用隨經督飭紳士李海嶼核實估計鳩集工夫先將舊堂拆卸一面添購新料查照學堂成式另修講堂五間門窗期於合格光線一律較準講台各生座位亦皆位置適宜並因原有廁房近在講堂之側亦於衛生大有妨礙一併拆去另於大門東偏添修廁所至於操場卽以庫書場上林報効學堂市宅一所改造地尙寬敞足敷應用當飭小夫將地修墊平坦並於後樓三間修飾留爲附設教育會員紳聚議公所另置桌凳板床多件均於十月二十八日一律工竣所用工料錢文除杜仁山捐助學堂經費銀三百兩外下餘皆動用學堂租息報經

卑職親詣

驗收委屬工堅料實款無虛冒所有工料各項錢文細數容另
造冊備文報查此修改講堂操場厠房及添置桌凳板床之情
形也卑前任趙倅師彙移交學生名冊雖有四十二人之數而
實在到堂肄業者不過二十餘名餘皆久不到堂卽在堂各生
亦復年齡參差程度不一且於上堂聽講自習會食休息請假
等事亦多秩序紊亂限制毫無甚至不遵約束行動舉止筆難
縷述卑職特於淘汰選補之後復經悉心斟酌擬定各項規則
分別書牌懸示各堂俾各員有所遵守學生咸知警惕前蒙提
學司委派劉廷錫到縣充膺堂長當與商明破除情面遵章辦
理如學生中仍有違章妄爲情事輕則記過重則開除仍照章
追繳學費並由卑職不時親往查察該堂長教員等於管理授

課一切均尚照章辦理而肄業各生遂亦漸就範圍半載以來
學業較有進步放假後經卑職會同各員逐科考試各生分
數皆能及格惟新班學生甚多夾雜一堂教授頗形不便擬俟
明歲再添招新生十名連原有各生共足六十名之額仍將會
食廳前北屋三間改成講堂卽將新舊各生分爲兩班分堂授
課免致程度不齊此整頓學生改良辦理之情形也學堂地畝
原有三十餘頃歲收租錢祇一千四百餘千定租甚輕推其原
因蓋此項堂地多由紳士承領包租並不自行耕種率皆另外
招佃平分麥秋而每年所繳包租不過十之三四強半歸於私
囊當此振興學務籌款維艱之際與其別事搜求未必有濟何
如剔除中飽還之公家是以卑職前經稟明擬將各地清出革

除包租名目徑由種戶承領租繳學堂一切直接以除積弊而裕公款前經分飭妥差按照各地坐落逐細清查當於查明後先飭裸戶退地復傳種戶承領惟是地有三十餘頃之多坐落不一清查殊難且該裸戶等坐享其利相沿已久今概勒令退交幾等剝膚則刁徒之造言煽惑劣紳之把持阻撓在所不免然卑職持之甚力隨事秉公澈底根究決不稍存顧忌故該裸戶等計無所施只得將地陸續退出分交種戶當堂認領重定地租發給印照仍按名註冊備查業已一律蒞事多年積弊一旦廓清紳民人等幸均翕然安服統計堂地三十四頃十二畝現定歲收租錢共二千一百九十六千七百文較從前原收租錢增出七百十千零九百文之多似於學款不無裨益至此次

重定地租較民間平分麥秋之數祇及十之七八因係按季包繳無論年歲豐歉均應照完不得不格外從輕故各種戶無不樂於從事並未稍有抑勒此清釐學堂地畝改稞租爲領種增益學款永除積弊之情形也學堂地畝既有三十餘頃存款本銀又有二千餘兩卽以從前包租計歲收租錢一千四百餘千息銀三百餘兩經費已不爲不充而學生已改自費教習管理及堂長諸執事亦祇教員常年出款何能用至二千串有奇其中侵蝕浮濫不問可知庶務兼會計員附生秦華觀經管收支頗滋物議且聞有盜用學款私典馮景川田地之說前經卑職調閱收支各帳其中複出濫支之款不勝枚舉約計乾沒公款五百餘千初向該生逐款詰詢乃竟一味支吾卑職復於帳內

不符之處一一簽出移委訓導蔡常松並札典史顧堯錫親往學堂與該生三面清算詎該生始而推延繼而躲避差傳未到逃匿無踪其弟秦瑤峯出爲清理認包繳還學堂錢四百千文僅由慶興永錢店代繳錢一百千餘仍推延不繳現聞該生潛匿省城吳勝角萬靈堂藥鋪並有砌詞上控之說已由

卑職附

稟請飭查傳押發追繳以重公款而儆效尤至該堂庶務兼會

計員業經另選馮紳雲異接辦並由

卑職

將堂內歲出各款逐

加釐定濫支者刪除浮出者核減可省者撙節另列常年出入預計表發堂查照辦理以後按表開支如有特別用項必須先請縣示然後支用不准私動分文總期入欸則涓滴歸公出項則盡屬實用庶免復蹈從前浮濫侵蝕之轍統計學欸出入每

年約可餘錢一千餘串擬請以之分撥城鄉添辦各小學堂藉資擴充學界此清厘收支款歸實用餘錢添辦各小學堂之情形也總之卑職於以上各節不憚煩勞不避嫌怨竭數月之心力始克整頓就緒實已煞費經營以後管理收支諸事但能查照所定規則計表認真從事則秩序井然當不至紊亂弊混一如往昔則該學堂可望日有起色然而有治法尤貴有治人全在力行方收實效卑職身任地方興學除弊責無旁貸惟有隨時嚴查會督堂內各員照章切實辦理以期仰副作育人才之至意決不敢空言徒託有始鮮終致負委任所有卑職修改高等小學堂整頓管理研究改良清厘學款力除積弊辦理各情形是否有當理合將酌定各項規則預計出入款表分繕表摺

稟呈

鑒核訓示祇遵再堂內舊班學生雖尙有二十餘名而其中在堂內肄業實足四年者不過三四人且因初辦學科未全以致程度未合畢業之格擬飭來歲再補習一學期俟放暑假時察看各生造詣何如再請考辦畢業其餘各生皆係歷年陸續選補應俟扣滿肄業學年分別辦理合併聲明

改良師範傳習所預算經費酌予變通年限稟

附單

敬稟者竊_卑縣僻處偏隅風氣悶塞城鄉初級各小學堂雖已開辦數年率皆有名無實_{卑職}抵任後當按表列各堂逐一查考學生則寥落數名有長有少課程則參差不一或舊或新管理既未得人經費又無的欸以故內容表面無一可觀推其受

病之由皆緣創辦之初有學無師悉沿私塾陋習自爲風氣若不亟爲設法銳意改良卽再越數年亦絕無成效之可觀

卑職

現就地方情形詳加體察惟有用急則治標之法首先造就師資查卑縣師範傳習所經卑前縣趙倅師勳於本年春間籌款開辦事屬創始既未明定章程而一切形式尤多缺略且用人未當口實時貽以致在堂諸生風潮迭起上課月餘卽放暑假更無學級之可言卑職現於暑假後特將各生重行面試其中勤學好修者固不乏人而氣習囂張志不在學者實亦不少當卽大爲釐剔其有不堪造就者悉予開除原定學額儘三十名似形減少將來各村鎮遍立小學特恐分布不開因於舊生之外復招新生先後增足四十名額數以二十名爲正額循舊官

費以二十名爲副額改作半費均於七月二十六日送所肄業
兩月以來各生頗知奮勉努力潛修惟該所教員僅止兩人分
任十餘門科學勢實難精討論若添聘教員共擔職務又以經
費支絀力有未能因思正教員劉克昌兼充堂長每月於薪水
十八兩之外另支堂長薪銀十二兩可否將該教員堂長一差
作爲義務不另支薪卽以騰出薪銀再增數金另聘教員一人
以資分任如此一轉移間經費不必多籌而教授轉多獲益在
劉教員熱心學界當不致較及區區也除俟奉准再行稟請派
員到縣一面先由卑職商同該兩教員遵章按照科學認真講
授統俟年終期考再行察看情形另稟請示辦理外所有整頓
卑縣師範傳習所查照部章參酌本地現在情形略予變通暫

以一年兩學期爲速成畢業緣由是否有當理合將擬定各項章程並常年出入預計表開具清摺呈請

鑒核批示祇遵再該所常年經費儘恃斗捐契尾歸公兩項每年收錢一千一百餘千而常年出款力求撙節並將學生操衣靴帽暨逐日膳寫功課紙張改由自費以及開學散學並教員學生過節酒席種種糜費一概刪減計仍需錢一千九百餘千文約不敷錢八百餘千之譜應由卑職隨時籌措設法彌補擬俟風氣稍開卽以明年正月爲始飭將學生膳費一項無論正額副額一律改收半費藉紓財力可否准行 訓示飭遵

附另單

敬再稟者竊查卑前縣趙倅師勳創辦師範傳習所未曾明定

章程任聽革生沈繼志等主持將學生膳費定爲官費半費其餘各項開支亦復浮費異常不獨財力後難爲繼且與部章不符卑職接辦後亟擬改良祇以卑縣士習囂張鮮知自重若操之過急利未必見而害先乘之不得已先將教習學生烟茶紙張及酒席各項種種糜費量爲裁減而膳費悉仍其舊雖本年進款入不敷出亦祇得勉爲其難設法賠補以開風氣之先然長此賠墊勢難垂諸久遠思維至再惟有懇乞 憲台俯鑒下情准予批飭自光緒三十五年正月爲始一律改爲自費卽可將騰出公款多設蒙小學堂其私塾蒙師亦應遵章改良凡未入傳習所肄業者不得擅自收徒開學授課致與科學兩歧雖明知如此辦法未必遽能一蹴而幾然果能明奉 憲批雷霆

一震再由卑職體察情形曲予變通似可收事半功倍之效緣

邑學務歷前任均未留意徒以一紙空文付諸士紳而士紳則各懷自私自利之見置公理公益於不顧用是不堪腐敗著手尤難現雖竭力圖維將來能否稍收功效尙難自信惟有先將實在情形縷晰附陳伏乞

鑒原無任悚惶之至

高等小學堂會計員秦華觀侵吞學款潛逃擬將該員房

地封存備抵稟

敬稟者卑縣高等小學堂庶務兼會計員附生秦華觀素不安

分卑前縣趙倅師黻因其爭辦學務纏訟不休畏其種種刁難

特爲收服諭飭經管學堂事務卑職到任後接見數次雖審識

其爲人祇以甫經到任情形不熟一切款項均在該生之手且黨羽衆多亦未解散實未便操切從事因特加以禮貌以冀徐革非心乃貪詐性成收支不及一年竟敢侵蝕公款至五百餘千之多並敢以之典當馮景川田地不畏人言實屬胆大妄爲一切情形已於正稟詳陳茲不重贅該生久匿無踪其弟秦瑤峯出爲清理邀同教育會長內閣中書楊紳治清質算認包繳還學堂錢四百千文餘實無力設措求免追繳當以該生西關市房開張義合堂藥鋪房屋由魏嵩齡說合典當慶興永錢店借揭錢票分期照繳乃僅繳錢一百千文之後該生卽寄信回縣密串該藥鋪不與慶興永過租意圖坑騙該錢店以致票不照兌款仍虛懸因思學堂公款絲毫爲重豈容任意乾沒逞刁

抗延近又有魏光裕堂段連陞等呈控秦華觀經收學租錢文收多報少各案亦須該生到案質訊確算查該生現匿省城吳勝角萬靈堂藥鋪並有飾詞上控之說應請札飭詳符縣查傳該生秦華觀到案押發回縣以便訊明分別追繳照例究辦實爲公便再該生前以學款私典馮景川田地及義合堂藥鋪市房現均未動該生狡黠非常如任其拖延日久難保不私行變價脫身遠颺恐公款終歸無着可否先將此兩項田房封存備抵並將該生秦華觀暫行註劣以觀後效之處仍候鈞示祇遵

查復附生秦華觀上控蠹書舞弊貪委勒包稟

敬稟者案蒙

提學憲札據

卑

縣附生秦華觀稟控蠹吏舞弊貪委勒包等情

一案飭卽澈查實稟以憑核轉等因蒙此遵查 卑縣高等小學堂管理收支初未釐定規則出入各款亦未預計列表開支漫無限制簿冊亦不完全以致經手之人得以濫支浮出任意侵蝕故學堂腐敗竟至不堪名狀而會計一事人尤視爲利藪羣起而爭奪之該附生秦華觀本不安分經前署縣趙倅師黉派令管理收支蓋因其爭辦學務纏訟不休藉以爲收服之計并非擇賢任能也該生任事數月已多不實不盡去夏 卑職到任後卽有所聞當以甫經視事於該學堂情形弊端尙未澈知底蘊且學堂一切款項均在該生之手未便操切從事遽易他人因特嚴定修規加以禮貌以冀徐革非心詎該生貪詐性成仍

復肆意侵吞竟以學款挪爲他用並典當馮景川田地肥已

致物議沸騰當經卑職逐欸清釐隨調閱收支各帳細加勾稽

其中複出濫支及不實不盡之處不勝枚舉約計侵蝕公欸五

百餘千初向詰詢該生一味支吾復經卑職於賬內不符之處

一一簽出移委訓導蔡常松典史顧堯錫親往學堂與之查對

賬目三面清算該生始無可飾辯畏罪躲避差傳未獲其弟秦

瑤峯出爲清理邀同教育會長楊紳治清逐欸算明實不符錢

五百餘千無力全繳代認包還錢四百千文餘求免追當以該

生西關開設張義合藥鋪之市房由魏嵩齡說合當與慶興永

錢店借揭錢票分期照繳乃僅繳錢一百千文之後該生卽寄

信密串該藥鋪不與慶興永過租竟圖坑騙錢店以致票不照

兌至今款仍虛懸前聞該生潛匿省城並有飾詞上控之說業經稟請

臬憲飭傳押發並於整頓學堂稟內縷晰詳陳各在案奉飭前因遵經確切詳查該生所指永泰糧行移帳一節查無其事至所控禮書勾弊典史索賍各情更屬平空捏造無非藉詞聳控冀可抵制居心誠不可問伏查學堂公款爲培養人才之需絲毫爲重豈容監守自盜任意乾沒乃該生充膺會計未及一年竟致侵吞公款至五百餘千之多並敢典當田地不畏人言實爲害羣之馬有玷膠庠若不傳案勒追從嚴究懲何以重公款而儆效尤且近日又有魏光裕等多名控其經收學租收多報少及採購學堂用品欠帳不清各案必須該生到堂澈訊根究

除俟該生解到訊究具報外所有遵飭澈查情形理合據實稟請

鑒核俯賜據情轉稟飭傳押發歸案訊辦實爲公便

查明秦金峯卽秦華觀劣迹昭著請照章扣除選舉研究

所考名稟

敬稟者光緒三十四年十二月二十九日蒙 憲處札准

教育總會兼選舉研究所移開以選舉研究所已於十一月招生開學移送學生履歷清冊轉飭查照粘單內開唐縣趙鎮汴秦金峯等因蒙此遵查趙鎮汴一名人尙端謹前奉飭舉學習調查員時曾據邑紳公舉 卑職 當以額數已滿未能保送今既入所研究將來畢業回歸辦理調查選舉事宜可資臂助惟秦

金峯卽附生秦華觀又名秦先登其人平日好訟多事品復卑

鄙而貪

卑

前縣趙倅師鼐以其纏訟不休特派充

卑

縣高等小

學堂庶務兼會計員藉以羈縻乃到堂未及一載侵蝕公款竟

至五百餘千之多並以學款私典馮姓田地尤屬營私害公本

年夏間

卑職

調查學堂收支各賬其中複出濫支之款不勝枚

舉而冊報結存之錢又復虛懸無着當經逐款詰詢並派儒學

典史前往清查詎該生始而支吾推宕繼而躲匿無踪聞已潛

至省城節詞上控業經

卑職

將其劣跡據實通稟

各憲懇請押發回縣以憑追繳究辦乃該生竟又改易名字考

充選舉學生冀圖畢業回歸恃符塘抵復可干預地方公事居

心洵不可問

卑職

愚以爲諮議乃議院先聲選舉實立憲預備

關係至爲重大所有選用在事各項人員必須慎之於始方可終免流弊如任此等貪鄙營私之徒濫廁其間將來恐多僨事用敢不揣冒昧據實瀆陳可否仰乞 憲台俯賜移請

教育總會兼選舉研究所查明將秦金峯卽附生秦華觀卽扣除不准濫充選舉調查管理各項人員之處理合摘抄前稟該生侵吞學款劣跡稟呈

鑒核訓示祇遵

高等小學堂增設豫科暨城鄉各小學堂現已成立多處
遵式填表立案稟

敬稟者竊查 卑縣高等小學堂前經釐款整頓改訂章程並將講堂操場添砌平墊年餘以來規模粗具業將辦理情形先後

稟陳在案伏思學業精進端貴循途修士課功尤忌躐等高等雖立基礎若無初級小學以爲階梯究難收循序漸進之效然遽立初級若無高等豫科以爲接續亦恐有緩不濟急之虞况卑縣初級小學堂前僅興賢莊一處學生寥寥數名四鄉悉屬闕如尤爲無源之水涸可立待卑職於上年冬間悉心籌畫特於今正將高等小學堂增招新班作爲豫科學生現又於暑假後續招插班計先後考取豫科學生四十名連同舊班高等學生四十名共足八十名之額定章豫科補習初級功課一年再升高等此後均按年遞招統俟四年後初級小學堂畢業有人再將豫科停止以資賡續其初級小學則就城關之關帝廟舊衛庄文昌宮並西關崇實書院增設四處連同舊設之興賢莊

一處共爲五處以東西南北中分區不再沿用舊名西區崇寔書院舊址規模較大特設爲兩等均於正月間開學作爲試辦分派師範畢業生范銘心等照章教授以暑假後七月開學起爲第一學級以期劃一其四鄉則已就源潭上屯祁宜桐河曹堂羅漢寺大河屯澗嶺店石橋寺九處籌款請立亦於正月開學作爲試辦現亦另派師範生党廷傑等分別前往所有各該學堂經費或就地籌款或將原有公產及書院義塾公款各項清釐撥爲正用間有集鎮較小款實難籌者如澗嶺店大河屯兩處則於城內高等加租項下歲各撥給津貼錢三十千文以宏教育其城關各學堂之經費各教員薪水則統於高等新加租項內開支飯食錢文每員每月二千文則暫就膏捐項下支

付明知烟禁日嚴款難久恃然現無他款可籌祇得充其所急其餘各集鎮雖亦辦有端倪然內容形式均不足觀未便遽行稟報致貽名不副實之誚除移交新任徐令認真接辦隨時實力擴充以收效果外所有高等小學堂增設豫科暨城鄉各小學堂現均成立辦理情形及學生功課學堂屋宇地址理合填具一覽表連同現派各教員姓名另開清摺稟呈

鑒核俯賜批示祇遵實爲公便再桐河舊有桐溪書院地畝房屋甚多歷年均爲劉天保侵蝕私用卑職現正查追因交卸在即恐難遽有眉目應請併飭徐令清究此款如能追齊即可增設學堂兩處殊於地方學界大有裨益合併陳明

增定勸學所現行章程遴選正紳接充總董請加札委派

稟附章程

敬稟者案蒙

提學憲札以據巡警學校畢業員吳子瑜等稟懇札催速開勸學所教育會飭卽遵照公舉勸學總董教育會長稟請加札以專責成而資整頓等因蒙此遵查_卑縣勸學所雖成立已逾兩載無如原辦紳董楊繼志沈立錕等肆意妄爲志不在公經_卑前縣趙倅師第據實稟明業奉批飭詳革在案現欲振興學務整頓改良當以慎選總董妥定章程爲第一要義誠以總董有綜核全縣學校之權用得其人則學界自可擴張用失其人則學務難期發達責任綦重選舉宜嚴迭經_{卑職}督飭士紳慎加遴選嗣據選有終養在籍癸巳科舉人前廣西知縣曲紳純如

望重品端熱心教育堪以勝任公稟到縣隨經照會該紳赴所
任事並因原設勸學所附於師範傳習所內殊多遷就現查得
西關火神廟屋宇寬敞足敷應用現正量加修改一俟工竣卽
將該所遷往俾資展布并由卑職酌擬整頓改良辦理章程八
條發所照辦正在稟報間奉飭前因伏查曲紳純如既爲卑縣
士紳所推重堪以接充勸學總董應請

飭司加札委派俾專責成除仍會督該總董等將勸學事宜隨
時認真辦理外所有卑縣勸學所慎選總董改良辦理情形並
酌擬章程是否有當理合開具清摺稟請

鑒核訓示祇遵再教育會會長現亦選舉有人另單稟請加札
合併聲明

附章程八條

一 明定宗旨勸學所爲補助地方官振興學務力圖教育普及而設舉凡應辦事宜皆須查明定章切實奉行總以境無不設學堂之區家無不入學堂之子爲宗旨

一 分定學區勸學所現擇定西關火神廟修改遷移則各鄉學區應各區分明晰前據沈兆慶等稟分東八區南十區西七區北八區中一區派員勸辦漫無稽考未能收效茲特改併九區除中區外餘分四正四隅每區中仍各分地段俾勸學各員分投勸辦以免紊亂所有各區地段村莊分註另冊備查

一 慎選員紳勸學總董有綜核閤縣學務之權責任綦重非聲

望夙著者不克勝任前因舉用非人屢滋事端現既公舉前廣西知縣曲紳純如爲總董則各區亦須各選品行端正熱心公益之人派充方能收效趙前縣原派勸學各員果否稱職應由該總董曲紳詳細考查開具職名呈請給諭分區妥勸以專責成

一實行講習各區勸學員雖經趙前縣派定查於講習教育事務均未認真舉辦以致學務毫無起色應照定章於所內開設教育講習科每日酌定時刻研究學校管理法教育學奏定小學堂章程管理通則等類由總董派員明白講解調齊各區勸學員入所聽講續講三個月畢業再派赴各區任事以期通曉學務仍每月初二日赴勸學所會集一次並交勸

學日記報告共同研究改良

一按期宣講城關村鎮應遵定章每處設一宣講所派員宣講聖諭廣訓及白話科學報農話報並有關學務各書現因經費支絀未能延派專員所有城關各鄉凡已設初等小學堂者卽責成各教員於每星期放假之日赴市集適中地方照章宣講一次其未設學堂者卽由首事選派該集鎮文理通順之生童按集市日期明白宣講各盡義務不支薪水俟籌有的款再派專員

一改良私塾私塾黑暗之陋習最爲學界障礙勸學總董及勸學各員凡於勸學興學籌款等事旣應遵照奏定章程辦理其各村鎮私塾尤應勸令查照學堂所定課程循序漸進凡

教授生徒務宜悉用新法明白講解責令覆講不得仍前祇重背誦其應用書籍地圖各件均遵學部審定辦理課本黑板粉筆亦以適用爲主庶期漸達改良之目的

一 嚴定權限總董分勸各員應辦事宜均有奏定章程可資遵守其無關學務地方一切公事概不得踰越干涉如有舊日書院義塾及各項地方公款可以清查移作學堂公用者均應分晰稟縣核明批奪如未經批准有案不得擅自主持免蹈從前沈楊各董妄稟營私覆轍違則由縣查明撤退

一 籌備經費遷移勸學所修理添置一切花費皆由縣捐廉撥用至常年經費除總董及各區分勸員均各盡義務不支薪水外其駐所研究講習員及書記兼庶務員均各月給薪水

五千文所夫門夫二名各給工食二千文烟茶油燭紙張雜支二千文共十六千文卽由縣暫在城鄉膏捐項下抵撥俟籌備另有的款再行擴充

以上章程八條係就目前整頓改良辦理情形斟酌釐定其餘如何勸學如何宣講如何考查如何研究奉發奏定章程均已詳細備載茲不贅及應各查照切實遵辦如有未盡事宜統再隨時議定理合登明

查明增生姚光奎早經病故委係他人頂名上控并無革生牛廷瑞謀充校長稟

敬稟者案蒙 憲札以 卑縣增生姚光奎稟控革生牛廷瑞謀充校長等情飭卽查明稟候核辦等因到縣蒙此遵查增生姚

光奎曾充卑縣高等小學堂庶務員本年二月間因病告退當
卽飭差往查據該差稟稱姚光奎告退後久病不愈已於八月
十六日在家病故革生牛廷瑞現在亦未到縣等情稟復前來
查卑縣民情刁詐每以空虛無據之事冒名遞稟冀陷人罪姚
光奎早經身故卑縣高等小學堂事務卑職現正清釐款項逐
一整頓革生牛廷瑞且不知爲何許人更無謀充校長情事則
此稟係冒名投遞已屬顯然惟究係從何遞去有無歇家保人
抑係從郵局投遞應請

查明飭知以便卑職設法訪拿冒名之人從重懲辦以遏刁風
所有奉飭查明緣由理合稟復

鑒核示遵

謗書目錄

江陰何震彝穆志編次

卷二

改良城鄉巡警酌擬告示章程請示遵行稟

附告示章程

巡警教練所各生畢業期限請准暫爲變通稟

查明前任押犯人數設法籌修候審公所習藝所稟

遷修罪犯習藝所工竣擬訂章程派員管理並將各押犯

擬訂收所年限稟

創辦候審公所改修房屋工竣撥提待質人證分別收管

擬章遵守稟

遵查收支車馬錢文實數約計盈餘撥歸習藝所公用稟

另稟本府
加轉附

創設戒烟公所酌加仁育堂稞租增收土膏捐錢以充經

費並飭各鄉籌設分局實行禁烟稟 附章程

抽收城鄉土膏店捐款撥給各項新政公用截至夏季止

動支數目逐款造報稟 附清摺

縣民張國需置買房地填用官發教會契紙有違定章飭

差傳訊核辦稟 附堂諭

訊明張國需託名教會置買田產接晤各教士委無牽涉

憑有回信請示遵行稟 附另稟告示

會訊張國需價買呂文燦等房產託名教會填用契紙匿

不到案稟

會查趙倅師薰前領教會契紙五十張分發各鄉約售用

現均分別追回內少四張委係遺失無存開明號數立

案稟

另單附

縣民袁鎮三捏控白士林揚言殺害傳集訊明秉公斷結
並抄艾教士來函請予立案稟



謗書卷二

改良城鄉巡警酌擬告示章程請示遵行稟

敬稟者竊照本年五月間奉

巡警局憲札發擬訂各州縣切實改良巡警辦法章程飭令查照妥慎辦理等因前署縣趙倅師鼎未及改良旋即卸事

卑職

到任接准移交當查卑縣城關及各鄉巡警率皆虛應故事實不副名卽就城關而論雖有兵額二十名實則歷任皆以縣隊充數既未講求訓練又不站崗巡邏路燈崗樓操場器械一切表面形式且未備辦完全不過徒存巡警之名藉以支銷源潭鎮月帮經費及西關各商舖月捐文而已以故薛宗州韓炳烺等迭控不休在該生等志不在公所控原不盡實而開辦數年

毫無成效究亦予人指摘之端卑職亦難代為曲諱盖卑縣西關濱臨唐河為商賈會萃之區來往行旅人類甚雜若不將警務認真訓練嚴密巡查則閭里公安恐難遽收實效所幸常年經費歲有認捐的款九百餘串若再設法籌措稍事擴充由是整飭改良似尚易於著手至各鄉巡警雖經卑前縣列表報明計有二十餘處乃逐一調查實祇源潭鎮一處兵額尚足經費有著然於站崗訓練諸事亦未寔行形式規章更多闕略其餘益不足觀且查經費一項係由卑前縣胡令開元在任時定章按畝收捐尤與警務新章不符加以承辦首事未能秉公地多者徇情漏捐地少者轉不能免因之貧苦小石歛望尤多而用款支銷多未核寔以致各處巡警首事人咸視為利藪此爭彼

奪許訟紛紛流弊不可究詰是誠利未見而害已先呈殊於警務前途大有妨礙卑職查訪既悉未便再蹈前轍敷衍因循遵卽按照奉發新章先自城關入手設法整頓邀集公正紳董反復討論先於城內菩提寺設立總局局內附設巡警教練所移請城守汎王把總萬邦爲督練兼總巡官卽以委派到縣之巡弁張占魁充教練官飛巡弁另派涂鈞堂充講解警章教習并於朔望在城關宣講

聖諭所有庶務收支卽以書記生李培堂兼攝其事俾有專責各事統由縣總其成巡兵照中縣定章以三十名爲額先將城關原有巡兵大加淘汰不合格者開除按照定額另選年力精壯士著識字者補足職務則分爲習操聽講站崗巡邏四項各

定班次時刻一面厘定警務規則教練簡章發給總局已於十
一月初十日開辦城關各街劃分區段審定崗位路燈崗樓號
衣器械不如式者則更換之未完備者則添補之較前稍具形
式計添辦各項共用錢三百七十八千四百二十文至常年經
費約計需錢一千八百千文上下原有的欸祇西關商民歲捐
一項計錢九百餘千所短尙鉅查源潭鎮月帮縣署緝捕經費
銀三十兩歷任皆以之撥發縣隊口糧所稱巡警帮費亦即此
欸現既實招巡兵卑職迂拘不敢效尤朦混應請卽將源潭帮
費全數撥充巡警經費復於西關大興魁各鹽廠提抽賣鹽行
用每月十二千文又各鄉膏店開者尙多現在實行禁煙不妨
以征爲禁亦令各該舖按月認捐巡費歲計兩項約可收錢四

五百千文以補經費之不足似可勉強敷用此城關巡警補實兵額整頓改良之情形也至各鄉巡警則遵照新章先儘著名集鎮及鄰境交界地方擇要辦理業將源潭畢店澗嶺大河屯祁宜上屯咎崗蒼苔鎮田九店桐寨大酒店鄧埠口等十二處試辦改良巡兵或二十名或十六名悉視地方之大小定兵額之多寡各選廉正紳董派充巡警首事發給規則飭令招選合格巡兵照章實力奉行一面在於該巡兵內每處選送一名來城入所聽講警務學習操練並隨班站崗實習巡邏俟畢業後發回轉相傳授以期一律改良經費則飭令或辦舖捐或收麥谷各按地方情形酌擬辦法稟縣核定凡田地不及三十畝之小戶以及肩挑負販小本營生者一概不准派捐以示體恤收

支經費概令照章置備執照帳簿送縣印發仍將收支各款按月榜示按季冊報以釋衆疑而杜弊端其有次要各村鎮除已歸併大鎮辦理外餘如古城等處多因經費難籌辦理尙無端倪時屆冬令正匪徒竊發之際惟有用急則治標之法權顧目前先飭暫照保甲成法清查戶口編定牌甲派夫支更巡防庶幾有備無患仍飭照章選送粗識文字一人入城內教練所一體學習學費由該集鎮公攤並照現定籌捐經費辦法趕緊籌捐的款俟送城巡兵肄習六個月後畢業回歸亦卽陸續開辦俾可警務普及此各鄉巡警整頓改良分別緩急次第籌辦之情形也伏思巡警事務紛繁責任綦重此中精奧斷非一蹴能幾然其大端要不外乎保商衛民詰奸禁暴消災防患諸事果

使循序漸進次第精研未始不能達其目的惟卑縣巡警甫見萌芽雖經如此整頓辦理較爲切實而草創基礎不合定章尙多能否從此漸收效果究無把握惟有會督城鄉員紳查照部章及現擬辦法隨時隨事認真推行不驚虛名但求實際或可收得寸則寸之效所有整頓改良城鄉巡警創設教練所及分別緩急次第籌辦情形是否有當理合將所擬規則章程開具清摺稟請

鑒核訓示祇遵

附告示章程

出示曉諭事照得巡警爲保民要政然辦理未善保民者最易擾民本邑巡警開辦雖已數年不獨進步毫無卽規模形式且

多未備胡前縣定章每畝出穀一合以充經費原屬取不傷廉
惟按畝收捐殊與定章不符加之承辦首事未能悉秉大公戶
大地多者並不照捐而窮苦小民反不能免其支銷各款又多
不盡核實以致人咸視爲利藪爭充首事訐訟紛紛而巡警法
度暨各項權限義務均不知悉若再敷衍因循殊屬不成事體
除明訂章程分諭紳董首事認真改良辦理外合亟出示曉諭
爲此示仰士紳商民人等一體知悉須知巡警有一定警章值
此四鄉風氣未開其勢斷難遍設惟有遵飭先就著名集鎮及
鄰境交衝匪徒出沒地方分區籌辦其餘各集鎮辦未合法之
巡警分局應卽一律裁撤先由各該紳首選送巡兵一名來城
入巡警傳習所學習操演講解警章一面各就各村暫照保甲

成法以十家爲一牌十牌爲一甲十甲爲一保認真稽查務使宵小潛踪奸宄絕跡藉以保衛閭閻所有各村莊戶口地畝生業仍由該首事分別查明造冊送縣核辦如有隱匿地畝以多報少者查明罰究此爲嚴防盜賊各保身家起見慎毋疑慮觀望致貽後悔切切毋違特示

計開

一總局設於城內大寺移請城守汛管帶另派教習一員專教城鄉各巡兵逐日操演按照鐘點分段站崗巡邏卽將巡警教練所附設在內另派教習講解警務職守規章以資演習一城關巡兵遵照新章中縣三十名額數選充足額每名口糧每日一百文小建照扣均挑選土著識字者充當凡身家不

清一字不識者概不准用軍裝衣帽由局製辦

一各鄉風氣未開尙難遍設分局遵章先就著名集鎮及鄰境
交界匪徒出沒地方試辦各集鎮開註於後

東鄉

畢店巡兵二十名

與安棚井樓合辦本鎮駐兵八名井樓駐兵八名安棚駐兵四名

澗嶺店巡兵十六名

與王井合辦本鎮駐兵八名王井駐兵八名

大河屯巡兵十六名

與翟廟台辦本鎮駐兵八名翟廟駐兵八名

南鄉

祁宜鎮巡兵二十名

與馬振撫張博士店合辦本鎮駐兵八名

上屯鎮巡兵十六名

與下屯合辦本鎮駐兵八名下屯駐兵八名

咎崗鎮巡兵十六名

與閩營合辦本鎮駐兵八名閩營駐兵八名

西鄉

蒼苔鎮巡兵十六名

與郃河兵六名

常砦合辦蒼苔駐兵十名常砦駐

田九店巡兵十六名

與白秋八名

合辦田九店駐兵八名白秋駐兵

桐寨舖巡兵十六名

與福星舖景關帝廟八名

合辦本鎮駐兵八名

北鄉

源潭鎮巡兵二十名

大酒店巡兵十六名

與郝寨名

合辦本鎮駐兵八名郝寨駐兵八

鄧埠口巡兵二十名

與興隆兵十名

鎮合辦本鎮駐兵十名興隆鎮駐

以上十二處均照章先行試辦每局各選巡兵兩名送入巡

警傳習所教演操法講解警章

一未設巡警各集鎮及前雖設有巡警由趙前縣列表稟報當

以辦法未合警章奉文批駁現應遵批裁撤仍暫照保甲成
法辦理以十家爲一牌十牌爲一甲十甲爲一保由各該集
鎮首事會同各村莊牌長商辦認真稽查以防盜賊並將戶
口丁男地畝生業造冊送核一面由該首事各選送巡兵一
名來城肄習警章俟各兵畢業後連合附近村莊籌有的款
再行稟請設局照章舉辦

附列應選警兵來城肄習之集鎮

古城	迴龍寺	王集	中官鋪	常崗鎮	龍池
茅草寺	陳崗鎮	少拜寺	揣窪	石塔寺	苗店
雙河鎮	劉馬店	張博士店	老河灣	廣佛寺	漢龍潭
湖陽鎮	湖河鎮	火星廟	白龍鎮	二郎廟	郭灘

曹堂 三皇鎮 葉集 李氏河 申寺 張店

桐河鎮 惠庵 山坡堂 李店 濟瀆廟 六股路

以上各集鎮每處各選巡兵一名送入巡警傳習所肄業遵

章以六個月畢業俟畢業後各回本鎮籌辦巡警教練一切

再由各該首事另選一名送城更替肄業以期逐漸推廣

一各分局所用軍械旂幟號衣槍炮等件均應一律不得參差

不齊巡兵亦不得穿用大紅坎肩致與新章不符式樣附列

於後

旂用紅色白字

唐縣

東區巡警畢店

如東鄉則曰東區右註地名餘仿此

每面以六尺

見方不准隨意大小號衣用皂青粗布紅領紅字肩章左曰

唐縣巡警右曰某區集鎮第几號不得再用白布光月黑字

槍用來福槍 應呈縣加烙火印

警棍用黑色油漆 每棍長二尺六寸圓式

一巡兵應逐日操演按定時刻分班站崗巡邏凡官員教士及遊歷外國人經過祇准正立示敬不准遠道送迎首事等亦不得以私事隨意驅遣

右規制六條

一巡警經費前由胡前縣擬訂每畝捐谷一合按季收取應用雖經收辦數年尙無窒礙惟迹涉按畝究與定章不符且貧窮小戶概令出捐亦不足以示體恤今改爲凡地在三十畝以上者仍照舊章按麥秋二季捐助糧谷其三十畝以下各小戶一律免捐

一各集鎮選送肄習之巡兵每名由該首事籌給口糧每日九十文計二串七百元又巡警傳習所學費六百元外製辦操衣靴帽錢三串文口糧學費按月照繳操衣錢則於選送時如數先繳以便交總局製辦俾臻一律

一城關並各集鎮收捐經費無論麥秋糧食及各店舖每月認

捐錢文均應給捐戶執照此項執照

另式刊後

由縣用印騎縫編

號發由首事填用一給捐戶一繳縣署一存分局仍每局發

給印簿兩本一爲流水簿

凡零星收欸及支用各項經費製辦物件均分載

一爲收

支總簿

凡收支總數按月分舊管新收開除實在四項登載

均按月榜示按季冊報

縣署存查

一各集鎮開有舖而生理者准視生意大小按月酌收經費其

肩挑貿易小本營生者一概不准抽收分文以恤窮民如有
巡兵藉名需索者查出重究

一 認定經費凡舖戶捐項月清月欸麥秋兩季糧食麥季不得
逾六月秋季不得逾十月其有遲延不繳者准稟縣請追不
准私向捐戶口角齟齬其有戶在東鄉地在西鄉者則以西
鄉地畝坐落之處收捐以地領戶不以戶領地免致爭執

一 已設分局各處如經費不敷准該首事各就本地情形設法
籌捐或提用地方公款或將迎神賽會演戲燒香無益之費
酌量提用惟須預先稟縣立案如未批准不得擅提撥用尤
不得按畝攤捐致滋騷擾其尙未設局之處按季所收捐谷
以四成留爲各該本村保甲經費六成歸首事支銷巡兵每

月在城肆習口糧及局用雜支如有盈餘另儲存局備辦軍裝槍炮各件留俟開局應用仍按季將收支各欸造冊報銷
右經費六條

一各首事祇准照章稽查盜賊嚴禁煙館賭博巡更查夜諸事
遇有鬪毆口角小事亦祇可和平解勸其勸說不了者任渠
各自呈訴不准幫訟遞稟認作見証其戶婚田土錢債家務
尤不准干預過問違者罰究

一各首事應以田畝年歲爲格凡地在三頃以上年逾四十者
准充巡警首事并稽查保甲事宜地在二百畝以上者准充
保長一百畝以上者准充甲長五十畝以上者准充牌長然
非年逾三十者仍不得輪充均按年一輪
譬如某鎮有合格者幾人即各自分

定年限輪流他年不准藉詞推諉亦不得妄稟爭辦
以一正一副充之

一地在三十畝以下未出捐錢之小戶應每家各出一人聽該
首事牌長命令輪流值日照章稽查不准稍有推諉其家無
男丁及有男丁而未及歲者免輪值日以示體恤

一各集鎮村莊無論晝夜遇有盜賊及各項警事晝則鳴鑼放
煙爲號晚則鳴鑼舉火爲號凡附近各村均應前往協捕兜
拿其有退不救援者事後查出議罰

一本村不准窩留吸食洋煙賭博竊盜及面生可疑之人由牌
長按戶稽查如有違章窩匿者送縣究懲居鄰隱匿不報者
并究

一巡警首事每年輪派兩人值年辦事一管理巡邏稽查接待

往來行旅諸事一經收捐項銀錢支放巡兵口糧及局用雜支各項帳目隨事記載按月將收支各款榜示本鎮俾衆共見仍按季開摺送縣報銷其巡兵口糧均足數支給不准尅扣短少

右職務權限

以上各條係就地方情形酌擬改定其有應興應革之事容再隨時體察斟酌改良理合聲明

巡警教練所各生畢業期限請准暫爲變通稟

敬稟者案蒙

巡警總局札以巡警之成立應由辦理教練所入手飭自文到日始限六個月一體設立彙造總冊咨部等因蒙此遵查卑縣

於上年冬間整頓改良城鄉巡警創設教練所分別緩急次第籌辦並將所擬規則章程稟奉

撫憲批示查教練所定章一年畢業該縣定爲六個月畢業未合部章且該所學科亦應查照部章辦理以免參差另又奉到巡警總局行知核議各州縣巡警傳習所畢業限未屆六個月者一律改爲教練所一年畢業各等因伏查卑縣原定章程以六個月畢業係遵傳習所辦法所有練習操法講解警章及站崗巡邏諸務現已粗知大概計自開辦起至五月底止已屆六個月畢業之期本應遵章改展一年再行畢業惟各鄉集鎮教練需人實有緩不濟急之勢雖肆習各巡兵爲期短促年格程度多有未符然較之全未學習漫無紀律者已覺不同擬請將

卑縣巡警教練所頭班練習各巡兵仍於五月底作爲期滿暫行發回各該鎮分局教練一切一面由卑職遵照部章另招新生按課教練定以一年爲畢業期俟期滿稟請派員會考給發文憑分發各局接辦警務仍將頭班調回入所隨班補習六個月功課再行畢業以符部章所有卑縣巡警教練所擬請暫爲變通仍於五月底作爲期滿後再遵章另招新生改爲一年畢業併俟接替有人調回補習再准畢業緣由理合將在所練習各巡兵名數造具姓名年歲清冊稟請
查核批示祇遵

查明前任押犯人數設法籌修候審公所習藝所稟

敬稟者案蒙本府轉蒙

臬憲札以豫省各州縣命盜要犯獲案之後動輒濫行羈押匿
不稟報經年累月釋辦無期每至瘦斃飭令將監押各犯無論
新收舊管一律和盤托出一面查案分別稟明核辦等因蒙此
仰見

憲台矜恤刑獄之至意欽佩莫名查卑縣監禁各犯業經卑前
縣趙倅悉數稟報詞訟人證向均取保候訊從不管押茲准前
任移交快壯捕三班命盜各案押犯共四十五名或爲屍親所
指控而尙待推求或爲營汎所獲送而賍證不確或係素不安
分疊被指控而訊無確供容俟卑職逐案提訊分別情節重輕
應辦者辦應釋者釋其有供詞實在刁狡而人非善良者或酌
加監禁或收所習藝隨時稟明請

示辦理惟查班管名目久爲世所詬病卑縣管押人犯係沿舊習由快壯捕三班分押看管卑職親臨驗視屋狹人多污穢之氣令人掩鼻際此天氣炎熱暑濕薰蒸在所各犯易生疾病若不一舉而廓清之殊非清理庶獄慎重民命之意查卑縣習藝所歷前任均因欸項支絀諸多簡畧在所罪犯既教導之無人看守人役復凌雜之無序徒存名目毫無實際亟應設法改良查該所房屋前後雖有二十餘間而院落逼窄屋亦湫溢用以工作寔不足以展布卑職現已量爲修葺改爲候審公所凡詞訟待質及無關罪名人証均酌發收管其罪犯習藝所則就縣署頭門外東首官房一所通聯原設捕班押所量爲開通牆壁屋宇加修完固凡命盜竊賊及一切雜犯皆於是居之藉習工

藝以期化莠爲良現正動工修改一俟工竣卽行分別遷移另募工師添購器具妥爲教導務使各犯在所無荒嬉之時釋出有謀生之路庶循名責實藉免溺職之愆所有此項修理經費卽由卑職妥爲辦理至兩所常年經費卽在卑前縣趙倅師鼎稟請批准呈捐項下酌撥錢八十文分別支用統俟房屋修齊再行繪具圖說妥定章程稟明立案所有遵 飭查明前任押犯人數並修改候審公所習藝所緣由理合開摺稟請 鑒核批示祇遵

遷修罪犯習藝所工竣酌訂章程派員管理并將各押犯
擬定收所年限稟

敬稟者竊查本年夏間奉

前臬憲札飭將新舊押犯和盤托出稟明核辦等因適卑職甫經到任當卽恪遵

功令將接管前任移交押犯四十餘名逐一開摺稟陳

憲鑒並擬將未能釋辦各犯酌定年限一律收所惟查原設習藝所屋宇狹隘不便工作亟須另遷改修整頓擴充業經隨稟聲明在案伏思罪犯習藝所乃改良監獄之先聲若不認真辦理實力擴充恐無以收化莠爲良之效卑職查有縣署頭門外迤東邑紳李建基等前於道光年間興辦義學充公官房一處現已廢棄賃爲民居其地與已裁捕役所遺班房押所相連特爲收回諭飭紳士李海嶼核實估計重加修葺並將院落一律開通增添木柵墻板重啓大門局勢頗臻寬敞已於十一月十

六日一律工竣計用工料錢三百六十三串有零當由該紳稟請在於庫存城工用餘錢文及前任門下龍澤賢贓銀項下撥用不敷之欸卽由卑職捐廉湊足支用各欸細數亦經另文冊報計修得該所後院北屋三間東屋三間爲人犯住屋各看役即分住屋內以便查察又修得西院三間以南二間及前院北屋正房三間爲名犯習藝處所其北首一間隔爲病室凡有疾病者提出另住以防傳染又西院南屋三間以兩間爲磨房一間爲看役住屋重砌偏西小屋二間作爲廚房前院臨街房五間以一間爲大門餘爲工師司事及門役所夫住房並存放銀錢底貨之處現皆勉敷應用至前任移交押犯除已辦已釋及撥入候審公所外尙餘十七名又卑職任內新收十五名非係

積匪慣賊卽屬兇惡棍徒釋之則爲害閭閻辦之則供多翻異
自當遵照通飭各按其原犯情節酌量輕重定擬收所年限責
令充工習藝以期改過自新所有舊日班管名目永遠革除皂
快壯各班房內不准再有看管人犯情事俾使多年積弊一舉
廓清藉以仰副

憲台慎獄恤囚之至意現已另募工師選派司事夫役酌擬習
藝所辦法章程發所照辦惟是收所罪犯共有三十餘名之多
舉凡收除人犯監發口糧研究製造考核功過以及稽查約束
在在均關緊要雖該所逼近署旁易於查察惟民事刑事一切
新政悉萃卑職一身且時須下鄉查勘案件誠恐百密或有一
疏致撓重咎似非遴委妥員總理其事不足以昭慎重而專責

成查卑縣典史顧堯錫樸實耐勞堪勝該所總理之任且典史職司監獄習藝所爲監獄改良初基該員亦有應盡職務擬卽飭委該典史兼理其事并由卑職另籌給每月津貼錢六千文以資夫馬費用所有常年經費以及各犯口糧鹽菜各役工食司事工師薪水百計樽節仍約需錢六百餘千雖有稟明車馬餘欸留辦習藝所並呈捐及官房賃租錢文歲入共祇三百餘千所短尙鉅售貨餘利現亦毫無把握而月計開支刻不容緩只得暫由卑職設法挪移墊發容俟另籌有欸再行稟請撥補以期事垂久遠除隨時督飭在事員司認真辦理外所有卑縣遷修習藝所擴充改良辦理情形並酌定辦法章程及分擬押犯收所年限是否有當理合分開清摺繪圖貼說稟陳

鑒核訓示祇遵再原習藝所房屋已另加修改作爲候審公所
辦理情形另稟詳陳合併聲明

創辦候審公所改修房屋工竣撥提待質人証分別收管
擬章遵守稟

敬稟者竊照去歲奉

前臬憲通飭清查押犯禁革班管當經卑職遵飭擬將罪犯習
藝所遷移所遺之房改設候審公所業將籌辦大概情形稟陳
在案伏思候審公所係爲收管待質人証而設必須屋宇潔淨
牆壁堅固方足以昭慎密原房滲漏欹斜墻壁卑矮亟應一律
修葺俾資應用前經督飭紳士李海嶼核實勘估擇吉興修至
十一月間已將各房修理完整門窗添補齊全所用工料及置

備床檯器具一切共用錢二百三十餘千文因地方無款可籌
悉由卑職捐廉備辦已於改修罪犯習藝所工程報銷案內造
冊另文報查現已工竣卑職親詣查驗委屬工堅料實一律整
齊查原接前任移交舊案押犯除已釋已辦及定有年限收入
習藝所學習工作外尙餘未能定案押犯八名多屬命盜案內
被證或爲屍親事主指控而供詞狡執或因案情涉於疑似而
尙待推求一時未能釋辦均已分別提出收入公所又卑職任
內陸續新收七名非毆人成傷辜限未滿卽棍徒欺詐逞刁狡
供亦各隨時撥入並選派司事所夫更夫分任其事仍委卑職縣
典史顧堯錫兼理現已酌定章程發所照辦所有從前班管名
目永遠革除藉以仰副

憲台清理庶獄之至意除仍督飭在事員弁隨時認真辦理並
將修改習藝所緣由另稟詳陳外所有卑縣創辦候審公所修
改房屋提撥人證並酌擬章程是否有當理合分開清摺繪圖
貼說稟請

鑒核訓示祇遵

遵查收支車馬錢文實數約計盈餘撥歸習藝所公用稟
敬稟者案蒙本府札蒙

支應局札奉

撫憲批稟復查明所屬州縣現辦車馬章程取具摺結遵加府
結請核示遵稟由奉批彙稟悉業分別准駁另開飭知各件分
別銷存計粘單一紙內開唐縣額收車馬錢三百八十四千據

稟如數改爲隨糧徵收查摺開甲乙丙三年催冊費勸捐公幹等例差或九十九串一百一十五串七十五串不等現例差既另擬章程告示通飭嚴禁前項例差糜費之錢當可省出并他項能否裁減通計每年約餘若干錢另開摺出結由府核明加轉定案餘錢亦卽留辦該縣監押改良習藝另稟候示原結塗銷摺存等因蒙此查例差雖經裁免而他項支應似難懸爲定額卽如^卑前縣摺開光緒三十年分支發錢五百餘千文內例差支九十餘千文雖僅支正項差使已形不足若三十一年分支發錢三百七十餘千而例差則支出一百餘千文卽連例差在內尙有盈餘是車馬之用項全以差使之多寡爲衡^卑前縣係照前三年冊報開列已用之欸尙易鈎稽未來之差礙難預

計如將例差悉數裁免按照前三年用欸酌中定斷每年約可
省出錢七八十千文之譜而委員提案審案以及招解人犯各
項事件之多寡尙在不可知之數每年究能盈餘若干卑職亦
不能確有把握擬請將用欸按季核實造報如有盈餘悉數提
入習藝所等項之用現在時艱欸絀百廢待舉苟有可之節存
之欸移充公用卑職斷不敢稍事虛糜卑縣車馬並未設局別
無糜費支應過往差使按站發給車價久已成爲定例委實無
可再減理合開摺加結稟請
核轉示遵

稟本府袁

敬稟者案蒙

憲札以奉

撫憲札開清厘車馬各屬由府轉稟者已次第定案惟南陽鎮平及卑縣三處出入欸項尙未核清飭卽迅速查明另行出具摺結由府加轉等因遵查卑縣車馬昔無定章每歲由民間按照地畝共出月馬一百八十四匹每匹折錢二千一百三十三文每年統共折錢三百八十四千文按月交由地保繳存縣庫遇有差使過境隨時僱覓車馬支應如有不敷由縣捐廉墊發曆經照辦有案上年奉飭清厘車馬經卑前縣趙倅師鼐會同委員金倅鶴籌悉心核議自本年開征起所有車馬錢文改歸隨糧繳納其三十畝以下之戶照舊優免卑縣錢糧有大小糧之分大糧卽在三十畝以上每年大糧約有二萬一千餘兩按糧

銀一兩攤錢十八文共可收錢三百七十餘千之譜稟奉

各憲批准照辦在案此項車馬錢文由花戶自行隨糧繳納書差不致需索分文尙無流弊閭閻亦屬相安現在按照前三年用欸酌中定斷如將例差悉數裁免每年約可省出錢七八十千文之譜自應留辦改良監押習藝所之用惟是委員提審案件以及招解人犯各項事件多寡靡定卑職現無切實把握惟有按季將用欸核寔造報如有盈餘悉數提辦習藝所等項之用斷不敢稍事虛糜奉飭前因理合遵照開具摺結稟呈查核加轉實爲公便

創設戒煙公所酌加仁育堂稞租增抽土膏捐錢以充經費並飭各鄉籌設分局實行禁煙稟附章程

敬稟者竊維鴉片流毒中國由來已久一經吸食失業廢時病
身敗家爲害之烈盡人皆知近年屢奉 明詔勒限禁絕復蒙
憲札嚴催實行自當欽遵依限照辦以除痼疾查禁烟一事頭
緒紛繁應照部章以先設官局爲入手辦法查縣署頭門內有
蕭曹廟一座其中房屋足敷設局之用隨卽督飭紳董段成勳
量加修葺作爲官設戒烟局卽派段紳經理其事議定凡戒烟
之人分爲有力無力兩項有力者報名取方購藥歸家自戒無
力者留局服藥戒癮日供兩餐不准外出閑遊計以三十人爲
一班挨次輪戒每班定限以兩個月爲期限滿癮斷者發給執
照並酌賞資本俾得小本營生藉示鼓勵另擬章程發局照辦
已於十二月十五日開局所有開辦費用悉由 卑職 捐廉籌辦

至常年經費現收仁育堂官地分別酌加稼租二百五十千文
麥秋兩季分繳以爲的欸惟核計用項不敷尙鉅近又擬飭城
鄉各膏店土庄每售膏一兩加捐經費錢五文每土一兩加捐
經費錢十文按月照收俾資挹注藉此實行以征爲禁之法各
鄉亦劃分區域派由巡警首事兼司禁煙事宜發給章程照辦
並飭迅速籌欸酌設戒煙分局一切悉照城局辦理一面酌派
妥紳調查吸煙人數姓名年籍膏土店字號銷數分飭請領牌
照按年遞減依限減盡惟是戒食禁賣率皆急則治標之計欲
圖正本清源舍禁種別無良策雖經卑職迭次出示嚴禁不准
復種莖葉並親赴各鄉督飭地方鳴鑼曉諭就地查禁拔毀第
恐偏僻山村官紳足跡罕到之區或有無知愚民存有己種未

毀之苗亟應詳細復查以期淨絕根株業將所擬章程照抄出示剴切曉諭責成各鄉首事認真復查仍由卑職俟春分後煙苗長發之際再赴各鄉遍加確查以免隱漏除督飭城鄉紳董隨時認真經理實行查禁外所有卑縣籌款創辦戒煙官局並飭各鄉籌設分局實行禁烟辦理情形並酌擬章程是否有當理合開摺稟請

鑒核示遵

附章程

一設官局 城內遵照部章先設戒烟官局一處以爲各鄉之倡查得縣署頭門內有蕭曹廟一座其中間房足敷設局之用卽在廟內設立官局名曰棲流戒煙局

一任董役 戒煙局內舉凡購藥監製散丸驗癮填照註冊收支稽查一切事頗繁重在在須人經理現選派段紳成勳常川駐局分任其事月給夫馬津貼五千文不支薪水至汲水造飯購物洒掃等事另派局夫二名以供役使每名月給工食錢二千文

一定方藥 戒煙之方甚多惟

林文忠公戒烟成方內多補品最爲和平應照該方採購道地藥材由局董親自監製爲丸分發照服以期有效另製茶膏出售俾有力者購領回家自戒膏方附呈

一別貧富 凡素嗜鴉片現願斷戒之人如家道康裕者應各自來局報明姓名年歲住址生業及癮之輕重由局董登記

簿册飭取妥保准其購藥歸家予限兩個月立志自戒無須入局其藥價按值本以七成折收以資利濟限滿戒淨來局報請查驗相符發給癮斷執照其癮未斷者展限半個月購藥復戒如再不能斷癮卽調入局內勒令隨班力戒以期祛此痼疾其貧苦無力購藥者來局報名取保聽候挨次分班留局服藥戒斷並日供兩餐概不收取分文

一分班次 局內房屋無多經費有限而城關及附近村庄有癮貧民甚多一聞設局戒煙日又供給飯食設或一擁而來則收不勝收必有人滿之患茲定每班以三十人爲度儘報名在先者收入戒烟一班戒完挨次另換一班不得越前壓後凌雜無序

一定限期 入局戒烟者按癮之大小發給藥之多寡日服兩次限兩個月將癮戒淨限滿癮去者查驗的確發給癮斷執照并酌量賞給資本任其出局謀生平時不准出外閑遊藉此防範如逾限癮存者再展限半月勒令堅心力戒總期限滿癮斷查驗後一體發給執照出局但不給賞項以爲遷延時日者戒

一禁出入 鴉片爲害盡人皆知既欲戒烟必須斷絕淨盡方能方永除沉痾然嗜煙之人率多頹靡不振疲玩性成鮮有堅忍恒久之心在局戒烟如仍任其隨意出入難保不於癮發之時潛出私吸仍屬無益徒耗公款勢必不能依限斷戒應責成經理紳董隨時嚴行查禁凡戒烟之人均不准私出

局門以防流弊

一籌經費 安設局所置備器具一切開辦費用皆由縣捐廉籌辦至購配丸藥日用柴米局紳津貼夫役工資等項常年經費如無的款恐難經久除仁育堂官地稞租業已分別加增指爲的款外不敷之款尙鉅查城關及四鄉煙館早已全行閉歇惟售賣煙膏土店尙有數十家驟難禁止擬定每售土一兩酌捐經費十文售膏一兩酌捐經費錢五文按月抽收俾資挹注如不敷用另行籌補并藉此實行以征爲禁之法

一立分局 嗜煙者城關固多而四鄉村鎮亦復不少應將縣境分爲東西南北中東南西南東北西北九區除中區域內

已設官局外其餘八區各派由巡警首事二人專司查禁事宜務各邀集紳富迅卽就地籌欸各於各區附設戒烟分所一切章程悉照城局辦理如因經費不足或先飭藥舖照方修合戒烟丸藥發售由局分領執照轉給定限斷戒其有無力貧民立志戒烟者由局施藥不取藥資用示體恤

一查吸食 吸煙之人如不澈底清查發給牌照既無以杜新吸之弊且原來吃煙者是否照章按年減少亦屬漫無稽考恐於禁食一端難以實行茲擬責成各區巡警首事會督村董地保無論紳商士庶挨戶詳查務將區內吃煙人數姓名年歲住址及吸煙分兩逐一調查清楚不使有一人隱漏造冊呈縣彙總詳請報部領發牌照勒限按年遞減無牌照者

不准私行購買吸食違則重究

一限售賣 吸烟者非購土自煮即買烟膏吸食是膏土各店愈多則吸食之人愈衆此定理也縣境膏土各店亦責成紳董人等先將各家數目字號地址成本店主姓名月銷年終彙計一律查清造册呈縣詳請報部一面照章由縣發給憑照示諭以爲營業之據自查明後不准再有增開之店凡領有憑照各店出售膏土驗明來購者領有購煙牌照始准售給如敢違章私售於無照之人查出從嚴罰懲仍將銷數按年遞減兼營他項生意以期逐漸改業

一禁種植 縣境雖非著名產土之區而於湖北棗陽交界山僻之區種煙者前數年間亦間有之前經迭次示禁並於因

公接見紳董時諄諄勸諭改種又由本縣親赴該鄉督同地保鳴鑼曉諭查禁拔毀已據各紳董報告烟苗均早毀淨惟是縣境幅員遼濶山村偏僻恐有官紳足跡罕到之處愚民無知仍有私種未毀之苗擬俟春分後烟苗長發之際再行親往督飭紳首地方挨庄詳查曉以利害總以境無煙民地無煙草爲要旨倘有違禁私種情事卽將該地主傳案按照新章治罪決不寬宥

以上章程十二條係就目前辦理情形斟酌擬定其餘未盡事宜容再隨時妥籌辦理理合登明

抽收城鄉土膏店捐欸撥給各項新政公用截至夏季止動支數目逐欸造報稟附清摺

敬稟者竊查卑縣地方一切新政前因無款籌辦當經通稟請就縣境各鄉膏土店一律征收捐錢每土一兩收錢十文煙膏一兩收錢五文以充戒煙局習藝所及地方各項新政經費業蒙批准在案計自上年十一月開辦起迄今數月以來各膏土店多因厲禁於征捐錢無力完繳相率歇業然此項捐錢積少成多雖不乏歇業之家而月得捐款實爲辦理新政有着之款究多裨益乃現奉

部章飭各膏土店概領營業牌照凡購土一兩收捐錢六文購膏一兩收捐錢十文自應遵照現行新章妥爲辦理則卑縣前次稟定捐收土膏各項應即截至六月底止一律停收并將以前收支各款逐項報銷以清界限除將各膏土店請領營業牌

照及呈繳照費捐款統自七月起分欸另文詳報外所有籌辦
地方新政動支稟准土膏店捐項錢文實在數目理合逐欸開
具清摺呈請
鑒核批示祇遵

附清摺

計開

收欸項下

光緒三十四年分

一十一月分共收捐錢二十千四百文

一十二月分共收捐錢九十六千七百文

宣統元年分

一正月分共收捐錢二百三十七千二百文

一二月初一日起至閏二月十四日止共收捐錢二百零九千八百文

一閏二月十五日起至三月底止共收捐錢二百二十八千八百文

一四月分共收捐錢一百七十七千六百文 銀六兩九錢

一五月分共收捐錢二百十五千四百文 銀二兩三錢

一六月分共收捐錢一百三十八千七百文 銀二兩三錢

以上統共收捐錢一千三百二十四千六百文 銀十一兩五錢
內除按照本銷土稅定章扣撥一五公費錢一百九十八千六百九十文 銀一兩七錢二分五厘 以備經收各首事人

辦公經費外實淨收錢一千一百二十五千九百十文銀九兩七錢七分五厘四化錢十五千八百三十五文

出款項下

一支撥候審公所經費錢一百五十千文

一支撥罪犯習藝所經費錢一百十八千四百零六文

一支撥戒烟局十二月十五日起至六月三十日止經費錢四百二十二千六百

六十九文

一支撥修理各小學堂工程并置備傢具錢一百三十千四百

五十九文

一支撥光緒三十四年分截至年底爲止計巡警不敷錢八十三千七百五十

八文

一支撥光緒三十四年師範傳習所計錢一百二十九千四百
零一文截至年終止經費不敷錢

一支禁種烟苗高脚牌工料錢一千六百文

一支創設巡警教練所修理房屋置備桌椅工料錢一百二十七千四百八十八文

以上共支用錢一千一百六十三千七百八十一文

除支不敷錢二十二千零三十六文現查各鄉土膏店仍欠
有認捐錢二百五十三千四百文均係先後歇業蒂欠之款
統俟追繳若干撥歸墊用後移交新任徐令彙案報銷合先
陳明

縣民張國需置買房地填用官發教會契紙有違定章差

傳質訊核辦稟附堂諭

敬稟者案查前奉

臬憲 交涉局

會札

以各國教士准在內地租置地

基以爲建堂傳教之用惟須於契內註明教會公產字樣不得

列教士之名訂定買當房地契紙格式詳蒙

前撫憲批准飭卽領用填寫等因到縣當經卑前縣趙倅師鼐

於上年四月間備文請領教堂應用買當官契紙各二十五張

發交四鄉鄉約具領填用蓋卑縣鄉約兼充產行專司買賣房

地丈量立契投稅之事茲於三月二十九日據卑境南鄉黑龍

鎮業戶張國需之孫附生張成鐸到縣呈到買契一紙投稅驗

係填用教會公產官契紙一張上寫買主張國需買呂文猷呂

文榮等四戶共地二百六十畝瓦屋十間計原價四千九百串

內載明應過割信保五甲呂振倫名下糧銀二兩零八分三厘
七甲呂魁元名下糧銀二兩零四分現查該契紙係鄉約孫萬
興領用騎縫編列布字六百三十五號契上盖有正堂趙花押
紅戳而年月則填係光緒元年三月初八日立契查是年尙未
設有刷印局亦無此種契紙實屬情節不符且此產果係教堂
置買應註明何項教會似不應單列張國需之名若謂悞用悞
填則伊孫張成鐸係屬文生應識文義現以鉅款購買房地當
不應如此疏忽擅用此項契紙妄填投稅以爲執據具訪查張
國需平素並未奉教本係貧民向曾在外僱工近二十年來財
產甚多家資頗鉅是否暗有洋商資本營運內地托名影射抑
係實爲教會轉輾購買案情較重稅款又巨不得不慎之於始

切實詳查似未便遽任稅印致貽後患除由 卑職 差傳賣主呂
文獻等及買主中證鄉約人等到案詳加質訊並先將該地封
存交由地方保正諭知佃戶看守毋許擅動統俟查辦明確再
行稟請示遵外所有張國需出名置買房地填用教會公產賣
契送稅查明情節支離差傳質訊核辦緣由合先抄呈契式稟
請

鑒核批示祇遵再趙倅領回前項教堂賣當房地契紙共五十
張均於上年在任時發交四鄉各鄉約填用誠恐該鄉約不諳
約章擅行填給設於投稅時不加覆驗則後患不堪設想現雖
發覺查僅投稅一張其餘已否填用尙難懸揣 卑職 縣教堂林立
似宜防患未然擬由 卑職 一律追回存儲署內隨時酌核領填

卽或有已填未稅之契亦可立卽根查追銷俾免疎失致成交涉合併聲明

附堂諭

堂諭訊據鄉約王春榮供稱伊知張國需要買呂姓田地特請劉篤培送給官契格請爲填用堅不肯受黑龍鎮鄉約楊慶雲欲代丈量伊不允許亦未用伊契紙孫萬興則供稱與張國需張成鐸均不認識此張契紙係張成鐸託庫房清書購去自行填用張成鐸亦供認自行赴房託購由伊自寫投稅呂文榮則供稱賣地時係憑中寫立草約并未照章填格張國需不願丈量亦不要人知道故未邀鄉約到場此地係伊家公產光緒初年當在邢姓家後由邢家轉當多戶皆係零星當出現在一約

出賣與張國需爲業他如何自己增價寫契作爲教會產業均不知道各等情現在張國需避不到案無從而質惟據各供察核多不可解置買房地憑鄉約官人立契丈量原以杜賣戶及地鄰藉口乃張國需不要鄉約丈量由伊孫張成鐸自寫契據設爲原業地鄰以地界價目糾纏爭論其何以辭此不可解者一價多一兩則多增稅銀減價省稅或在人情之中乃調驗墨契價僅四千六百八十千而官格契內則填四千九百千計多價二百二十千卽有中資酒醴花用似不能列入正價之內甘心多出稅銀此不可解者二地畝實有多餘售主不願丈量猶可說也乃查閱抽回前當邢姓文約內載宅基場地在內計二頃五十畝則地數已明賣戶卽欲增地得價亦當照丈明晰兌

給價錢何以甘吃此虧增地十畝如數兌價且將契內寫明二百六十畝設使地鄰控爭侵佔毫無丈明弓尺清單可以查考此不可解者三置買房地原爲子孫之計斷無自己出錢甘將契內載明作爲教堂公產且張成鐸既係文生迥非鄉愚無知不識文義者可比乃自購此項契紙自己填寫投稅不愿令鄉約他人知悉是何居心此不可解者四當經一再駁詰張成鐸俯首無詞惟再四乞恩願將此地充公求免深究訊據中人趙應銅則稱此地轉當在外計有四十餘家之多皆係零星小戶值此麥熟攔收各當戶多不情愿是亦實情有無假冒藉爲抵制情事寔不知情等語本縣已親往天主耶穌兩堂拜晤教士該教會委無託張國需代購教會公產之事接有回信備查則

託名假冒取巧藉抵益屬可信此時張國需既畏審避案若不
迅爲擬結久恐有人干涉變幻多端勢必橫生枝節况張國需
私相買賣違章立約本屬咎有應得卽照現供情形謂其中毫
無情弊其誰信之候卽據情稟請交涉局憲暨本府訓示祇遵
張成鐸仍暫發學呂文榮及中人等均暫取保鄉約楊慶雲均
省釋仍飭庫工各書協同中人賣戶三面文明稟復核辦契約
各件均附

訊明張國需託名教會置買田產接晤各教士委無牽涉
憑有回信請示遵行稟附另稟告示

敬稟者竊卑縣民張國需出名置買房地填用官發教會契紙
違背定章幾釀重案當經卑職將大概情形先行通稟旋奉

交涉局憲電以張國需置產填用教會契紙殊屬不合飭卽集
訊速稟等因隨差傳一干環質澈訊先據該管鄉約王春榮楊
慶雲供伊等知道張國需要買呂姓田地送給官契格填用堅
不肯受又代丈量不許私遣伊孫張成鐸赴庫房轉購鄉約孫
萬興名下所領教會契紙自行書寫地數價目送稅又據賣主
呂文榮等供稱賣地憑中寫立草約并未照章填格張國需不
願令人知道丈量故本邀鄉約到場此地係伊家公產光緒初
年當與邢姓爲業後由邢姓轉當多戶現在一約賣與張國需
爲業至如何自己增價寫契作爲教會產業均不知道各等情
卑職查驗墨契証以衆供雖張國需避案畏審無從質証而此
中奸欺弊弄業已肺肝如見如不邀同鄉約丈量四至地界自

令伊孫張成鐸寫契投稅以及原立墨契價僅四千六百八十串而官格契內則增寫價四千九百串呂姓前當給邢姓契約載明宅基場地在內地僅二頃五十畝而現立之契則寫明地二頃六十畝種種不符情形經卑職反覆詰訊張成鐸俯首無詞一味認錯堅稱實與教堂並無往來情願將所買宅地全數充公乞恩免究原中趙應銅則稱伊因此地呂姓公產價應各房均分當戶計有四十餘家之多買後卽須全收麥籽各當戶因麥已成熟多不願意又恐人多勢衆臨事搶割爭收逞兇滋鬧是係實情餘不知道等語則張國需因事糾轆起意填寫教會契紙藉以抵制雖未到堂供認實己情見乎詞伏查卑縣教堂林立城鄉各處計天主福音各堂共有二十八處之多而奉

教之民則遍地皆是雖尋常詞訟稍不慎之於始後來卽多干涉故歷年民教齟齬之案層見迭出卑職到任後遇事格外詳慎守約言理悉秉大公而又隨時仰承

憲台訓示是以得稍安輯今張國需託名教會巧佔便宜冀圖全收窮民已熟之麥寔屬有意奸欺雖例無專條而核其種種隱瞞奸欺情形實與欺隱田糧例意無稍區別可否比擬辦理以儆效尤惟此案最要關鍵在與教會有無干涉現由卑職函請福音堂教士孔好義詳細考查并面晤天主堂教士時慎修據理直陳詳述原委已據先後函復該教會委無託張國需代購公產之事均有回信備查不致再有干涉除俟奉到

撫憲批示遵辦並飭書差鄉約人等逐段查丈繪圖稟復安速

擬結外茲奉電飭所有集訊案情並接晤各教士查詢明確並無牽涉緣由理合稟請

查核批示祇遵抑將原案情形轉呈

撫憲請示辦理寔爲公便

附另稟告示查丈地畝清單

敬再稟者卑前縣趙倅於上年領回前項教堂買當房地契紙共五十張發交四鄉鄉約填用此次張國需冒名營私幸早發覺未釀重案應卽儘數追回現由卑職擬就告示遍行張貼凡有冒填教會契紙者限半月內一律交案換給民人買契官格不咎既往倘敢冒名教會冀圖爭狡藏匿不獻有意奸欺一經查出定行重辦仍將田地照例充公以彌隱患除俟將教會契

紙全數追回另行稟報外理合抄錄示稿稟請查核

計抄呈告示稿

爲出示曉諭事照得各國教士在內地租置地基以爲建堂傳教之用契內註明教會公產字樣不得列教士之名亦不准本國人民託名擅用違則嚴辦迭奉

憲飭遵行在案上年經趙前縣領回教會當賣契紙共五十張飭發四鄉鄉約存爲教會購置公產之需今張國需假冒教會名目置產立契事經發覺業已稟明詳查訊辦惟所餘四十九張已由趙前縣發給各鄉約領用尙未全數繳回誠恐有刁狡之徒有意奸欺輒以房地糾轉託名影射滋生事端殊於教會規章大有妨碍合行諭示爲此示仰軍民人等一體知照凡爾

等置買房地倘有填用教會契紙冒名執業者統限半月內一律繳案聽候查驗換填民人契格投稅不咎既往如有故違藏匿意存狡執一經查出或被告發定行傳案照例究懲并將田地入官以充公用毋貽後悔切切特示

爲遵諭丈明稟覆電奪事緣書等遵奉

憲諭飭將張國需置買呂文獻等房地二頃六十畝是否相符查丈稟覆書等遵卽協差到彼邀同該處首事黃體仁許希杰地方杜恒謙鄉約王春榮楊慶雲及伊佃戶王秀章朱勞大指明地段書等按段逐一查丈明確共計地二百六十四畝七分六厘九毫書等只得開明清單稟覆

仁憲電奪爲此叩乞 批示祇遵

批稟單均悉卽飭該書等加具切結備查

計開地畝單

門前南邊地東西畝一段 橫二十一弓二尺 順三十弓

積六百三十六弓 計地二畝六分零五毫

河南地南北畝一段

南橫十七弓四尺 北橫十弓一尺

折十四弓 順一百零八弓

積一千

五百一十二弓 計地六畝三分

河南騎拉路地南北畝一段

南橫十一弓二尺半 北橫十三弓二尺

折十二弓四尺 順八十九

弓一尺

積一千一百零五弓三尺 計地四畝六分五厘五毫

頂河地南北畝一段

橫三十三弓 順四十弓

積一千三百二十弓 計地五畝五分

頂溝地南北畝一段

南橫十六弓四尺 北橫十五弓

折十五弓七尺 順六十八弓

積一千零六十八弓一尺 計地四畝四分五厘一毫

井南地南北畛一段

南橫九弓二尺 北橫十弓二尺 折十弓 順八十四弓

積八百四十弓

計地三畝五分

刀把地東西畛一段

橫二十三弓三尺 順四十八弓

積一千一百一十八弓四尺

計地四畝六分六厘

騎拉路南北畛一段

南橫五弓一尺 北橫四弓四尺 折五弓 順一百四十八弓

積七百四十弓

計地三畝零八厘三毫

南岡地東西畛一段

東橫五弓 西橫六弓 折五弓五尺 順一百四十一弓

積七百七十六弓

計地三畝二分三厘三毫

又南岡地南北畛一段

南橫九弓二尺 北橫八弓三尺 折九弓五寸 順九十一弓

積八百二十四弓零五寸

計地三畝四分三厘五毫

南田地南北畛一段

橫五弓一尺 順三十九弓二尺五寸 又橫十四弓

順十弓二尺 積二百弓零一尺七寸 計地八分三厘四毫 積一百四

十三弓三尺 計地五分九釐七毫

頂河坎地東西畛一段 共計地一畝四分三厘一毫 橫十九弓 順八十八

弓 積七百九十二弓 計地三畝二分

南田窩地東西畛一段 橫六弓 順四十五弓一尺

積二百七十一弓一尺 計地一畝一分三厘

短古路地南北畛一段 橫十八弓四尺 順二十六弓

積四百七十八弓四尺 計地一畝九分九厘三毫

斜尖地一段東西畛一段 橫七弓一尺五寸 順六十四弓

積四百五十八弓一尺 計地一畝九分零九毫

八畝地東西畛一段 東橫二十五弓四尺五寸 折二十七弓二尺二寸五分

西橫二十八弓

順六十八弓一尺

積一千八百五十四弓零二寸 計地七畝七分二厘五毫

四方地南北畛一段 橫二十三弓二尺 順五十一弓

積一千一百八十三弓二尺 計地四畝九分三厘

又四方地南北畛一段 南橫十二弓 北橫十弓二尺五寸 折十一弓一尺二寸五分 順五

十一弓二尺 積五百七十弓零一尺八寸 計地二畝三分七厘五毫

葛庄西地東西畛一段 東橫二十六弓四尺 西橫二十六弓二尺 折二十六弓三尺 順七十二弓

積一千八百九十四弓一尺 計地七畝八分九釐二毫

又葛庄西地東西畛一段 東橫十六弓三尺 西橫十五弓二尺 折十五弓七尺 順一百一十八

弓 積一千八百五十三弓一尺 計地七畝七分二厘五毫

羅池蓋地南北畛一段 橫四弓 順五十六弓

積二百二十四弓 計地九分三厘三毫

家東南地南北畛一段 橫八弓一尺 順五十七弓

積四百六十二弓二尺 計地一畝九分二厘六毫

石碑東地南北畛一段 南橫十六弓 北橫二十六弓 折二十一弓 順六十弓

積一千二百六十弓 計地五畝二分五厘

石碑西地南北畛一段 橫三十六弓 順四十四弓

積一千五百八十四弓 計地六畝六分

飯舖後地東西畛一段 東橫三十三弓三寸 西橫三十一弓 折三十二弓一尺五寸 順七十

九弓 積二千五百四十弓零三尺五寸 計地十畝零五分八厘五毫

郭橋地東西畛一段 橫四弓二尺 順一百三十六弓

積五百七十二弓二尺 計地二畝三分八厘

溝邊地南北畛一段 橫四弓 順六十八弓

積二百七十二弓 計地一畝一分三厘三毫

長畛地東西畛一段 東橫五弓一尺 西橫六弓四尺 折五弓七尺五寸 順二百零五弓二尺

積一千一百八十弓四尺一寸 計地四畝九分一厘八毫

王庵門地東西畛一段

東橫十九弓四尺
西橫十九弓

折十九弓二尺

順六十七弓

積一千二百九十三弓一尺

計地五畝三分八厘八毫

王庵東地南北畛一段

南橫六弓二尺
北橫七弓

折六弓六尺

順一百零五弓

積六百九十三弓

計地二畝八分八厘八毫

東田地南北畛一段

南橫三十三弓
北橫三十三弓四尺

順六十七弓一尺

積二千二百二十八弓二尺二寸

計地九畝二分八厘四毫

東田上頭地南北畛一段

南橫三十六弓
北橫三十七弓二尺

折三十六弓六尺

順一百零八弓

又東田上頭地南北畛一段

南橫七弓
北橫六弓二尺

計地十六畝四分七厘二毫

六弓二尺

折六弓三尺二寸五分

順九十六弓二尺

積六百三十五弓四尺二寸

計地二畝六分四厘八毫

密門地東西畛一段

東橫三十二弓
西橫三十一弓

折三十一弓二尺五寸

順一百零二弓

積三千二百一十三弓 計地十三畝三分八厘七毫

陳茨撰地南北畛一段 南橫九弓二尺 北橫九弓 折九弓一尺 順一百零二弓

積九百二十八弓二尺 計地三畝八分六厘七毫

下凹地南北畛一段 南橫四十八弓二尺 北橫四十二弓 折四十五弓一尺 順六十四弓

積二千八百九十一弓四尺 計地十二畝四分七厘

密南地南北畛一段 南橫五十三弓 北橫五十四弓二尺 折五十三弓六尺 順七十一弓

積三千六百九十八弓四尺 計地十五畝四分一厘

橋莊塊地南北畛一段 橫三十三弓二尺 順七十一弓零三尺

積二千三百六十七弓一尺六寸 計地九畝八分六釐三毫

楊橋後流地南北畛一段 南橫四弓二尺 北橫五弓二尺 折四弓七尺 順九十七弓

積四百五十六弓四尺 計地一畝九分零一毫

頂頭流地南北畛一段 南橫二弓四尺五寸 折二弓四尺七寸五分 順一百

四十一弓 積四百二十三弓 計地一畝七分六厘二毫

騎拉稍路地南北畛一段 南橫十二弓一尺 折十二弓五寸 順五十七弓

積六百五十八弓三尺五寸 計地二畝七分四厘三毫

北凹地南北畛一段 南橫三十二弓一尺 折三十弓一尺五寸 順一百零二

弓 積三千七十五弓三尺 計地十二畝八分一厘三毫

庄東地南北畛一段 橫九弓一尺 順一百四十一弓三尺

積一千二百八十六弓三尺三寸 計地五畝三分六厘

小河灣地南北畛一段 南橫二十二弓 折二十一弓 順三十一弓

積六百四十一弓 計地二畝七分一厘二毫

庄西地東西畛一段 東橫六弓 折五弓五寸 順三十四弓

積一百八十七弓 計地七分七厘九毫

又西地東西畛一段 橫三弓二尺 順三十四弓

積一百一十弓 計地四分六厘三毫

騎拉河地南北畛一段 橫二十弓 順六十弓

積一千二百弓 計地五畝

宅基連場地南北畛一段 南北橫折四十七弓五尺五寸 順六十二弓

積二千九百四十八弓一尺 計地十二畝二分八厘三毫

內除王薛二家坑場地二畝六分六毫下計地九畝六分七厘七毫

南凹地斜畛一段分三塊量橫十七弓三尺順四十弓橫三十七弓二尺順六十

三弓 積六百九十六弓 計地二畝九分 積二千三百四十四弓 計地

九畝七分六釐七毫 橫十六弓六尺 順二十四弓 積三百九十八弓四

尺 計地一畝六分五厘八毫 共計地十四畝三分二厘五毫 共合地二百

六十四畝七分六厘九毫

本府札奉交涉局轉奉巡撫部院吳 批稟摺均悉該縣民張國需置買房地計原價四千九百串爲欸甚鉅何以填用教會公產官契紙且年月不符種種情節可疑是否暗有洋商資本託名影射抑係爲教會輾轉購買顯有不寔不盡自應詳查確無別項情弊方能准予稅印仰交涉局會同布政司轉飭該縣速傳原業主呂文獻等及買主中證鄉約人等到案質訊明確稟復核辦至此項教堂買當房地契紙該前署縣趙倅預發各鄉約填用殊屬不合應由該縣一律收回隨時酌核給領究竟已填未稅之契共有幾張並飭查明具報以重交涉此繳摺存按察司惠 批據該縣稟縣民張國需託名教會置買田產接晤各教士查明委無牽涉憑有回信請鑒核稟由奉批此案張

國需置買田產舍官契紙而不用竟行私用教會契紙增寫買價畝數希圖搶收早麥實屬狡詐多端應否比照欺隱田糧之例懲辦既據逕稟仰南陽府飭候

藩司交涉局批示至教堂置買公產並不多見需用契紙不難到縣請領該前縣趙倅將領回教會契紙全行發交鄉約殊屬不知輕重該縣現經如數追回並出示曉諭凡有悞用者准其呈明更換所辦甚是並飭迅速認真辦理繳示稿存

會訊張國需價買呂文榮等田房託名教會填用契紙匿不到案稟

敬稟者竊卑職世勳接奉

臬憲 交涉局

會札以據卑縣稟縣民張國需託名教會置買田產接

晤各教士查明委無牽涉憑有回信可否將原案情形轉呈撫憲請示飭遵等情一案飭即會同該縣提集張國需呂文燦等切寔研訊呂文燦等是否因找價未遂串通張圖需私用教會契紙希圖挾制以及有別項重情務須研究明白分別擬議稟候察奪等因遵卽束裝馳抵唐縣會晤卑職祥保同時接奉前因遵查上年四月間趙倅師第在任時請領教會契紙發交四鄉兼充產行之鄉約分售填用本年三月杪縣民張國需之孫文生張成鐸執持買契到縣投稅經卑職祥保查係填用教會公產官契格紙年月不符契內填寫買主姓名及地畝四至亦與定章違背隨經查訊此項契紙係該文生張成鐸赴房託由庫書轉購鄉約孫萬興名下領未用完之紙自行填寫亦未由鄉約

憑同丈量以及地價畝數種種歧異在唐傳教各教士亦未託張國需代購教會公產委與教堂毫無干涉均與卑職祥保先後稟陳情形無異契據供單各教士復信暨核對張成鐸筆跡字樣均粘在卷可備查核該文生於集訊後當交儒學看管飭候批示一面飭據工書丈明所買之地共計二百六十四畝七分六厘九毫逐段開具工尺清單稟復各在案奉委前因遵卽飭差傳集一千人證訊奪乃張成鐸已先期在學承間潛逃移准兼攝唐縣教諭李作霖牒稱前來而買戶張國需賣戶呂文榮呂書進等亦各出外不家避不到案隨添傳張國需之子張敬修與賣戶呂文獻當戶邢立名邢立信暨中人鄉約等質訊連日會同悉心研鞫據張敬修供稱承買呂姓地畝伊在窩庄倉

房修房不家悉由伊父張國需議價承買伊姪張成鐸如何自填教會契紙赴房投稅伊均不知伊父現往漢口伊姪現在何處亦不知道賣戶呂文獻則供稱此地由其先人當與邢姓又由邢立名等先人轉當四十多家現在邢立明等無力承買轉當戶雖多愿買因零星不便出賣故邀中趙應銅等向張國需議價出賣自去年十月說起至今三月始妥原價每畝十八串文合錢四千六百八十串文又添補錢串格外人情共二百二十串文是以與草約不符彼時張國需欲自己找買契紙故未邀鄉約丈量伊如何自行填用教會契紙伊全不知呂文榮呂書進等前次查訊後卽赴漢貿易不家中人趙應銅劉茂增暨鄉約孫萬興楊慶雲等各供與前訊大略相同惟當戶邢立明

等則供稱尚有麥種菀豆各種佃戶均未給還並據該處地方杜恒謙鄉約王春榮首事黃體仁許希傑等稟稱該地應收麥籽已於六月初三日由張國需向種地戶王炳振等五家將麥取歸問明佃戶屬實各等情據此卑職世勳等會查此案其中如無情弊張國需儘可到堂供明寔情乃始終避匿不案伊孫張成鐸又復在學潛逃殊不可解現據伊子張敬修供稱伊父早赴漢口賣戶呂文獻復供呂文榮等亦於前次堂訊後赴漢貿易不家該處爲華洋雜處迥商大埠所供各情詞極閃爍尤多可疑卽照呂文獻現供而論各當戶雖多愿買因零星不便出賣又云自去年十月說起至今三月始妥則事越六月之久其中展轉向贖糾轍可知証以前訊中人趙應銅等供稱張國需

因到麥熟怕當戶不叫他收麥因此說使教會契紙不叫鄉約丈量知道暨鄉約王春榮特請劉篤培送格紙他不使用各供前後參觀張國需謀買此地深畏人知種種鬼魅情形誠如憲札所謂捏寫教會置買契據希圖恫嚇鄉民實已肺肝如見况張國需近又將該地諭交鄉保首事暫行看管之麥不俟正案擬結輒向種戶私自取歸尤屬意存藐法該文生張成鐸不候批示在學乘間潛逃亦屬任意妄爲若不酌予懲處速將此案判結不獨慮閱時過久彼將另串他人出爲干涉枝節橫生且恐將來設有洋人潛入內地託名教會置買田產或奉教之人倚勢教堂捏寫教會名目逕自出名置買私產迨經查追輒以張國需成案爲藉口交涉益多棘手祇以檢查例案實無與

此案吻合專條是否卽照張成鐸前次堂供將此地充公抑應如何辦理之處未便擅爲擬議除將趙倅前發教會契紙現均設法追回另稟呈繳外所有奉委會訊張國需託名教會填用契紙置買田房匿不到案緣由理合據實稟陳仰祈鑒核俯賜訓示祇遵

會查趙倅師鼎前領教會契紙五十張分發各鄉約售用現均分別追回內少四張委係遺失無存開明號數立案稟附另單

敬稟者竊查卑前縣趙倅師鼎於上年四月在任時請領教會契紙五十張發交四鄉兼充產行各鄉約分售填用卑職詳保於本年三月內因縣民張國需之孫張成鐸持契投稅驗明種種

不符查悉前情當將查追杜患情形詳細稟陳並出示曉諭凡有民人置買田地填用教會契紙者無論已填已稅統限半月內一律交案聽候查驗換填民人契格分別投稅給執並飭各鄉約將未用各紙一律交還各在案嗣據民人薛建堂等暨鄉約李金祥等依限將前次領用教會契紙先後早繳前來查驗盡是賣契並無當契且所編字號錯亂與趙倅稟請原案不符又據庫書楊上林潘榮堂稟稱趙任請領文內雖原請當契買契各二十五張刷印局以教會官契無當契格式故全發買契五十張後發給鄉約係夾入民人契格挨編號數是以參差不齊委無別情隨將呈繳契紙各民人傳案逐一查訊類皆鄉愚無知目不識丁係由鄉約誤填誤用間有奉教之民填用爲據

亦經卑職祥保

按照例意詳爲解說亦各自知悞會照章更正並

由買戶賣戶兩造到堂供明實情均寔毫無情弊與張國需始
終匿案有心欺冒圖佔便宜者顯有區別且前經示諭聲明不
咎既往應請概免深究現已由卑職祥保等飭令赴房換填民人
契格投稅一面照章更名過割完納錢糧其已稅印者祇飭更
換契紙仍粘舊尾補印給執免再重征以示體恤計已填用者
薛建堂等三十張已稅印者李富貴等四張未填用者鄉約李
金祥等繳還共十一張除張國需一張案應另結外其餘四十
九張現已追回四十五張仍少四張查係鄉約袁振川今春病
故時該家屬別無他人不知遺失何處隨紙焚燒計失去布字
三十五號三十六號二張查無着落又鄉約王天順於趙任奉

革後所領契紙未曾交還旋即出外貿易至今未歸其妻王楊氏在家不知何物用以裱糊墻壁窗戶嗣因雨淋墻塌葺爛損失計失去布字六百十八號六百二十號兩張訊取王楊氏供明甘結在卷查驗王天順現繳各契紙多有從墻壁揭下者所供似尙可信卑職世勳與卑職祥保會同商酌趙倅前發教會各契紙現既逐一清查追回內少布字三十五號三十六號暨布字六百十八號六百二十號四張雖經查明遺失無存似應預爲立案將來無論何人拾得均作廢紙無用以免後患除將各契呈繳

交涉局註銷並抄明號數及賣買戶姓名清摺呈候備查外所有趙倅前發四鄉各鄉約領用教會契紙無論已用未用已稅

未稅現均逐一追回繳銷緣由理合據實會呈仰祈
鑒核批示立案

附夾單

敬稟者案查卑縣民張國需冒用教書契紙一案業經會委韓
令世勳將查訊情形據寔會稟在案現又續據張國需之孫張
振鐸稟稱爲情甘報効稟懇轉詳事緣童耕讀爲業毫不干外
因童邁祖張國需於今三月內同中說合一約承買楊橋庄呂
姓坡地四十八段共計二百六十畝錢價四千九百串正約清
價明現童祖外貿不家現童叔父及兄弟商議情愿報效本縣
高等小學堂培養人材爲此不敢自由只得稟懇恩電體恤賞
准轉詳以全善益永感上叩又據結稱與甘結事緣童祖張國

需於今三月內承買楊橋呂姓地二百六十畝一案蒙 恩委
會訊明確童叔父兄弟均已自知有錯悔之無及現今童等情
愿出具切結將此地盡行報効本縣高等小學堂培養人材以
後再不敢反悔不報如有反悔不報情事童情甘認罪所具甘
結是寔等情前來據此查此案前據張成鐸初次堂訊時本有
情愿捐充公用之說茲復據張振鐸續稟到案未便壅於上聞
理合據情轉稟仰乞

鑒核批示飭遵

縣民袁鎮三捏控白士林揚言殺害傳集訊明秉公斷結
並抄艾教士來函請予立案稟

敬稟者竊查光緒三十四年八月十八日據 縣民袁鎮三呈

稱本月初八日伊長子袁湘赴地看守菘豆未歸嗣伊令人喚子回家食飯見袁湘死在地中疑係暴病不防被害抬回查看伊子右面受有青腫傷痕腎囊皮破始知被害將屍葬埋因村隣白士林裕廷等與伊家早有嫌怨曾揚言殺害伊之全家情有可疑懇請詣驗究辦等情並據袁鎮三執持南陽斬崗教士艾韞禮信函一件同時投送前來拆閱信中詞意與袁鎮三呈情畧同卑職當以袁鎮三之子袁湘果係被人謀害身死既經看明屍身受有傷痕何以當時不卽來縣請驗迨棺殮葬埋以後事隔十日之久始來呈告併以艾教士之函同時投送情形大有可疑隨據理函復而袁鎮三控關人命虛實均應澈究自當訊取確切供詞指明實在傷痕部位具結開檢俾免枉縱卑

職隨傳集一千三面環質訊據白士林供稱光緒二十六年間不知何人扒毀繩庄教堂經伊說合令伊庄每家攤錢二串五百文做匾鼓樂放炮送與繩庄天主堂內事實有之至袁湘如何身死實不知情褚廷亦堅供從前與袁鎮三口角有嫌至伊子身死之處寔不知情係伊挾嫌妄告各等語究詰不疑質諸袁鎮三亦不能指出害命確據供明所受何傷兩造供詞各執諭令分別取保聽候復訊去後旋據袁鎮三呈稱前因伊子袁湘在地身死不能無疑故將白士林等呈控現經莊隣田家玉繩玉行等調處伊情甘罷訟具結懇請免驗等情具呈前來卑職伏查此案袁湘之死究竟有無傷痕袁鎮三並不立時請驗事隔旬日屍已葬埋忽執斬崗艾教士之函隨呈投送請究案

情已多閃爍且所控白士林等揚言害命亦屬無據空談三而
質審又不能將所受傷痕指出確切證據其爲懷挾夙嫌疑慮
妄控更可概見所稱屍受有傷難保非飾詞聳聽冀圖訛詐嗣
經卑職會晤卑縣天主堂教士時慎修詳述案情該教士謂袁
鎮三所控各情均屬無據空言未便任聽欺心致碍敝教名譽
業經據理開導並無閒言艾教士迄今亦無異詞既據袁鎮三
自行具結呈懇免驗情甘罷訟自應免予深究爲息事甯人之
計除將一千省釋並取具袁鎮三切結附卷外惟是卑縣民情
刁詐好訟成風往往藉屍訛詐袁鎮三又係奉教之民現雖經
卑職訊結理屈詞窮當不致另生枝節特恐他時該教民貪心
復熾聽唆妄爲不免砌詞瑣控事關交涉不敢壅於上聞所有

立案
此案訊辦情形理合照抄艾教士來函及卑職復信稟呈查核

2731

卷一

四十五

封

瓜

蘇

版

謗書目錄

卷三

江陰何震彝穆忝編次

監生趙命新上控孀婦李姚氏等丈荒退熟一案訊斷情形檢呈全卷及李姓契據懇請核示稟

趙命新續控李姚氏賄差搶禾匿不投審請飭府提訊質免釀巨案稟

會委訊結縣民李繼昌上控李滿堂等乘喪爭繼稟
訊明仝篤恭上控仝鍾元等權蠹調衅等情一案斷結情形稟

泌陽縣民張連秀被裕州糧差韓景元等串訛毆斃移屍唐境請飭裕州劉牧來縣會驗稟

會驗泌民張連秀委係中途因病身死稟
附移送犯證
歸案訊辦文
拿獲鄰境盜犯鄭錫卿解赴湖北夏口廳收審稟

會訊趙景濂遣抱上控趙海濱藉命牽誣分別質證明確
酌予議結稟

訊明縣民劉子榮誣控胞叔劉天禮殺兄賣嫂酌予坐誣
稟

查明縣民張發林上控魏廷杰同謀殺命業經前縣集訊
毫無確據分別保釋請免傳審稟

訊明張志芳越控搶傷伊父張文江身死案内首匪王善
長詳細情形抄錄全案請派營務處到縣會審稟
常全成違斷纏訟霸地抗傳請飭押發稟

武生殷萬年上控管永發羣蠹架訛一案遵批錄復稟
泌陽縣民牛進山捏控翟喜等買婚有據傳集人證訊結
坐誣稟

縣民仝清告上控楊三黑拉勸轟傷仝清舉身死一案被
告楊三黑業經奉飭保釋請免復提以省拖累稟

196



謗書卷三

監生趙命新上控孀婦李姚氏等丈荒退熟一案縣控訊
斷情形檢呈全卷及李姓契據懇請核示稟

敬稟者案蒙本府批據卑縣監生趙命新上控孀婦李姚氏等
丈荒退熟等情一案飭卽調契復訊公斷具報等因蒙此卷查
光緒三十四年三月間據縣屬孀婦李姚氏以趙志寬盤剝誑
買串訛佔地等情先後控縣經前署縣趙倅批差查丈趙志寬
抗不丈量復控批傳趙倅未及傳訊卸事卑職到任接准移交
前據原告李姚氏來縣呈催傳集一千訊緣李姚氏本有祖遺
祁宜鎮棗子莊田地七百餘畝莊房七十餘間產業豐厚家道
康裕無如翁姑早故夫亦少亡僅餘其庶祖姑呂氏庶姑黨氏

並該氏及年甫十三之夫弟四人三世孀居一男穉幼而黨氏尙在青年未能守節因與呂氏陸續變產浪用旋即改適他人當其未變產之先也有該鎮開設染坊雜貨舖之趙志寬者卽上控原告趙命新之父市僧無賴刻薄成家平日在鄉種種爲富不仁里人爲之側目涎李姓田產之肥美視孤兒寡婦之可欺乃串令李建德等爲虎作倀或借給銀錢重利盤剝或賒與貨物故昂價值百計營謀陸續折抵未及數年李姓之田產遂悉爲趙志寬所有統計地價雖有一萬一千餘串之多而李姓得其實錢不過十之二三餘則全屬扣抵甚有將李姓借欠他人帳項滙抵扣撥者帳摺纍纍可資憑證至趙志寬價買李姓田地先後七契共註明五百餘畝因其孤寡易欺概不丈量藉

作侵騙之計致使李姓七百餘畝之獨莊祖產祇賣去五百餘畝近已寸土俱無但地既坐落一莊並無他戶地畝犬牙相錯買主又祇一家亦無他人地畝夾雜則所少田地一百數十畝究歸何處是趙志寬愚弄侵佔不問可知乃被控到案集訊之下仍復妄稱地止五百餘畝毫未侵佔未免欺人太甚卑職當以趙志寬狡黠異常非逐段清丈無以折服其心非親督勘辦仍恐難杜其口隨經卑職帶同書差前往該處親履田畔督飭工書眼同兩造將地逐一丈明統丈得平原山坡田地實有七百六十二畝九分雖較李姓現執原地紅契多地數畝訊係開荒成熟似尙可信除趙志寬先後契買李姓地五百八十五畝外計尙餘地一百七十七畝九分其爲欺瞞侵佔毫無疑義當

塲繪圖註明畝數仍將兩造帶回復訊趙志寬無可狡賴始經俯首認咎當查趙志寬節次承買李姓田地價則種種取巧地則再再侵佔居心固不堪問行爲尤屬險惡本應照例究懲姑念到案後迭加訓斥已知錯過且其子趙命新代父乞恩情願退地從寬免予深究所有多佔李姓地一百七十七畝九分應卽退歸李姚氏同其夫弟李應兆爲業至其歷年收去佔地租谷計約值麥稻豆棉各價五六百千文連同李姚氏所呈由原中李建德交給益源昌欠條兩張計地價錢二百三十三千文亦應由趙志寬如數照還但查益源昌欠條並無趙志寬花押圖記趙志寬狡不認還似難深追爰酌斷趙志寬卽將第二第四第五等三段共地一百八十五畝八分退交計多地七畝九

分以抵歷年佔地租谷及欠條錢項另由趙志寬找錢三十千
文作爲地價租谷悉數全清永斷葛藤飭書將趙志寬契內註
明退地七畝零與原業主李姓並於李姓原執印契亦照註明
不必另立契約以示體恤惟查李姚氏係青年孀婦李應兆亦
童稚無知得回田產如任其自便深恐復被愚弄仍歸烏有蓋
李姓無此田產則姚氏之節卽不能保全姚氏節不保全則李
應兆幼而無依必致流落失所則李姓之似續卽絕卑職忝爲
民上理宜父母斯民觀此莞獨無依不得不加意哀矜以盡扶
弱抑強之責任乃由縣批明立案所有斷還李姓田地專爲李
姚氏守節撫孤及李應兆讀書立業之用祇准招佃稞種不准
變價浪費免生他人覬覦李應兆併卽送入初級小學堂肄業

以期上進李姚氏回家矢志守節領帶夫弟安分守度勉延李姓一線宗祧取具兩造甘結完案詎趙志寬後又翻悔違斷抗不交地經李姚氏續控飭催在案奉飭前因遵卽飭差查傳乃該原告在府未回迄不投案伏查此案趙志寬重利盤剝欺孀謀產侵佔多地按例罪有應得前經訊明僅飭退地未予深究已屬格外從寬乃仍不知悔過違斷抗交其子趙命新倚恃在郡城工業學堂肄業輒行飾詞上瀆而控後又不回縣投審藉作宕延之計實爲刁狡之尤若不傳到勒令退地照例究辦殊不足以保善良所有縣控訊斷緣由理合檢呈全卷及李姓印契經摺據實稟復

鑒核俯賜轉飭南陽縣迅將趙命新傳案押發回縣以便傳集

復訊斷報實爲公便

趙命新續控李姚氏會差搶禾匿不投審請飭府提質訊

免釀巨案稟

敬稟者案蒙本府札轉蒙

藩憲批據卑縣監生趙命新以遵批候案會差搶禾等情續控
孀婦李姚氏等一案蒙批飭遵前批先行查案稟覆一面調契
復勘訊斷報查等因查該監生前以丈荒退熟等情由府赴省
控蒙

藩憲批飭前因遵將勘丈訊斷實在情形詳細稟覆並抄錄全
案呈請飭傳押發在案茲奉前因復查該監生之父趙志寬價
賣李姚氏家田地先後七契共註明五百八十五畝草瓦房七

十間因其孤寡易欺概未丈量輒將李姓七百數十畝之獨莊
房屋全行霸佔致令寸土全無迨被呈控趙倅師鼐在任時批
飭丈量竟敢抗不照丈卑職接准移交并據李姚氏續控前來
當經親督書差眼同兩造按照李姓所執印契四至將地逐一
丈明計平原山坡田地實有地七百六十二畝九分較李姓契
証七百五十餘畝祇多地數畝訊係李姓買後開荒成熟似尙
可信然除趙志寬先後買去五百八十五畝外計仍餘地一百
七十七畝九分尙未價買安得遽謂李姓寸土全無其爲欺瞞
侵佔毫無疑義丈明後隨將一千人證帶案復訊趙志寬無可
狡辯當堂俯首認非其子趙命新亦復代父求恩情願退地卑
職當以趙志寬歷年霸收租谷計約值價五六百千文又有欠

交李姚氏地價糾轄卽酌飭趙志寬多退地七畝九分連同李
姓未賣地一百七十七畝九分共合一百八十五畝八分之數
外另找錢三十千文作爲地價租谷悉數收清地交李姚氏同
其夫弟李應兆管業并飭將趙志寬契內暨李姓原執印契分
別註明不另立約取具兩造各結附卷原斷據理判結於兩造
毫無偏袒詳細情形前稟均已叙明詎該監生涎羨產係獨莊
地又肥美居心霸佔砌詞翻案特於去冬赴府上控而控後又
不回縣投審嗣因府飭比差范春和催傳緊急又飭南陽縣查
傳押發趙命新遂匿省城商業學堂藉作上控延案之計刁狡
險惡莫此爲甚卽如此次呈內控稱串差搶禾一節查李姚氏
前屆收麥時候以該地係李姓祖遺未經價賣之產而麥卽經

官丈明訊斷退回地內之麥該氏與佃分收本與趙志寬無涉乃趙志寬豪霸性成雖經具結在案仍令佃戶赴地照舊收割而李姚氏與伊兄姚錕等氣不能平亦領多人搶收兩造佃戶人等勢甚汹汹幾成械鬥卑職聞信恐釀事端當派差役甄明雲等持票星期前往妥爲彈壓嗣據該差稟復已由伊子將姚氏應得二麥分給收訖秋禾亦已播種等情繳票銷差乃該監生任意捏控情殊不合至控稱李姚氏曾欠貨錢一千餘串未還如果實有此事歷次在縣堂訊何以均未供及捏造尤屬顯然現聞趙命新各處揚言回縣復審決難運動有效惟有匿案上控藉以遷延如再勒傳卽赴京運動買摺糾參務使卑職早日離唐俾可請託關說以遂其爲所欲爲之志明知蜚語謠傳

無足深信而久避不案顯係拖累圖翻卑職身任地方平民訟獄誰知剪除豪暴撫輯堯黎威勢禍害未便稍存顧忌若因其危言恫嚇患得患失竟於此種土豪曲爲寬縱而使孤兒寡婦冤抑莫伸不獨有負初心亦且有虧職守忝顏民上寔不忍爲第該監生趙命新與其父趙志寬自知理曲回縣質審仍由卑職復訊終不能以曲爲直是以百計避匿延不投案而此時所亟可慮者秋禾瞬將成熟趙志寬佃戶衆多李姚氏家雖無人而母家姚姓聞亦南陽巨族兩造勢不相下必致糾人爭收彈壓稍疎恐滋巨案却不得不預爲防範消弭無形因思本府袁守素勵風節執法無私此案若經提審則孰是孰非難逃明鑒必能片言折服善保孤孀而彼此糾搶禾稼之勢或聞府提質

訊之信藉可緩息思維再四惟有仰懇

鑒核俯賜派委妥員在省就近查傳該原告趙命新解交南陽府飭卽親提全案人卷質訊究斷俾免延抗爭收致釀巨案實爲公便

會委訊結縣民李繼昌上控李滿堂等乘喪爭繼稟

敬稟者竊

卑職

接奉本府札開轉奉

臬憲批據唐縣民李繼昌上控李滿堂等乘喪率搶爭繼抵罪等情一案蒙批委員會訊斷結飭卽前往會同提集一千秉公澈訊究斷等因遵卽束裝馳抵唐縣卑職祥保已先期奉飭前因隨會同傳提一千一面調齊卷宗查得已故李洪鈞其父李廣泰胞兄弟三人僅生李洪鈞一子長李長泰取繼大房李有年

三李安泰取繼四房李恒春惟三房李滿堂一支未曾出繼自李洪鈞物故族祖公議立堂姪李滿堂爲後李洪鈞之妻李馮氏意欲李有年之子李繼昌擇愛雙繼公分財產格於公議未經商妥光緒三十三年李馮氏病故族長李遇春至親馮宗異等議明輪應李滿堂過繼立約擇期埋葬李繼昌不服控經前署縣周牧未及根訊卽令已繼李有年之子李繼昌再繼與李馮氏當堂勉強具結仍復私爭不休李滿堂隨以訛繼霸產府控趙倅集案復訊族親人等僉稱李滿堂已經議繼請乞秉公斷結乃趙倅因周牧斷案在前不願改斷仍由李繼昌應繼提錢二百千爲李滿堂津貼下堂後並未具結兩造復以強分糧食奪掠財產各情紛控不已卑職到任接准移交於十月間將

原被族親一體傳案虛衷研鞠訊悉原案詳細情形當以李有年父子與李滿堂爲爭遺產結訟頻年雖迭經前縣訊斷而兩情未洽爭無已時查所爭之產業經各逞已私互相盜當花費已去其半若不速爲判結將見現遺各產瞬卽化爲烏有李洪鈞夫婦未免含酸地下因查前卷馮氏原有愛取李繼昌之意而李滿堂又輸應承繼未及定議賚志而歿雖例無雙繼之文而馮氏生前旣擬雙繼公分財產現訊族親亦復供詞相同儘可援照辦理由李滿堂過繼承祀其一切財產酌分爲二當堂開明房地清單斷令李繼昌分受韓莊地三十五畝當地二十七畝房十間過道兩間李滿堂分受地三十一畝當地二十九畝房十六間用去喪費兩造公攤各具甘結詎李繼昌不自知

一繼再繼衆論未符意在獨霸繼產藉口改斷捏以爭繼糾掠各情赴府控蒙批縣復訊於三月二十九日傳集兩造仍照前斷公分財產各具甘結已將訊斷情形稟請鑒核在案詎李繼昌於三月二十九日復訊以前聽信遠族李漢濱調唆由伊兄李甲昌捏砌前情冒名呈赴

憲轅飾控奉飭前因隨會委澈訊李繼昌迭次飾控之由因得繼產房屋已經搬住不願遷讓而現分地畝均與李滿堂毗連雖經割讓均分各管各界但兩造結訟多年難保不以細故微嫌偶爾口角別滋事端懇請另斷不再返悔等語詰之李滿堂亦願在另莊居住惟檢驗李繼昌繼約則係馮氏死後由李漢濱暗中假捏族長人等及至親馮宗異均稱不知其事未能作

爲確據且李繼昌承祀大宗別無兄弟未便兼祧小宗斷令仍將遺產各半公分李繼昌既不願將李滿堂應得房地毗連耕住飭卽將李滿堂受分房地公同估價計值錢六百千文由李繼昌如數備齊撥交李滿堂收受以作承繼李洪鈞夫婦每年祭祀拜掃之需所有李洪鈞李馮氏一切遺產均與李滿堂無干不再爭執各具甘結至差役勒逼一節嚴訊吳天亮供稱並未到過李繼昌家當堂指證李繼昌尙不認識面目其父李有年之死亦供明委係因病身死當時亦無率搶滋擾情事乃敢砌詞任意誣告李漢濱又從而調唆並敢與李繼昌赴省冒名飾控照例罪有應得姑念李繼昌迭次到案俯首認非應卽從寬免予究處天亮被告李滿堂並無逼勒率捏情弊應毋庸議

無干省釋未到免傳除取具誣告各結暨繳領各狀附卷並將
唆訟之李漢濱暫行看管候批外所有會同訊明斷結緣由是
否允洽理合稟請

查核俯賜批示銷案

訊明全篤恭上控全鍾元等權蠹調衅等情一案斷結情
形稟

敬稟者案蒙

憲札據卑縣民全篤恭上控全鍾元等權蠹調衅等情一案飭
卽集案覆訊斷報如虛坐誣等因遵卽卷查光緒三十三年四
月十八日據全篤恭以全鍾元等背親欺愚等情縣控當經周
令批准傳訊未到趙倅到任後照案差傳兩造仍未到案移交

卑職 正在換票傳訊間卽據該原告以全鍾元等權蠹惡霸等情前赴

憲轅控奉批飭傳訊等因 卑職 隨卽票差勒集一千訊明全篤恭係全篤培胞兄析居各度全篤培有分受宅地一處先經全篤恭價當光緒三十三年四月間全篤培憑中全義德等將此宅地出賣與全鍾元爲業因此宅地中有全篤恭應分房基一段全篤恭意欲併買未遂控縣准理周令及趙倅均差傳未到 卑職 到任准交據該原告砌詞府控奉批訊報遵經勒集一千訊悉前情當以全篤培自將分受宅地出賣與全鍾元爲業尙無不合惟此項宅地先在全篤恭名下承當全篤培既未預行備價贖回書立賣契時又不邀會全篤恭到場退取當約亦屬

非是且此宅地內尙有全篤恭應分房基一段雖其已經將房折去而基礎仍在究有糾轄斷令全篤培先向全篤恭服禮一面將當價銀六兩錢二十四千文除全篤恭酌讓三千文外全篤培實交錢二十一兩銀六兩以清當價將約塗銷全鍾元所買宅地中既有篤恭房基一段飭令另給錢文以斷葛籐取具甘結在卷奉飭前因伏查此案業經訊明全篤培賣產係屬出自情愿全篤恭房基亦經斷令全鍾元出給錢文具結有案該原告因爭買未遂一再砌詞上瀆實屬刁狡至全鍾元係卑縣刑房經承此案因家務爭執係由禮書承行該書房並不承辦此案全篤恭上控朦蔽弄權各節尤見飾詞聳聽除傳集覆訊究斷另文具報外所有訊斷情形合先錄覆查核

泌陽縣民張連秀被裕州糧差韓景元等串訛毆斃移屍
唐境請飭裕州劉牧來縣會驗稟

敬稟者光緒三十四年七月二十二日據泌陽縣民張玉含呈
稱伊堂姪張連秀有業地三百二十畝當於郭勞八爲業本月
連秀向郭勞八求售因價未議妥遂將地議賣與王懷仁爲業
本月十五日赴彼寫約郭勞八同其叔郭勞五勾串裕州糧差
韓景元曹世俊趙永錫等將連秀帶至唐境下窪復至裕境高
庄伊姪被撈被毆沿途受熱當於十五日晚在高庄斃命經高
庄人將趙永錫獲住並將伊姪屍身移至下窪小火神廟內伊
聞信往看屍身髮辮揭落一縷左臉受有掌毆青傷並將趙永
錫送案等情據此當將趙永錫飭收候審公所本當馳往相驗

惟卑職甫由東鄉相驗回署在路感受暑氣寒熱交作未能前往當委卑縣典史前往看明是否屍在唐境抑在裕境並飭差往場將屍身看守正在申請隣封相驗間接准裕州移開光緒三十四年七月十六日訪聞敝州催糧差役趙永璽等因花戶張連秀抗欠新舊錢糧不完赴鄉往催將張連秀尋獲被王世祿等奪回唆令張連秀自吞洋煙並將趙永璽緝送唐境情事正在查傳間卽據敝州平新里經管錢糧快班總役韓景元稟稱緣小的承辦本里糧銀情因何莊花戶張連秀應完張義和張成功張光耀三人戶名糧銀甚多張連秀仗所居之莊與唐縣交界累抗不交塌欠陳糧一兩二錢九分一厘又欠本年新糧銀三兩零五厘屢次刁抗分厘未完本月十五日聞其賣地

有錢隨着班役趙永璽曹士俊又往催納找見張連秀卽邀令趙永璽等同至唐境下窪街朱姓飯舖旋經首事郭姓王姓攔管令其交糧張連秀仍前兇抗趙永璽卽令張連秀隨同進城完繳不料張連秀至戚王世祿王七聞知率領多人將張連秀當時奪回並唆令張連秀吞食洋烟希圖逞刁訛賴更將班役趙永璽等一併細綁送交唐案懇乞作主等情據此除批示外提訊該總役韓景元供與原稟無異外查張連秀應完新舊糧銀屢次抗欠不納本屬不合迨經差役趙永璽等往催猶復刁抗實係咎有應得乃其至戚王世祿王七等竟敢唆使張連秀吞腹洋煙後復將催差趙永璽等細赴唐境不知王世祿等是何居心惟王世祿等旣已唆令張連秀抗糧吞煙並將差役趙

永璽等業已緝送冰案敝州既先訪聞其情應請貴縣秉公訴辦等因並據卑縣典史回縣面稱前往看明屍身委在唐境已經發變微腐遵已飭差往塲將屍身妥爲看守等語查屍親來城報案已隔七八日顯有在下私和未了情事惟並未指稱吞烟自盡所指傷痕僅係左臉掌毆微傷而裕州來移則有死者吞服洋煙希圖訛賴之語案關差役傳人致斃非驗訊明確不足以昭折服惟此案係裕州差役而張連秀之死又在裕境死後移屍卑縣似應會同裕州相驗卑職病勢現已少可支持除移知裕州定期會驗外理合稟請

鑒核俯賜札飭裕州來縣會同相驗詳報實爲公便再此案原被均係泌民而要被韓景元係裕州糧差驗明後似應歸裕州

詳報訊辦抑或由泌陽會驗審辦之處併乞

批示祇遵

會驗泌民張連秀委係中途因病身死稟

敬稟者光緒三十四年七月二十二日據泌陽縣民張玉含呈稱伊堂姪張連秀因拖欠糧銀本月十五日被裕州糧差韓景元等傳帶行至裕境高莊因病身死經高莊人將趙永錫獲住並將伊姪屍身移至唐境下窪小火神廟內伊聞信往看屍身髮辮揭落一縷左臉受有掌毆青傷並將趙永錫捉獲送案等情據此當經稟蒙

憲台札飭裕州會驗

卑職祥保

當卽帶領刑仵馳往

卑職敬傳接奉

札飭亦卽帶領刑仵過境親詣該處勘得下窪寨南牆外有火

含送案並將連秀屍身移至唐境小火神廟內各等供據此察核供詞查與該役韓景元在州原稟情節多不相符除將一千人證暫由卑職祥保帶回訊明移歸卑職敬傳將韓景元等從重懲辦另行稟報外所有會同驗訊情形理合稟報
鑒核立案

附移送犯證訊辦文

為移送事案據泌陽縣民張玉含呈控郭勞八等串同糧差韓景元抓撈斃命等情一案當經會驗情形稟報在案茲蒙府憲批據稟已悉此案現據該牧令等會同勘驗訊明張連秀係屬泌民因拖欠裕境寄莊地畝糧銀由裕差趙永錫等傳帶訊追行至裕境高莊地方張連秀因得急病身死雖被高莊無知鄉

民私將該屍移送唐境空廟照例仍應歸裕州審辦仰唐縣卽將此案一干備文移送裕州訊明核辦勿延並移裕州知照此繳等因蒙此查此案前經敝縣提訊據韓景元供張連秀拖欠糧銀伊將新舊糧票均已交還衙署等語而曹士俊所執則係光緒八年業經豁免之糧票屍親藉此狡執究竟是否欠完新賦糧銀應歸何人完納敝縣無從查悉茲奉前因除申覆外所有此案覆訊供詞呈驗糧票及原被人證擬合備文移送爲此合移

貴州請煩查收辦理施行

拿獲鄰境盜犯鄭錫卿解赴湖北夏口廳收審稟

敬稟者竊卑職抵任以來卽訪聞卑縣盜匪鄭錫卿兄弟二人

在外肆行搶掠以卑縣爲窩頓駐足之所卽派差往拿詎該匪消息靈通聞風逃遁七月二十一日晚訪聞該匪鄭錫卿自外回歸當卽選派幹役加派隊勇不動聲色連夜馳往掩捕詎該匪負隅抗拒正在格鬥間適湖北夏口廳派出隊勇踵至協同擒獲並起出贓衣五件帶案提訊據供在湖北夏口廳境內同其弟鄭錫志聽從楊麻子強劫章玉亭家得贓不諱嚴詰在本境並無另犯搶劫別案除加派勇役將該犯同起出贓衣解赴湖北夏口廳收審並飭差勒緝其弟鄭錫志務獲外所有協獲隣省盜犯緣由理合稟請

鑒核俯賜轉飭咨明

湖北督憲轉飭夏口廳歸案審辦

會訊趙景濂遣抱上控趙海濱藉命牽誣分別質證明確
酌予議結稟

敬稟者竊卑職敬傳接奉本府

札奉

臬憲批唐縣文童趙景濂遣抱呈控趙海濱藉命牽誣一案飭
卽馳赴唐縣會同勒集人証研訊確情擬議稟報察奪等因遵
卽束裝馳抵唐縣早職祥保亦接奉前因遵卽卷查此案趙景濂
與大功堂弟趙景普因買鴨娃起衅彼此口角爭吵業已經人
勸散午後趙景普酒醉至趙景濂門前辱罵趙景濂妻姪喬書
善出來勸解被趙景普用棍將喬書善手腕打傷喬書善奪棍
將趙景普毆傷倒地旋卽殞命喬書善到案供認毆傷趙景普

身死不諱惟屍親趙景武堅稱係趙景濂下手毆傷兩造供詞各執卑前縣均未報獲犯將趙景濂喬書善分別管押詎喬書善旋於光緒三十二年二月二十六日在押病故前據趙海濱以趙景濂逞兇毆斃趙景濂以趙海濱藉命狡訛各等情赴府道暨撫臬各憲衙門互控奉批提訊卑前縣趙倅師肅提訊趙景濂供仍如前趙海濱供稱伊父趙景普實被趙景濂下手毆傷斃命賄買喬書善頂案互相狡展未能議結將提訊情形分別稟復奉批飭訊各在案卑職祥保到任遵提趙景濂研訊堅執如前差傳全案人証未到奉飭前因遵卽勒集一千質訊據趙海濱供稱伊父趙景普因買鴨娃與趙景濂口角已經人勸散嗣伊父復赴趙景濂門前辱罵被趙景濂喝令喬書善用棍將

伊父毆傷身死質之趙景武供稱伊兄趙景普受傷之時伊未
在場親見據趙景濂供稱打降時伊不在場並無喝令情事喬
書善將趙景普毆傷身死伊將喬書善送案管押病故差役亦
無向伊勒索錢文情事伊因在押時喬書善病故差役李玉振
逼令領屍看待不好纔將差役控告各等供據此伏查此案已
懸擱數年趙景普實死於喬書善棍毆一傷屍親業已承認而
死者係趙景濂大功堂弟卽使趙景濂在場主使屬寔按律罪
止擬流現在正兇喬書善已在押病故趙景濂亦應減等擬徒
現雖主使一層趙景濂堅不承認而屍親則抵質甚堅若遽將
趙景濂釋放不獨難於折服該屍親之心且恐回歸同居一處
別滋事端况趙景濂係首先肇衅之人而喬書善又係趙景濂

妻姪當互毆之時並不力爲喝阻究屬咎有難辭可否酌量將該犯趙景濂按照新章收所習藝三年照章釋放差役等並無索賄情事應毋庸議趙景武趙海濱因案牽控多人亦有不合惟究有痛兄痛父情切亦請從寬免予置議所有會訊擬議緣由理合會稟

鑒核批示祇遵

訊明縣民劉子榮誣控胞叔劉天禮殺兄賣嫂酌予坐誣
稟

敬稟者案蒙本府札奉

升撫憲批本府稟復卑縣民劉子榮上控分居胞叔劉天禮害兄賣嫂等情一案飭將劉子榮從重懲辦稟報查考等因並蒙

本府飭南陽縣將該原告劉子榮押解到縣復經移准湖北棗陽縣復稱光緒二十三年四月間並無劉天仁在縣境被害呈控案據移復前來卷查此案劉子榮故父劉天仁與劉天禮係同胞兄弟析居各度劉天仁於光緒二十三年四月間携帶銀兩出外買牛行幸湖北棗陽縣境遇賊劫去銀兩並被拒傷身死當經劉天仁長子劉子剛前往將靈柩搬回埋葬維時劉天仁繼娶再醮之婦尙氏生子劉子榮等兄弟四人均在髫齡與前房子劉子剛劉子成弟兄二人不甚和睦析居各炊劉尙氏扶養其子劉子榮等過度迨後將產蕩費殆盡遺地三十畝有零央中人說合當與夫弟劉天禮耕種劉天禮拖欠其地價五十五串文未清劉尙氏未能貞守携其幼子自行改適與孔繁

照爲室旋又在孔繁照家背夫私逃復改嫁於趙姓爲室及劉子榮成丁思念伊母未能探明下落悞聽傳言以害兄賣嫂無據空言屢控其胞叔劉天禮經卑前縣胡令開元差傳未到隨以前情由府控蒙本道飭委周令景棠到縣訊明劉子榮控情毫無証據維時尚不知劉尙氏後嫁之處因念其痛父思母從寬未與究誣劉天禮短欠其地價未清斷令退給地五畝田三畝取給稟銷嗣劉子榮查明伊母劉尙氏下落復以前情節赴憲台衙門控蒙飭府委員王令程鵬會同說明稟蒙
臬憲批飭銷案各在卷茲奉前因卑職提訊該原告劉子榮一味刁狡復經酌傳被証劉天禮等並其母劉尙氏卽趙尙氏到案逐一質訊僉供劉大禮並無謀害其兄劉天仁情事其劉子

榮之母劉尙氏卽趙尙氏係屬自行改嫁亦非劉天禮架賣質之劉尙氏卽趙尙氏供亦無異再三環質該原告劉子榮捏詞上控兩次訊誣未予反坐該原告遂視上控爲得計纏訟不休自應遵照

憲批照例反坐以遏刁風查例載誣告人罪罪未決者杖一百流三千里加徒役三年等語此案劉子榮誣告期親胞叔其情較控平人爲重所控伊胞叔劉天禮謀害胞兄身死如果屬實劉天禮罪干凌遲亦與誣告尋常死罪不同若僅照例反坐擬流加徒似嫌輕縱可否將該原告劉子榮從重酌加監禁十五年以示懲儆屆時查看情形再行稟明辦理除仍將該原告劉子榮羈禁候示並將一千省釋外所有說明酌擬緣由理合稟

請

大帥八鑒核批示祇遵再此案因備文赴棗陽縣移查昨始准復是以稟辦稍稽合併聲明

查明縣民張發林上控魏廷杰同謀殺命業經前縣集訊毫無確據分別保釋請免傳審稟

敬稟者案蒙

憲台批據卑縣民張發林上控魏廷杰卽魏大少等同謀殺命等情一案飭卽先行查案稟覆一而比緝究報等因遵卽卷查光緒三十三年十二月間卑前署縣趙倅任內縣屬陡溝地方有一無名男子訪係張發林堂姪張瑞屍身飭由里保詳查報驗等語往查屬實合報驗緝並據張發林具呈到縣當經趙倅

帶領刑件親詣埋屍處所飭令指明坟墓刨土開棺驗明張璫
委係受傷身死查拏兇犯無獲照例填格錄供通詳在案惟此
案屍親張發林屢控伊姪張璫係被魏廷杰等謀害身死復經
趙倅傳集一千訊據魏廷杰卽魏大少供稱已死張璫前曾在
伊家傭工嗣卽因事辭退至其如何被人致傷身死實不知情
等語再三究詰堅供如前質諸所控同謀害命之楊四樓等亦
極口呼冤趙倅當以張璫前雖在魏廷杰家傭工但早經辭退
平日並無仇怨何致遽加殺害該屍親亦不能指出害命確切
証據豈能僅憑一面之詞致滋冤濫諭令魏廷杰等當堂取保
聽候另緝正兇究辦至楊四樓一名因張發林供稱前曾有與
張璫同場飲酒情事暫交習藝所看管一面查詢並無其事旋

因患病亦經趙倅取保省釋各在卷奉飭前因伏查此案張璫身死之處業經_卑前署縣趙倅集質訊明與魏廷杰等無涉應請免再傳審以免拖累無辜除由_卑職趕緊比差勒緝此案逃兇務獲究報外所有此案驗訊情形理合遵飭錄復稟請
查核

訊明張志芳越控搶傷伊父張文江身死案內首匪王喜
長詳細情形抄錄全案請派營務處到縣會審稟

敬稟者宣統元年五月十三日蒙

鎮憲照會以據毅軍後哨馬隊獲送唐縣民人張志芳指控槍傷伊父張文江斃命案內匪首王喜長一名飭卽查收研訊懲辦等因並將王喜長派勇押發到縣原告張志芳亦來案投到

遵即查明卷宗提集原被詳細嚴鞫緣此案張志芳於本年二月初四日來縣以夜掠兇傷等情呈報卽經卑職再三盤詰並因公便道親赴該莊查勘委無被匪搶掠情事祇草屋門前擔上有圍圓尺餘大火焦痕跡究竟何人燃燒地方既未稟報隣佑亦不知悉張文江傷在何處亦未呈驗准經訪緝迨二月十三日張志芳來案續呈據供張文江因傷身死卑職當堂諭飭詣驗而張志芳又復一再懇求免驗堅稱屍棺殮埋復經查據前後各莊鄰佑咸謂張文江實係病死隨卽查照案情逐一批駁至所控匪首王喜長平日有無爲匪情事移請南陽縣查明見復各在案茲奉飭發質訊張志芳王喜長供詞各執控關盜匪罪應斷首虛實亟應澈究王喜長係南陽縣人是否良民抑

係著名刀匪據供承種馬營馬常松馬殿章家田地村長牌頭均知其安分無過張志芳家如何被掠草屋如何燒焦一片均不知道現因張志芳糾約李寨史紀明等將伊牛及衣物撈去前赴南陽縣呈報甫進南陽城門爲張志芳呼喚毅軍將伊拘案等語察核供詞與張志芳所控情節迥異罪名出入大相懸殊未便草率問擬除由 卑職 趕傳該莊地保及馬營田主馬常松馬殿章等到案訊明并杏樹莊隣佑人等詳細核辦外謹先照抄全案呈請

府憲轉請

鎮憲委派營務處到縣會訊抑由

憲台札飭南陽縣查明王喜長村長牌頭取具是否匪徒抑係

良民實據申復親提審辦理合稟請

鑒核俯賜恩准施行以免枉縱實爲公便再此案前因訪查及訊供各情前後多未符合張文江屍身業已殮埋無由詣驗是以未經通報理合聲明

常全成違斷纏訟霸地抗傳請飭押發稟

敬稟者竊查_卑縣民常建本與常全成因爭奪地畝在歷前縣任內纏訟多年屢斷屢翻光緒三十三年二月間_卑前署縣周令任內復據常全成來案具控周令批准傳訊未到代理縣趙倅到任接准移交比差勒集一千訊據兩造供詞各執諭飭工書前往控爭處所逐細查丈繪圖稟復到縣趙倅復集訊明當以常全成所爭之地據稱係在臨莊北邊而按圖指証此地實

在西南唐河之灣已屬不符且查明此地係河灘所淤本爲官地兩造任意纏訟永無底止均屬非是衡情酌斷諭令將河淤出之地約六畝餘歸入卑縣學堂充公另行招佃納租以作常年經費而息訟端取具兩造甘結在卷詎常全成並不遵斷將地交出仍行霸種卑職到任後節經飭令遵斷交地常全成一味抗違並與互控之常建本兇毆滋鬧現據續控到縣飭差傳追躲匿不到實屬異常刁狡訪聞常全成素稱健訟鄉里側目縣案纍纍現有赴府砌詞上瀆之說除仍由卑縣勒差查傳外理合稟請

查核如常全成砌詞赴

轅具控俯賜札飭南陽縣押發下縣以便訊辦

武生殷萬年上控管永發羣蠹架訛一案遵批稟

敬稟者案蒙

憲台批據卑縣武生殷萬年呈控管永發等羣蠹架訛等情一案飭卽錄案稟覆等因卷查此案先於光緒三十二年四月據壯役管永發以武生殷萬年恃矜狡佔並據武生殷萬年以管永發惡霸古路暨縣民李金生之母李張氏以穆吉祥等強賃盜賣各等情互相牽控卑前縣胡令周令趙倅均未訊結移交卑職勒傳一千集証訊明緣李金生有祖遺市房一處坐落署前於光緒十五年賃給已故戶書穆吉祥居住每年賃錢二十四串三十二年四月穆吉祥視李金生居住遠鄉私將市房賣給殷萬年管業是房與壯役管永發比隣管永發因殷萬年來

往行車走伊宅基地內向阻口角互控維時李金生患病伊母李張氏查知盜賣情節亦以強貸盜賣等情控經卑前縣胡令併案差傳未到移交前署縣周令比據原差稟稱李金生患病難傳先將殷萬年等傳集質訊殷萬年所買市房前門雖通車道惟後門行車必由管永發地基走過然出入亦非一年諭令殷萬年偶而行車則可究不能常川行走致與管永發宅房有碍而管永發亦不得藉詞阻攔先行取結附卷至此房是否李金生祖業賃給穆吉祥居住盜賣俟李金生病愈到案再行訊斷時閱兩年官易兩任均未訊結移交卑職勒傳集訊李金生執有此房老契可憑確係穆吉祥賃住盜賣殷萬年以穆吉祥業已物故推不知情而穆吉祥之孫穆留長貧無立錫亦難責

令照價回贖雖查已故穆吉祥呈內狡稱用價一百六十千文
由李張氏已故庶姑李賈氏手承當現經訊明既無當約又無
憑據顯係捏詞狡賴即使承當屬實究竟是當非買亦不應私
行盜賣卑職以殷萬年買此市房原價二百六十千當時不將
根底查清已屬咎由自取嗣又在空基地內添蓋瓦房一節尤
屬疏忽斷令李金生按七折備價一百八十二千文繳庫給領
飭將舊有草瓦房十六間贖回其宅基空地殷萬年新添之瓦
房卽歸殷萬年永遠爲業至下短三成賣價錢七十八千文姑
候穆留長有錢再行歸還殷萬年清欸並令殷萬年於兩月內
贍交李金生舊房永斷葛籐取具各結限狀在案詎殷萬年仗
恃武生健訟之能延不領價亦不贍房致被李金生之母李張

氏迭次控追反挾管永發阻路之嫌捏以羣蠹架說潛赴
憲轅呈控奉批前因所有訊斷情形理合錄案稟請

鑒核

泌陽縣民牛進山捏控翟喜等買婚有據傳集人証訊結

坐誣稟

敬稟者案查前據泌陽縣民牛進山由府轅赴

前道憲行轅呈控卑縣民翟喜等買婚有據惡棍利婚各等情

一案奉批嚴訊究報等因卑前署縣趙倅師鼎未及傳到移交

卑職迭次比差勒傳一千集訊緣卑縣民翟光義居住唐泌交

界地方爲伊胞姪翟喜聘娶王志瑞卽王勞五之女王氏爲妻

光緒二十八年四月初四日晚王氏因赴隣村看戲失路致波

泌陽縣民牛進山誘拐伊家強逼成婚翟喜與王志瑞因查無下落貧苦無錢並未控究三十二年五月十二日王氏私自逃回王志瑞家探望王志瑞隨即通知翟喜領回團聚翟喜因牛進山係屬無賴恐有後患即於十三日來縣具呈備案牛進山之兄牛得山亦以翟喜等久賣串訛等情控經卑前縣胡令傳訊未到移交前署縣周令書麟於是年九月初二日傳集質訊翟喜王志瑞均供並無圖財嫁賣情事王氏則稱係被牛進山黑夜誘拐而牛進山堅供實係憑媒文修謙翟十黑買娶供詞各執周令諭飭一千取保一面添傳媒證質訊確究牛進山不候質訊卽予是年十二月央媒戴二洋裝說合得錢四十串復將王氏賣與王勞八爲妻有牛進山表弟張胖子及王十三過

付可証詎牛進山賣後輒以買婚有據等情於三十三年四月十三日赴

府轅呈控奉批究報仍不來縣投質復以惡棍利婚等情赴

前道憲吳行轅控奉批飭查案訊斷趙倅屢傳未獲卸事移交

卑職

照案勒傳牛進山恃住隔境匿不到案茲經比據原差傳

獲一千並添傳要証連日悉心究訊牛進山所指買娶王氏之媒證文修謙雖已物故尙有翟十黑到案供稱並無其事是控翟喜等買後串訛顯係捏飾毫無疑義至稱席長玉戴二洋裝盜買王氏惡棍利婚一層現已質明不惟席長玉等均無盜賣王氏情事卽伊復將王氏賣給王勞八爲妻更有娶主王勞八及媒證戴二洋裝與夫過付之張胖子等供明可憑又有伊之

書立賣契手印可証當堂比驗相符再三環質牛進山無可狡賴方克俯首認誣查牛進山始而誘拐王氏強逼成婚迨經敗露被控並不聽候訊斷復將王氏賣與王勞八爲妻並敢捏誣上控實屬刁惡已極若不從嚴究懲殊不足以儆刁風惟是照例擬辦自當層迭解審似此刁狡之徒勢必妄供圖翻仍復拖累無干擬請遞回本籍泌陽縣發交罪犯習藝所習藝五年期滿察看情形再行核辦俾示懲儆翟喜訊無賣妻情事且因王氏兩次改配情願具結不肯領回應聽其便王氏一再改配本有不合惟係婦女無知且爲逼迫所致請免照例擬辦王勞八買娶王氏不知原情並不知係有夫之婦亦免置議王氏既願卽從王勞八過度斷交王勞八領回團聚戴二洋裝張胖子均

經說明不知拐賣情事亦請免其置議案已訊結無干省釋除
取具各結附卷並將牛進山遞回泌陽縣候示外所有訊斷緣
由是否允當理合稟請
鑒核俯賜批示祇遵

縣民全清吉上控楊三黑拉勸轟傷全清舉身死一案被
告楊三黑業經奉飭保釋請免復提以省拖累稟

敬稟者案蒙

憲台批據卑縣民全清吉以拉勸轟傷刁狡混濛等情上控一
案詞由蒙批究竟楊三黑是否用火鎗打傷全清舉身死正兇
現既獲案仰唐縣迅卽提集質訊察究勿任互推懸擱致滋越
瀆等因到縣蒙此遵查此案於光緒三十四年正月十五日據

縣民全清吉呈報本月十二日午前因王廷湘向楊恩榮楊三黑索欠口角勸散楊恩榮等又糾衆與王廷湘鬪毀伊弟全清舉前往攔勸不知被楊恩榮等何人用鎗打傷等情經卑前縣趙倅驗訊詳報緝獲楊三黑訊不承認押候覆審卑職到任創修候審公所稟請撥所待質在案光緒三十四年十一月初九日恭奉

恩詔准其查辦遵卽開摺稟蒙

撫憲批司核議旋奉

臬憲核明楊三黑係命案被控屢訊不承又無確切証據現在逸犯弋獲無期遽難訊實日久羈累亦殊可憫應飭暫交妥實首事保回俟訊俟日後緝獲逸犯供有該犯等在內再行提同

質明分別擬辦等因轉行到縣隨於三月二十四日取保省釋
並於月報開除項下聲明在案茲奉前因除趕緊比差嚴緝逸
犯楊恩榮等訊明分別提質究辦外所有奉飭保釋緣由理合
稟請

查核俯賜立案免予復提以省拖累

謗書目錄

江陰何震彝穆志編次

卷四

詳革訟棍楊清蘭職銜監生歸案訊辦文

訊明楊清蘭素不安分教唆詞訟擾害鄉里按例擬議解
審究辦文

會查職商韓鵬舉等稟請開採縣境西崗中煤礦詳細情
形稟

韓鵬舉串同劣紳張邦屏捏保朦稟指礦招搖查明確據
請註銷霞翰公司名目以杜後患稟

訪聞祁宜鎮李清金被毆身死屍親知情私埋匿報查明
大概情形現擬檢驗緝兇稟

驗明李清金委係受傷身死訊據屍子李萱供認救父情
切誤傷所致擬卽押犯進省稟

禁卒莊陳排灣官地租錢統按每畝四百文繳納以紓民
力稟

訊結上控自理各案除專案稟報不計外現共擬結一百
三十起摘叙節略呈請核示稟

會委查訊官銀匠李東興鋪掌任東壁上控丁幕串訛等
情照帳算明訊斷稟

會委斥革官銀匠李東興另選妥役接充並將提辦地丁
平餘五百兩仍在該匠火耗解費五分項下提扣批解
稟

會查已死姚敬之強搶兇犯卻永華之士并無報稅印花
稟

趙一彭之妻李氏熱心學務慨捐鉅貲援例懇請奏獎稟
縣差孫得勝藉案詐贓頭役張萬富趙萬昌李清雲等兇
惡較遜均經查訊明確分別責懲稟

查復紳士李海嶼動用趙倅門丁龍雲卽龍澤賢儲庫贓
款銀兩充修習藝所工用稟

稟送唐縣民政調查統計表

遵照新頒冊式補送月報冊表稟

附再稟

呈報初選舉當選人選已足額照章填給執照按名知會
稟

依限派定調查員選派城鄉調查董事發結選舉資格表

辦理情形稟

經征菸照烟舫斗捐賠墊銀價實難爲繼稟

勸辦洛潼鐵路催收股款爲難情形稟

謗書卷四

詳革訟棍楊清蘭監生職銜歸案訊辦文

爲詳請咨革事案查 卑 縣巡檢職銜楊清蘭素不安分平日橫行鄉里教唆詞訟欺壓良善無所不爲人控控人之案不一而足前蒙本道憲委員會同 卑 前縣訊明將該巡檢職銜楊清蘭管押吏房稟請懲辦未奉批示乃楊清蘭仍不知悛改復胆敢在押代人作詞本年六月十九日據謝連堂呈控巡警首事方鍾瑞私設公堂擅行拷打經 卑 職 提集當堂質對而謝連堂與方鍾瑞并不識面詰以因何來案誣控則稱係聽楊清蘭教唆并囑以到堂不可吐實等語 卑 職 乘其不備親赴楊清蘭廝內搜出呈底多紙并各案批語當卽提楊清蘭到堂質訊一味恃

符刁狡堅不認供查卑縣訟風素熾命盜則牽控多人任意誣指錢債輒屢結屢翻纏訟不休細訪民間好訟之由悉由若輩居間播弄所致若不從嚴懲辦殊不足以遏刁風除研訊確情另文詳辦外理合將楊清蘭捐納監生及巡檢職銜部監各照申繳

憲台鑒核俯賜轉詳將該巡檢職銜監生楊清蘭請咨斥革以便歸案審辦實爲公便爲此備由具申伏乞

照詳施行

訊明楊清蘭素不安分教唆詞訟擾害鄉里按例擬議解
審究辦文

爲詳報事案查卑縣巡檢職銜楊清蘭素不安分橫行鄉里教

唆詞訟控案纍纍前蒙本道憲委員會同卑前縣訊明將楊清
蘭管押吏房楊清蘭仍敢在押代人作詞光緒三十四年六月
十九日據謝連堂呈控巡警首事方鍾瑞私設公堂擅行拷打
一案經卑職訊係楊清蘭教唆當卽乘其不備親赴楊清蘭寓
內搜出呈底多紙當將該巡檢職銜楊清蘭追照詳請斥革一
面提同研訊

據謝連堂供光緒三十四年五月內小的承當郝化文地十一
畝當價錢九十二串錢已交清嗣後郝化文說錢色太壞叫小
的更換小的不願經巡警局勇與小的們和處叫小的更換一
半小的不服就進城告狀找着楊清蘭把情由說知楊清蘭說
情節太輕就合小的做呈底一紙說方鍾瑞私設公堂叫局勇

把小的拷打等情交給小的並告訴小的說到堂不可實供小的給他錢四串來案呈告小的合方鍾瑞並不認識委係聽楊清蘭教唆並非有心誣告求恩典是實

據涂四供小的在上屯巡警局充當巡勇本年六月內謝連堂當郝化文地畝錢已交清嗣後郝化文說錢色太壞叫謝連堂換錢謝連堂不願更換經小的和處勸令謝連堂更換一半謝連堂就把小的誣控了小的並沒把謝連堂拉到局內吊打情事是實

據五品銜方鍾瑞供職員係上屯首事本年六月內謝連堂合郝化文因當地換錢口角隊勇涂四與他們和處謝連堂就把職員誣控案內職員合謝連堂並不識面也沒私設公堂把他

吊打情事今蒙訊明求公斷是實

據已革巡檢職銜楊清蘭供年四十九歲唐縣人父母俱故並沒兄弟女人常氏並沒子女犯人向在縣屬教書度日光緒二十九年七月內犯人因家貧難度起意代人作詞得錢花用隨有素識的劉鳳安向犯人告說他因地畝糾葛被牛鳳舞把他地糧食搶去央犯人作詞赴縣呈告犯人就代他做呈詞一張交劉鳳安呈遞得受謝資錢一千文又三十年六月裏有趙明亮當給族人趙清元地三十四畝趙明亮無力回贖擬令趙清元找價絕賣趙清元不願承買犯人唆令趙明亮告狀做就呈詞交趙明亮呈遞得受謝資二千文那年九月裏有曲振元因他從堂叔曲立涵有地兩頃年老乏嗣擇取曲錫鏞承繼曲振

元想要爭繼向犯人商議犯人捏以曲錫庸串同族親越佔阻繼代曲振元做詞一紙交曲振元呈遞得受曲振元謝資五千文又三十一年七月裏有湖北施客人呈控李福林等強拏他衣物錢文李福林央犯人代作詞狀呈訴犯人做就呈詞捏控差役勒訛私押代書不敢寫詞等情交李福林赴府呈控得受謝資五千文又三十三年二月裏有閻錦亭胞叔閻玉奇與他次祖閻景星承繼因景星家貧不欲承繼閻錦亭恐閻士奇分本門家產犯人唆令告狀代做呈詞一紙捏以閻士奇母死不殮持刀逞兇等情交閻錦亭呈遞得受謝資二千文那年七月裏王自富胞弟王自亮在上屯買犂被侯智等搶去犂兩車央犯人代做呈詞告狀犯人代做詞一紙交王自富呈遞並未索

得謝儀二十四年五月裏犯人因楊棟梁互控經前縣提訊管
押有僧人望長不守清規被黃體仁稟控望長情虛向犯人商
議犯人叫他遞呈分訴代他做詞一張捏以黃體仁串通腹黨
閻寅浩捏誣妄控等情交望長呈遞得受謝儀五千文六月裏
謝連堂承當郝化文地畝因換錢經巡警局和處謝連堂不服
來城告狀找着犯人商議犯人說情節太輕要捏說首事方鍾
瑞在局私設公堂擅行拷打方能邀准就代做呈詞一張交謝
連堂呈遞得受謝儀四千不料謝連堂到堂供出真情把犯人
從前詞底收獲今蒙提同質訊犯人實止唆訟作詞這八次此
外並沒另犯不法別案也沒串通書吏嚇詐鄉愚的事所得錢
文均已陸續花用求恩典是實各等供據此該署理唐縣知縣

錢祥保審看得縣民楊清蘭素不安分教唆詞訟一案緣楊清
蘭籍隸卑縣由監生捐納巡檢職銜教書度日光緒二十九年
七月間該犯因家貧難度起意代人作詞得錢花用隨有素識
之劉鳳安告說因地畝糾葛被牛鳳舞搶去糧食央該犯作詞
呈控該犯就代作呈詞一張交劉鳳舞呈遞得受謝資一千文
又於三十年六月間有趙明亮當給族人趙清元地三十四畝
趙明亮無力回贖擬令趙清元找價絕賣趙清元不應該犯唆
令趙明亮告狀做就呈詞交趙明亮呈遞得受謝資二千文又
是年九月間有曲振元因他從堂叔曲立涵有地二頃年老乏
嗣擇取曲錫鏞承繼曲振元意圖爭奪向該犯商議該犯就捏
以曲錫鏞牽同族親越佔阻繼代曲振元做成呈詞交曲振元

呈遞得受謝資五千文又於三十一年七月間有湖北施姓客民呈控李福林等強拿衣物錢文李福林央該犯代作呈訴捏控差役勒索私押代書不敢寫詞各情交李福林赴府上控得受謝資五千文又三十三年二月間有閩錦亭胞叔閩士奇與次祖閩景星承繼因景星家貧不欲承繼閩錦亭恐閩士奇分本門家產該犯唆令告狀代做呈詞捏閩士奇母死不殮持刀逞兇等情交閩錦亭呈遞得受謝資二千文又是年七月王自富胞弟王自亮在上屯買犂被侯智等搶去犂兩車央該犯代作呈詞一紙交王自富呈遞未得謝儀又三十四年五月間該犯因楊棟梁互控經前縣提訊管押有僧人望長不守清規被黃體仁稟控望長情虛向該犯商議該犯教令遞詞分訴代作

呈詞捏以黃體仁串同腹黨閻寅浩捏誣妄控等情交望長呈遞得受謝資五千文又六月間謝連堂承當郝化文地畝因換錢經巡警局和處謝連堂不服來城控告找着該犯商議該犯說情節太輕非捏稱首事方鍾瑞在局私設公堂擅行拷打不能邀准當時代作呈詞一張交謝連堂呈遞得受謝儀四千元謝連堂到堂供出實情隨即將該犯及各案呈稿搜獲當堂令對筆跡相符質訊明確追照詳革一面研審通詳奉批審解據報犯病醫痊遵提覆鞫據供前情不諱究詰實止峻訟作詞一起此外並無另犯不法及串通書吏嚇詐鄉愚之事案無遁飾查例載積慣訟棍播弄鄉愚審實依棍徒生事擾害例發雲貴兩廣極邊烟瘴充軍等語此案楊清蘭教唆詞訟代作呈詞至

八起之多自應按例問擬革巡檢職銜楊清蘭合依積慣訟棍播弄鄉愚審實依棍徒生事擾害例發雲貴兩廣極邊烟瘴充軍仍照名例改發以極邊四千里爲限到配後遵照新章分別監禁該犯事犯到官在光緒三十四年十一月初九日恭逢恩詔以前核其情罪係在不准援免之列毋庸查辦所得錢文據稱已經花用請免追還原主所有覆審擬議緣由是否允協理合連犯解候 憲台審轉再此案應以光緒三十四年六月十九日獲案之日起縣審分限兩個月封印犯病清查交代各一個月清查戶口四十日又奉委赴泌陽驗案公出四日與隣封會哨先後公出十日犯供翻易差傳要証謝連堂赴湖北貿易關傳質審應扣傳限二十日往返程限各二十日值

國喪及本年二月祭祀不理刑名各一個月又赴府面稟地方
事公出五日進省面稟地方事宜公出二十日解府程限二日
統應扣至宣統元年五月初十日限滿今於限內審解並未逾
違合併聲明爲此備由具申伏乞

照詳施行須至册者

署理唐縣爲簡詳事竊照卑縣審解楊清蘭素不安分教唆詞

訟一案除全詳在册不叙外理合摘叙簡詳連犯解候

憲台審轉爲此備由具申伏乞

照詳施行須至申者

計申解 詳册一本 截白册二本

人犯一名 楊清蘭

全刑紅衣褲現年五十一歲瓜面有鬚
左手大指食指中指無名指小指均斗

右手大指斗食指箕中指無名指小指
均斗唐縣人

會查職商韓鵬舉等稟請開採縣境西崗中煤礦詳細情形稟

敬稟者竊

卑職

世瑩接奉

憲台札委以據職商韓鵬舉等稟

擬集資本三千兩在唐縣西南崗中地方租陳王二姓開採煤礦飭卽馳詣會查究有若干方里合畝數若干有無洋股保單是否可靠詳細稟復核奪等因遵卽束裝馳抵唐縣卑職祥先期奉到札飭並由郵局自省寄呈韓鵬舉稟函內附保單四紙到縣隨會同調齊歷年舊卷查得卑縣西南崗分陳沖王沖兩處距城僅五六里曾於光緒二十六年有沈靜糾約客民牛青山等集資開挖嗣因挖至十數丈後水勢浩大迄未見煤百計

提斛毫無效驗由是破產傾家而城關紳董又以工人半係無業游民距城太近恐滋巨禍迭赴府縣稟請封閉後遂無人續開業經各前縣列表稟明在案茲奉前因_{卑職}等會同親詣各該處逐加履勘原硎因水廢棄積水甚深餘無礦苗可以辨認當場集訊地主王孟貴陳貴年等僉稱伊與韓鵬舉並不認識亦無張翰卿卽張邦屏與之說項承租礦地開採書立字據情事當將家存糧票呈驗情願出具甘結察核供詞似屬可信查傳韓鵬舉等始終亦未來縣所有礦地究有若干方里既未承租現亦無從查繪至韓鵬舉稟呈保單內載柘城縣城內鮑太和號承擔銀兩千五百兩核與取具本地殷實鋪商章程亦不相符此項存款是否可靠有無洋股在內殊難懸測除將保單

四紙存^卑縣一紙備案其餘三紙移請柘城縣葉令壽萱提訊
該鋪取具切實妥保應俟復到再行核辦並將地主王孟貴等
各結先行附呈備查外所有奉委會查詳細情形理合稟請
查核俯賜示遵

韓鵬舉串同劣紳張邦屏捏保朦稟指礦招搖查明確據
請註銷霞翰公司名目以杜後患稟

敬稟者案查前奉

礦政調查局

札以職商韓鵬舉等稟擬集資

本三千兩設立霞翰公司請領小柴煤探礦執照在唐縣西南
崗地方租陳王二姓地開採煤礦飭卽會同委員候補知縣張
令世瑩查丈明確繪圖稟覆等因並由郵局自省城寄呈韓鵬
舉等稟函內附保單四紙書明鮑太和號擔保銀兩千五百兩

如有違背照數認繳充公到縣

卑職

當以此稟係郵局呈遞未

便率准照章存案不行嗣因張令抵唐傳諭認真籌辦以關利源等示遵卽會查歷年舊卷緣縣境西南崗陳沖王沖地方距城僅五六里曾於光緒二十六年有沈靜糾約客民牛青山等集資開挖煤礦旋以見水停止其時城關紳董咸以工人半係無業游民距城太近恐滋巨禍先後稟請府縣封閉至今無人續開究竟其中有無煤質無從訪悉當經會同張令親詣陳沖等處詳加履勘原硎積水甚深餘無礦苗可以辨認當場集訊地主王孟貴陳貴年均稱與韓鵬舉並不認識亦無張翰卿卽張邦屏與之說項承租開礦立據之事呈驗家存糧票出具甘結再三詰問實屬可信查傳韓鵬舉等始終均未來縣以致無

從繪圖查丈方里惟察核韓鵬舉原稟情形均屬子虛所呈保單銀兩恐亦未必可靠隨備文移請柘城縣葉令壽萱提訊鮑太和擔保銀兩是否切實據情確復核辦一面取具該地主甘結會稟鑒核奉批據稟已悉繳結存各在案茲准柘城縣葉令移復以提訊鮑泰和卽鮑文會供稱在本城東街開設泰和堂藥鋪生理與韓鵬舉素日認識韓鵬舉開採煤礦捏寫泰和號擔保銀兩伊並不知情至伊鋪內現用圖記係泰和堂字樣亦與保單內圖記字樣不同顯係捏造送還保單請查收塗銷等因接閱之下實深詫異伏查原稟之韓鵬舉係柘城縣人分發山東補用縣丞前在省局具稟時係與張邦屏聯名而由省遞縣之稟並無張邦屏之名則此事全由張邦屏招引作偽已屬

顯然惟張邦屏係卑縣著名素不安分之人平日架唆詞訟招

搖撞騙無所不爲前辦茅草寺巡警則倚勢欺訛里人側目襄

辦興隆鎮義倉積穀首事竟將倉穀吞蝕一空去年冬間卑職

因盤查倉穀考核巡警賬目各事畏懼潛逃旋又冒聯郭榮甲

之名赴省捏控金炳昭種種誑詞現亦被郭榮甲在縣告發近

因各案差傳緊急不敢投案質訊逃匿省城仍復不安本分輒

敢指礦招搖濤張爲幻實屬胆大妄爲且此案先期並未在縣

稟報竟自陳請礦政調查局委員會查則處心積慮自在朦准

之後藉名集股任意撞騙尤爲情見乎詞現已確切查明若不

設法預爲嚴禁不但各股東受其愚弄被騙銀兩紛紛來縣控

追致生糾葛竊恐爲時過久騙術彌工則爲禍彌烈殊於全省

礦務招股之事大有關碍相應據實稟陳仰乞 憲台俯念事
關礦政詳查韓鵬舉張邦屏在局遞稟時當有切實妥保究係
由何人保認現在張邦屏藏匿何處請速飭傳押發到縣俾由
卑職併案澈訊詳請究辦至韓鵬舉身為職官乃於該商開礦
例應達部之案竟敢捏寫保單偽造圖記欺朦嘗試冀遂私圖
亦屬有玷官箴應如何酌予懲儆並將該職所立霞翰公司名
目及請領礦照各案撤銷之處伏候 鈞裁所有韓鵬舉等捏
保朦稟指礦招搖懇請查傳押發緣由理合稟請
鑒核批示祇遵

訪聞祁宜鎮李清金被毆身死屍親知情私埋匿報查明
大概情形現擬檢驗緝究稟

敬稟者

卑職

前因訪聞縣屬祁宜集地方有毆斃人命屍妻屍

子到場知情私埋匿報情事以無確證未敢冒昧傳究當卽改裝易服詳細訪查有小李莊民李清金前於四月初間無病而故卽時掩埋或謂夫婦吵鬧服烟身死或謂因與族兄李清富之妻李張氏通姦致被本夫同衆毆斃亦有稱被尸妻尸子到場同毆致死者傳言雖屬不一究非因病而亡隨傳該管地保族隣及屍妻李陳氏尸子李宣到案迭次隔別悉心研訊李陳氏母子供詞狡展異常查傳李清富李張氏等俱已逃避無踪難保非恃無質證飾詞避就質之地保族隣均稱傳聞不一殊難指實詳查案情已死李清金委係被毆致斃人命重案且關倫紀未便壅於上聞但命案以傷爲重必須驗訊明確方能

審辦卑職現擬卽行檢驗屍傷一面差緝李清富等務獲究報
惟時逾兩月時當盛暑屍身恐有腐化除詳慎檢驗再行研訊
務得確情另文稟辦外所有訪聞查訊大概情形理合稟請
鑒核俯賜批示祇遵

驗明李清金委係受傷身死訊據屍子李萱供認救父情
切悞傷所致擬卽押犯進省稟

敬稟者竊照卑縣前因訪聞縣民李清金被毆身死私埋匿報
一案當將傳訊屍妻李陳氏等狡展大概情形通稟、憲鑒一
面親詣勘得小李莊距城五十五里村東有南北小路一條路
西有李陳氏坐北向南草房五間西南隣李清富住宅一處門
外有石碾一盤村北里許路邊李陳氏地內有浮土一堆據李

陳氏指稱伊夫李清金係在石碾旁邊被伊子悞傷身死用箔捲埋此處勘畢飭令起去浮土解開箔楮將屍移放平明地面如法相驗據仵作楊德清喝報驗得已死李清金問年五十三歲仰面身長四尺膀闊一尺二寸屍身發變致命額頤木器傷一處斜長一寸寬六分青黑色按捺骨損餘俱無故委係因傷身死報畢親驗無異飭起兇器無獲無憑比對屍傷當場填格殮屍取結附卷訊據屍子李萱供稱剃頭營生伊父李清金素吃洋烟伊平日孝順並無違犯宣統元年四月初二日二更時候伊父因家存洋烟吃完聲稱往向鄰佑族伯李清富借吃洋烟旋聞伊父與李清富爭吵伊與伊母李陳氏趕出看見李清富正在門外石滾旁邊按住伊父毆打伊一時情急順取碾上

木棍趕向李清富嚇毆不料李清富閃避悞將伊父頭顱打傷
伊與伊母趕將伊父扶回調治罔效旋即身死問明李清富說
是他在地內看麥回家取油見他女人李張氏正給父親挑烟
斥說父親不應稱其外出私向女人借烟父親不服口角起衅
伊母因係悞傷伊父身死恐怕報案大家受累又因家貧無錢
買棺當夜用箔捲埋事在黑夜別無隣佑地保牌甲都不知情
今蒙驗明實因護父情急悞打受傷身死並非有心干犯等供
質之屍妻李陳氏供悉相符提訊地保族隣僉稱事在黑夜居
住較遠均不知情飭傳李清富脫逃無獲除將該犯李萱等分
別收禁看管保候一面勒傳李清富務獲提集研訊務得確情
填格繪圖錄供通詳外所有驗訊情形理合馳稟

鑒核再據該犯供稱雖因救親情切悞傷伊父身死惟倫紀攸關擬卽訊明確情押犯進省聽候飭發審辦是否有當並懇批示祇遵

禁卒莊陳排灣官地租錢統按每畝四百文繳納以紓民力稟

敬稟者案蒙 憲札以 卑縣歸入宛南書院地畝應解本年麥秋兩季額租及加增租銀飭卽趕緊催齊批解計粘單一紙內開禁卒莊官地四頃每畝租錢三百三十三文今易錢改銀每畝統按五錢繳納合銀二百兩又陳排灣官地三頃八十六畝每畝租銀八分今每畝統按四錢繳納合銀一百五十四兩四錢等因到縣蒙此 卑職 遵卽轉飭催繳去後旋據禁卒庄稞戶

王太順等及陳排灣稞戶陳封恪等稟稱禁卒庄所種宛南書院官地四頃除河站沙壓外實止三頃八十餘畝此地本屬澆薄若值雨暘時若年歲豐登尙可勉強餬口禁卒莊均係貧苦窮民設遇歉收皆有凍餒之虞今再加增稞租實難措辦至陳排灣官地本屬濱臨唐河灘滾靡常沙壓者有之河陷者有之或有名無地或有地難耕今若再加稞租民情實難支給紛紛懇請代求免加等情具稟前來經卑職當堂再三開導該稞戶等均極口呼貧未便強其所難伏查禁卒莊及陳排灣官地畝數既多不足而土質瘠薄歷年收成減色委屬實在情形該稞戶等均係無業貧民全指地內出息爲全家衣食之計若遽將稞租易錢改銀較諸往昔計已加至一倍有奇民力實有未逮

本年租銀現尙未解分厘委非得已但現值學堂需款孔急該
稟戶等無論如何爲難亦當勉力輸納以濟要需豈容藉口推
諉嗣經反覆諭恩威並用始據承認每畝每年一律繳納租
錢四百文體察情形實難再加卑職仰荷 憲恩權守斯土但
使力能所及自應竭力催辦當此學堂待用方殷之際未便率
爾代陳然小民困苦情形誠不敢壅於上聞過事壓迫所有卑
縣禁卒莊及陳排灣兩處官地可否自本年秋季爲始每畝連
糧銀在內每年一律按照四百文納租本年秋季按一半照繳
每畝以二百文核算由縣催齊照依市價易銀批解以濟急需
而恤民隱之處出自逾格恩施無任悚惶之至理合稟請
查核示遵

訊結上控自理各案除專案稟報不計外現又擬結一百

三十起摘敘節略彙請核示稟

卑縣民情刁

敬稟者竊維行政以先勞爲本臨民以清簡爲先

詐詞訟繁多平時告期呈詞每次不下一百三四十張而上控之案亦復絡繹不絕推其原因固由民情好訟積習相沿然被

訟棍之架唆受書差之愚弄者實亦居其多數

卑職

於去夏到

任後每遇二八放告當堂收呈親核准駁立予批示控涉虛誣者嚴究主唆扣留撤訊訟棍則照例擬辦書差則儘法懲創均經隨時稟陳有案其控詞較確者批准傳訊立時票差勒限傳帶隨到隨審從不片刻稽遲半載以來業將各前任積案次第清結過半近屆呈期新舊呈狀每次不過四五十張較之往昔

竟已大減所有訊結上控自理各案除上控情節較重者已專
案另稟請銷自理已按月歸入八項月報報過者不計外其餘
未稟未報之案截至年底計共訊結一百三十起其中半屬前
任舊案自應彙案具報以省煩瀆藉以仰副 憲台息訟安民
之至意所有訊結各案是否允協理合摘敘訊斷節略彙造清
冊稟呈

鑒核訓示

會委查訊官銀匠李東興鋪掌任東璧上控丁幕串訛等
情照帳算明訊斷稟

敬稟者竊

卑職緒鈞

接奉

憲札以據唐縣鋪戶東興成監生

任東璧以幕丁串訛等情府控旋據唐縣面呈節略與原控情

節懸殊飭卽前往會同印官調查帳據秉公訊斷據實稟復等
因遵卽束裝馳抵唐縣該原告任東璧已於宣統元年二月二
十一日經南陽縣遞解到縣 卑職緒鈞 隨先將庫存帳簿經摺
等件逐一調齊澈查確算其中數目核與任東璧呈詞粘單所
開各數全不相符一面會同 卑職祥保 將任東璧及看管之李
祥文卽李相文等提案逐一訊明緣唐縣丁地錢糧向歸該錢
鋪李祥文充當官銀匠承收賚解由來已久 卑職祥保 上年夏
間到任後卽據張和合洪泰恆兩家公保東興成錢鋪仍充官
銀匠承辦錢糧當查東興成資本不甚充足該鋪掌櫃之任東
璧素不平正迥非商家本色隨擬將其撤換因 卑 前縣趙倅任
內錢糧卽係該鋪承辦時屆下忙該鋪存有趙任移解各項種

多糾葛未便驟易生手姑仍准其暫行充當李東興卽李祥文
係該鋪號夥銀匠一役卽伊承充詎上年十一月十八日李東
興承解

藩憲衙門丁耗以及

籌款所
提學司
刷印所

各處烟酒稅報費書價等項公

款銀四千二百餘兩由署內將文批等件點交該銀匠派人赴
省呈解去後至十二月二十間奉

各憲札催解欸並派委守提

卑職
詳保

誠恐該鋪或有錯誤隨

向任東璧等節次查詢據稱因去人所帶漢口期票未能上兌

又云籌欸所不收銀兩語言前後支吾迨至年底仍未奉到批

迴

卑職
詳保

以款關正賦卽征存各項公款以及本署應支冬

春兩季役食俸工在在均關緊要設有虧挪所繫非輕十二月

二十八日飭差韓紹愈等傳匠到署訊追乃李祥文避匿不到任東璧知已無可狡展自央原保人張和合洪泰恆暨紳士李海嶼等來縣就保准卽趕緊設法清解維時年關在邇署中公私各款需用甚多迫不及待該鋪下欠銀兩一時無從措交暫由李紳在保人張和合鋪挪借銀二百兩開支各項工食言明揭欠俟東興成交銀歸還本年正月初卑職以丁耗各欸考成綦嚴未便日久延宕隨專差赴省前往司房及各衙門局所探詢前項正雜各款仍未上兌飭傳任東璧已於正月初九日外出躲避查東興成交解上年錢糧日久既未上兌而經收縣署公款通盤結算除解欸四千二百餘兩不計外該鋪尙短欠已經報解之未批掃數丁地捐項等款銀二千餘兩之多任東璧

忽行逃避風聞李祥文亦擬潛逃顯有倒騙情形若不調賬清算誠難得其底蘊因恐差役索訛

卑職祥保

特於正月十九日

不動聲色親往該鋪將其賬簿調出帶署存庫飭書清算又恐市面負欠各商鋪聞該鋪有虧倒情事羣往索鬧滋生事端特派差韓克勤等前往該鋪彈壓排解一面將李祥文帶署交候審公所看管追繳欠項嗣由保人張和合等認繳至今仍未交清各在案詎任東壁懷疑帳房幕友在署進言說明該鋪本不充足致有澈查底帳之事卽添砌情節並將與該鋪向有銀錢來往之幕丁人等一併牽拉潛赴

憲轅具控維時

卑職祥保

因公晉郡得悉前情親呈節略復奉

札飭前因

卑職緒鈞

遵

卽到縣查賬逐一確算會同提訊備悉各情謹爲

憲台詳細

陳之卷查李東興上年十一月十八日承解正雜各款雖於本年正月底及二月初先後如數解到然查核解到坐日遲延兩月有餘實屬貽誤要公至該鋪下欠未批丁地捐欸等項銀二千一百餘兩除現保人張和合等陸續呈交外尙欠銀二百零八兩一錢五分至幕丁人等與該鋪平日銀錢往來查其流水底帳除曹子珍卽家丁曹斌所欠銀錢年前早已清結毫無帶欠外其餘帳友家丁雖各有未清尾欠而數目亦與任東璧府控粘呈清單不符其爲任意浮開砌詞越瀆已可概見現旣逐一查訊明確應卽秉公擬結查東興成卽任東璧承解丁耗銀兩於上年十一月十八日卽由縣署發交文批並不趕緊承解竟敢擅用漢口期票挪移公款就中取利遲至今年正月二十

三日始行上兌其雜款銀兩竟延至二月初三日始行解交無
論錢糧係 國家維正之供卽各項雜款亦均考成攸關豈容
如此拖延任東璧始而支吾繼而躲避任意挪移致誤解期按
例已罪有應得猶敢赴府砌詞上瀆實屬刁狡之尤本應照例
究辦姑念到案卽行據實供明俯首乞恩情同自首且承解正
雜各款業已清解格外從寬嚴行申斥卽將該官銀匠革除不
准復充斷令將下欠銀二百零八兩一錢五分立即呈交以清
公款帳友及家欠梅顏樓任憲亭等所欠銀錢業已飭承照賬
當堂質算如數分別清繳給領各清各款收賬勾銷取具領狀
附卷至張和合借項銀二百兩係紳士李海嶼等經手挪借應
仍由李紳手清還以清欠款應毋庸議差役韓紹愈等係奉飭

傳追韓克勤等係奉派彈壓詰無率人盤踞滋鬧各情事凌二
查無其人均免置議官銀匠另選妥人接充梅顏樓卽梅彬曹
子珍卽曹彬任憲亭卽任傑皆卑職祥保服役家丁曾於上年
未到任之先開摺呈明

前撫憲林查核有案並無稿案錢糧等項名目李祥文卽李相
文欵旣解清革退銀匠應卽交保開釋以免拖累賬簿二十一
本發還仍各取結附卷除將任東璧暫行取具連環鋪保候示
外所有卑職等會同查賬算明訊斷緣由是否有當理合取具
誣控甘結稟呈
查核批示祇遵

會委斥革官銀匠李東興另選妥役接充並將提解地丁

平餘五百兩仍在該匠火耗解費五分項下提扣批解稟

敬再稟者竊查卑縣徵收丁地向由官銀匠承收包解該銀匠每於交納糧銀定章內每兩扣有火耗解費等項五分並照市平加平加色除解費火耗等項費用外其中不無盈餘自光緒二十八年九年間迭奉

前藩憲札飭提解丁地平餘等項銀兩維時卑前縣趙故令完因缺分瘠苦報解爲難不得不酌盈劑虛設法籌措俾資挹注當將官銀匠所收火耗等項銀兩項下每年酌提銀五百兩化私爲公批解在案厥後各前任亦卽相率照辦歷有年所現在官銀匠李祥文旣因誤解斥革若再由錢鋪承充設有虧挪貽

誤勢必復蹈前轍 卑職緒鈞 與 卑職祥保 一再熟商惟有將徵

存銀兩按旬拆封提庫定明五櫃日收糧銀所用銀票錢帖祇

准收用取有連環鋪保之興源長慶興厚德厚聚三家殷實錢

鋪憑條可以完納其餘概不收用另由 卑職祥保 選擇妥人充

當官銀匠承辦公務庶銀錢分鋪經收不致重爲虧累而承解

正雜各款由在官人役承辦權亦可由已操不致太阿倒持仍

在火耗解費銀五分之內酌提歸公銀五百兩下餘銀兩儘數

歸該銀匠辦公解費等項之需 卑職 等係爲弊去太甚起見理

合據實附稟

查核示遵

會查已死姚敬之強拿兇犯邵永華之士並無報稅印花

稟

敬稟者竊

卑職從

接奉開封府憲札以復審

卑

縣民邵永華砍

傷姚敬之身死一案訊明情罪未確擬請發回就近傳證訊辦

稟奉

臬憲批飭委查已死姚敬之向該犯邵永華鋪內強拿之土曾

否報過土稅有無粘貼印花據實查明會銜稟復以憑核辦等

因遵卽束裝馳赴唐縣會同

卑職祥保

卷查此案報驗之初

卑

前署縣趙倅師鼐並未勘驗原挈之土時閱年餘犯已解省無

從查訊惟查該犯落膝初供卽稱此土係在死者姚敬之私局

所買並每月幫給姚敬之錢一千二百文以抵土稅

卑職祥保

於光緒三十四年六月到任接審提訊該犯邵永華所供如前

仍稱買之姚敬之局內當以姚敬之既係抽稅私局何能賣土且現已身死無可質證殊難憑信再三究詰始據供認買自本地零星小戶初供乃係推諉狡賴之詞覆經訪查該處居民鋪戶咸稱姚敬之並不賣土邵永華所賣多係收之本地鄉民均未見過報稅粘有印花是以卑縣原詳聲明該犯所買係屬私土茲奉前因卑職等詳細確查該犯所賣以及姚敬之強掣之土並無印花委係私土理合會稟查核

趙一彭之妻趙李氏熱心學務慨鉅貲援例懇請奏獎稟敬稟者案據卑縣孀婦趙曹氏遣抱呈稱伊次孫候選巡檢趙一彭係伊子歲貢生趙靜山次子幼配度支部員外郎李蘭馨之女李氏爲妻生子守印監生布經歷職銜李氏性情嫻淑賢

孝素稱前於光緒三十三年三月臨終時遺囑將其奩資城西關市房一所共計價一千三百五十串文照當年原置市價合銀一千餘兩捐入高等小學堂以充經費現爲李氏營葬合將原買此房印契一紙繳案飭由該學堂收租公用俾完遺志而助公益懇請轉稟立案等情據此隨即督同卑縣高等小學堂管理員紳親詣查驗所捐市房共計瓦房二十四間核與所呈印契相符註價錢一千三百五十串文調查當年市價銀每兩一千二百數十文合計銀價一千餘兩近年房田價值較昔昂貴銀價雖屬稍長而以市房時價合計實在千兩以上伏思已故趙李氏熱心學務慨捐鉅貲洵屬深明大義宏濟時艱雖無仰邀獎叙之意第捐助鉅款事出巾幗未便壅於上聞可否援

例詳請獎給匾額由該家屬自行建坊之處卑職未敢擅便除將此房印契移交新任徐令並諭飭該堂管理員經理收租以助學費外所有趙李氏以奩餘市房捐助學費緣由理合稟請鑒核俯賜轉請奏獎以昭激勸

縣差孫得勝藉案詐贓頭役張萬富趙萬昌李清雲等兇

惡較遜均經查訪明確分別責懲稟

敬稟者竊卑縣差役之惡甲於他屬自上年卑職到任後剔除

積弊嚴訂章程并將著名惡役盡法懲治舉一切差費場費名目全行革除各役始稍斂跡地方賴以乂安業將辦理情形先後稟陳在案乃近有皂役孫得勝卽孫發科者因卑職飭赴新任交卸有期竟敢故態復萌玩視定章藉西鄉申寺張延禮命

案執票在鄉私索場費並將案內無名之申家寺僧人亦索錢
八千文當經卑職查悉各情提案嚴行責懲一面諭飭被其訛
索之戶將所允贓類分文不准給發卽已給者亦嚴追分別退
還以免擾累惟新任徐令尙無接印確信乃該役孫得勝輒敢
視卑職行將交卸遂又利令智昏逞其故技其情實屬可惡若
不嚴加懲創不獨各差役尤而效之且恐卑職交卸後新任情
形未熟勢必任意欺朦將卑職改訂各章隱爲敗壞閭閻小民
又將無安枕之日况孫得勝歷被上控之案指不勝屈卑職在
任年餘隨時隨事留心察看實爲衙門巨蠹前有鞠文明道控
該役之案批府親提竟敢種種弊延尤爲胆大惡極卑職未便
以交卸在卽稍事姑容致衙蠹肆無忌憚除將孫得勝革役釘

錄收禁外惟有據寔稟陳仰祈

鑒核俯准將該蠹役孫得勝監禁十年以示懲儆此外尚有兇惡較次之頭役張萬富趙萬昌李清雲卽李豬頭亦經先後訪查明確雖不若孫得勝勢饒之大然亦遇事生風劣迹多端并請收罪犯習藝所各予錄禁五年屆時再行察奪俾肅法紀而安民生實爲德便

查復紳士李海嶼動用趙倅門丁龍雲卽龍澤賢儲庫賍款銀兩充修習藝所工用稟

敬稟者案蒙 憲札以 卑縣稟報遷移習藝所擴充改良辦理情形稟內聲叙工料用錢經承辦紳董稟請在於門丁龍澤賢賍銀項下撥用究竟龍澤賢係何任門丁何項賍款爲數若干

於何年月日追繳存庫飭卽照錄原案補報等因遵查龍澤賢
係卑前縣趙倅師爺所用門丁卑職於上年六月到任後二十
二日准趙倅函開以其家屬回省中途被挑夫將行李拐匿一
担家丁張貴龍雲卽龍澤賢將脚行頭縱逃該僕等亦相率逃
匿囑將該僕等家眷看管並傳該僕等訊追等因當查該僕等
於挑夫拐匿本官行李並不澈底查追輒縱行頭脫逃其中情
節原有不實不盡且龍澤賢尙有被人控告圖賄詐贓案據亟
應傳案訊究隨飭傳該僕逃匿無踪事之虛實無從質証惟查
龍雲卽龍澤賢所住廩處實存有贓銀二百兩是否該僕積賸
餘資抑係實在贓款無從揣測商之趙倅囑爲帶縣存庫卑職
當以派夫挑送行李係雜務張貴專責龍澤賢不過因人受累

卽另案被控詐贓該僕已先期潛逃并未審有確據該家眷係年輕婦女若遵函囑遽行看管恐羈留日久殊多未便因特商明趙倅從寬給還銀一百兩爲龍澤賢妻女盤費選派妥差解送回省下餘一百兩暫存縣庫俟所控贓案審問得實再行酌辦厥後屢傳龍澤賢在逃未獲適於九月間卑縣遷移罪犯習藝所擴充改良舉凡修葺房屋添置器具一切經費無出承辦紳士李海嶼等稟請挪用庫存閒款以爲工料之需經卑批准將前項貯庫贓銀一百兩暫行領出動用各在卷奉飭前因除將改修習藝所需用工料各款飭造清冊核實另文報銷外理合照抄趙倅原函據實稟復查考

稟送唐縣民政調查統計表

竊奉

撫憲電開各屬民政財政統計表前經電催迄今尙未送齊事
關欽限限電到十日內一律填報若再玩延定行擇尤嚴懲仰
卽遵照并飭屬知照院效等因轉行到縣奉此查民政財政兩
項前於奉文後業經卑職督同調查員賈贊唐等分別調查并
分諭邑紳曾由法政畢業之歐陽歧馬錫蕃等分往四鄉會同
各集鎮首事材長牌頭挨查戶口地畝一面將山川古蹟善舉
公舉會社及男女籍貫人數年齡婚嫁生死移徙庵觀寺院宗
教等項一律帶查并由調查員將應查事項到處明白演說期
共知曉窮兩月之力合散爲總已將民政各事查有端緒惟卑
縣幅員較廣全境計有三千五百三十六鄉村若概以村名分

填不特過形繁頤且與例要解說刺謬殊多故仍遵用舊制保甲名目但列其數而不臚舉其名以歸簡捷至男女年齡生死移徙婚嫁年齡及人民職業四表雖亦查知大概而鄉隅偏僻僻風氣閉塞隱諱實多且移徙生死日異而月不同尤非巡警完備實行動態調查辦法未能驟臻核實雖據該調查員分填報告復經 卑職 細爲考核誠如

部頒例要所載姑爲備懸一格以待逐漸改良誠不敢仍沿舊習稍有欺飾其餘應查各項凡有義晦未明或業經更改者均於備考註明除將財政各表詳細鉤稽分填報告外緣奉電飭理合先將民政統計表依限分別申送調查總局暨本府核辦仰祈

鑒核批示祇遵再財政表現正分手趕繕一俟繕齊卽行發申
合併聲明

遵照新頒冊式補送月報冊表稟 附再稟

敬稟者宣統元年六月十七日奉

河南清理財政局札發調查款目表冊一本飭將收支之數無論公款私款以至一切陋規外費逐細開列均自宣統元年正月起照新頒款式按月補報刻期趕辦依限呈送并將本地通用市平申合庫平每百兩須加若干於首月報告時隨文申叙以備稽核等因蒙此 卑職 遵將第二號凡例暨第一號部章摘要悉心體會切實辦理業將正月至六月份月報造報齊全其有以前漏未開列者亦均據實詳開和盤托出惟 卑 縣征收地

丁正耗向分大糧小糧折收銀兩錢文價各不同故應得平餘數亦較有多寡至本地通用市平比合庫平分兩更多懸殊案關財政未便差失毫厘致增督惑謹爲 憲台飭縷陳之查 縣征收地丁忙銀凡數在三錢以上者爲大糧每兩折收庫銀一兩四錢四分九厘其數在三錢以下者爲小糧亦照每兩一兩四錢四分九厘征收當年因小戶銀數奇零收銀不便按照市價每銀一兩合錢價一千八百文折收藉便小民計全境無閏額征丁地銀二萬五千四百十九兩九錢四分五厘本年係有閏年分應加征有閏銀三百七兩七錢二分二厘所有留支祭祀俸工以及分解漕項河夫驛站裁扣鄉飲等銀均在額征數內統征分解其耗羨一項卽在折收銀價一兩四錢四分九

厘之內舉傾鎔火耗平餘等項皆在其中此外并無另征耗羨銀兩所頒款目冊式既將各項名目按款分列自應將歲入之數各歸各款逐項分開若不將原委叙明恐易淆混至卑縣街市銀兩平色極形參差既有唐平源平賒平樊平之區分復有市銀足銀之各異按唐平每百兩比二六庫平應申平四錢唐市銀又比唐平足銀每百兩應補水六兩餘如源平賒平樊平懸殊尤多且提取現銀異常爲難大宗批解尤非轉購漢票不能兌現以致卑縣征收地丁錢糧雖統照唐平足銀折收惟因水色不足而市面所通用者率皆荆沙它紋及淮鹽課錠一經傾銷虧耗甚鉅故五櫃按旬折封報繳大糧征銀數目悉用銀條另按唐平足銀一百兩加繳補水規費銀三兩藉抵火耗匯

水之需故歲入款第十五款第十七項有收入補水櫃規一款此又不得不遵照 憲札特於首月報告隨文聲明者除將光緒三十四年分全年出入欸目趕緊查造另文申報并自七月起按月逐款開報外所有補送本年正月至六月連閏計七個月出入各項悉照新頒款式造冊報告及應須聲明緣由理合據實稟陳仰祈 鑒核批示祇遵

附再稟

敬再稟者 縣稅契一項向於正稅外增收三分項下內扣九厘爲書役各項飯食津貼之說皆由庫書隨時扣存外用分給各人支領祇將二分一厘按月繳署以資公用故按二分一厘

收入平餘項下所有歲出類錢糧用欸開支各項下除領契用費外餘亦統未開交應否補收補支并乞

訓示祇遵至地丁一項每兩接征實銀一兩四錢四分九厘內除一五耗羨五分爲書差銀匠人等飯食賞項五厘爲幕丁公賬淨得平餘二錢四分四厘卑前縣向由銀匠李東興錢鋪與戶書等經收包解并於飯厘五分之一外按照額征銀數加給公費一厘以資辦公一切解費花銷均由該銀匠等自行在省支付本年正月該銀匠虧挪公款追完公款革役改用銀匠張子建由署內征內解卽將加給公費一項扣發以抵解銀盤費各項花用惟該銀匠甫經接辦所支加平火工各欸係據省城銀爐開呈花單縣無舊賬可稽現核歲出錢糧用欸較之三十四

年以前支帳稍有增減合併聲明

呈報初選舉當選人選已足額照章填給執照按名知會
稟

敬稟者案奉 本府 札奉

諮議局籌辦處

札開照得本處昨將各府直隸州呈送選舉人

名册核准確數詳請

撫部院分配議員額數開單行知計唐縣應出當選人十四名
到縣等因奉此遵卽照章依限按區派由管理監察各員設區
投票並先期明白講演研究一切現於五月初一日第一次開
票統計九區共投票二千一百四十二張內除無效廢票一百
四十五張實得票一千九百九十七張按十四名核算照數之

半分除應得票七十一張爲初選當選人計當選者僅得內閣中書楊治清等六人遵於初七日復行補選以前次得票較多者按照原額加倍指定二十八名令原有投票人對之再投計投票一千零六張內除無效廢票六十二張實得票九百四十四張按八名核算照數之半分除應得票五十九張爲當選是日又得當選者監生方寶仁等五名續於初十日爲第二次補選計投票一千零十七張內除無效廢票十三張實得票一千零四張按三名核算照數之半分除應得票一百六十七張爲當選又選得廩生馮漢異等三名遂足初選舉十四員額數其有得票較多之徐景川等六名卽列爲初選候補當選員據管理員候選縣丞韓文炤監察員東河試用縣丞李海嶼先後報

告前來

卑職

復核無異除照章榜示飭將有效無效各票分別

儲存並照填執照按名知會當選人務於二十日以內呈明情願應選如有逾期不覆者爲不願應選另以名次在先之候補當選人補充統俟屆期再將當選人呈明書另文申送外所有

卑縣初選舉人數足額分別填給執照緣由理合將各當選員

姓名職銜及得票數目開具清摺呈報仰祈

鑒核備查再合當選員應否造送三代履歷年歲籍貫清冊并候 鈞示祇遵

依限派定調查員選派城鄉調查董事發給選舉資格表
辦理情形稟

敬稟者竊查前奉辦事選舉期限表內開各縣限定選舉調查

員正月初十前派定又各縣調查員會同城鄉董事發選舉資格表正月十一日等因遵照在案伏思選舉調查員董事任重事繁必須選派妥人方期任事得力前經卑職在於送府聽講紳董內慎加遴選已派定在籍內閣中書楊紳治清前廣西知縣曲紳純如候選訓導李紳絳樹李紳佩楨爲調查員議定城鄉分爲九區每區各選明幹耐勞紳董三四人發給執諭及填表須知調查規則勸諭文等件派爲調查董事限正月初十以前來縣請領選舉資格表去後旋於宣統元年正月初八日各區董事一律齊集縣署由卑職會督調查員將章程表文等件復爲摘要講解使各通曉辦法發給選舉資格表令各照章調查依限收表呈候復查核辦並諄諄面諭務各認真從事總期

毋漏毋遺不得稍有違延該董事等無不唯唯從命均各領表遵辦除仍會督調查員隨時稽查催辦統俟各表收齊復查造冊申送核辦外所有卑縣依限派定調查員及選派城鄉董事董事發給選舉資格表辦理情形理合稟報查考

經徵菸絲酒觔斗捐賠墊銀價實難爲繼稟

敬稟者竊查卑縣應徵酒觔加價一項每歲額銷酒六十萬零三千九百觔按每觔抽錢八文共應抽錢四千八百三十一串二百文又菸絲加價每歲額銷八萬六千四百觔每觔抽錢八文共抽應錢六百九十一串二百文在光緒三十年開辦之後徵數雖間有不足而銀價僅每兩一千零數十文照定章每兩一千三百九十文易銀兌解多以九十文報効尙可截長補短

不致過形竭蹶乃事歷數年官經數任造酒之戶率因糧價昂
貴成本不敷先後稟請歇業卑職於今夏六月內到任調查徵
數缺額甚多嗣經多方籌勸招集各商變通辦理窮數月之力
甫能勉強足額然開閉靡常尙不敢遽作准數現照定章銀價
與卑縣市價核算連同報効銀兩及解費各項每銀一兩須賠
墊錢二百八十文全年照額兌解合之斗捐約需解銀六千餘
兩計須賠墊錢一千七百餘千文之多如果缺分較優值此庫
藏支絀籌款爲難理應急公奉上以濟撥解要需無如卑缺情
形異常瘠苦久在 憲台洞鑒之中如再增此賠款力實萬難
爲繼除將秋季各款銀兩另文批解外理合將易銀爲難及不
能報解足數緣由據實陳明仰祈

鑒核示遵

勸辦洛潼鐵路催收股款爲難情形稟

敬稟者頃奉 鈞諭以接

河南鐵路公司函開路工明春卽須購地開辦需款孔多乘此鄉民閒暇之際切實轉飭所屬認真勸辦飭卽廣爲招募俾濟工需等因遵查集股興修鐵路其利甚溥前奉 憲台轉發路股章程並迭准公司函致當經 卑職 邀集公正紳商諭令分路分區實力勸辦並選派楊紳治清爲鐵路招股正總董李紳蘭郁等爲副總董及幹事各員就西關德厚聚錢店內爲鐵路招股辦事公所由 卑職 督飭認真招徠在案無如 卑縣 地處偏僻民安樸陋風氣不甚開通又無鹽當巨商僅恃業戶書認驟集

鉅資良非易加之前因昭信股票事失信於民省鄉富戶咸
以此爲藉口尤多推諉不前現經百計苦勸幾於舌敝唇焦計
儘招有四千餘股刻止陸續催收欸股奉飭前因除由卑職督
催乘時趕緊勸辦已認股者速令繳銀未認股者竭力招募庶
期多多益善成效可觀藉副 憲台與民興利之至意外所有
卑職勸辦路股情形理合稟請

鑒核備查

跋

作州縣難作河南州縣尤難非精練強幹不克爲良吏非慈惠廉明不克爲循吏以循吏之心運良吏之才而不能每人而悅之則仍不克作河南之州縣君宰唐邑一年餘苦心勞思不遺餘力用能百廢具舉商怵於市農力於田士嚮於學以爲蒸蒸行大用矣而以陳敏娃案遂罪吏議嗟呼此豈爲陳敏娃一案哉蓋李東興之賄買彈章斷斷然矣昔孫君葆田宰合肥以命案得罪於巨室言官受賄摭拾六款入奏時先君適撫皖亦以此案爲巨室所不容彼時奉旨交查若曲意順承孫則去官而先君斷不內召然先君乃一一洗刷之以彰公道嗟乎晚近疆吏如先君者能有幾人耶君之罷官亦可無鬱鬱於

懷抱矣留此治譜以示來者作汪龍莊病榻夢痕錄讀之可也
龍莊亦以無罪去官云辛亥七月默齋陳重慶

跋

分明理縣譜而曰謗書何也以愛民嫉惡黠者不得逞造作蜚語中傷之必欲免其官而後快也瑞生官河南歷劇縣政聲以宰唐邑爲最著而其遭謗也則爲唐之猾吏蠹役以積忿故賄京朝官列欵彈劾疆吏檄同官者覆按顛損上聞而奪其職公贖具在固不待唐之紳民籲請昭雪而明者亦知其冤也瑞生賦性淡泊後雖復官仍發汴省而家居不出葺園湖上有終焉之志時於杯酒間聞其論事侃侃猶如老吏斷獄頃以是書見示將付梓屬爲贅言可作汪龍莊病榻夢痕錄讀默齋已先我言之矣庚申六月龍喜許星箕